



THEOT Deuteronomy in IES77

Text taken from Accordance Module=Mahibere Hawariyat

Drafts 1-3 were prepared by the Addis Ababa Transcription Team, directed by Daniel Assefa; Draft 4, Ralph Lee

Deut. 1:1 ዝንቱ ውእቱ ነገር ዘነገሮሙ ሙሴ ለኵሉ እስራኤል በማዕድተ ዮርዳኖስ በመንገል ዐረቢሃ በኅብ ባሕረ ኤርትራ በማእከል ፋራን ጦፊል ወሎቦን ወአውሎን ወዘኬሪስያ።

Deut. 1:2 በዐሡር መዋዕል እምኮሬብ በፍኖተ ደብረ ሴይር እስከ ቃዴስ በርኔ።

Deut. 1:3 ወኮነ አመ አርብዓ ዓም አመ ዐሡር ወአሚሩ ወርኅ አመ ሠርቀ ወርኅ ነገሮሙ ሙሴ ለኵሉ ደቂቀ እስራኤል ኩሎ ዘአዘዞ እግዚአብሔር ይንግሮሙ።

Deut. 1:4 እምድኅረ ቀተልዎ ለሴዎን ንጉሠ አሞሬዎን ዘይነብር ውስተ ሔሴቦን ወለአግ ንጉሠ ባሳን ዘይነብር ውስተ አስጣሮት ወኤንድራይን።

Deut. 1:5 በማዕድተ ዮርዳኖስ ውስተ ምድረ ሞአብ ወአኀዘ ሙሴ ይንግር ዘንተ ሕገ ወይቤ እግዚአብሔር አምላክነ ነገረነ በኮሬብ ወይቤለነ አክለክሙ ኅዲሮቱ ውስተ ዝንቱ ደብር።

Deut. 1:6 ተንሥኡ እንከ ወሐሩ ወባኡ ውስተ ደብረ አሞሬዎን ወውስተ ኩሎ ማኅደረ ዐራባ ውስተ ደብሩ ወውስተ ገዳሙ ወውስተ ሊባ ወውስተ ጳራልያ ዘምድረ ከነዓን ወአንጢሊባኖን እስከ ፈለግ ዐቢይ ፈለገ ኤፍራጥስ።

Deut. 1:7 ናሁ ወሀብኩክሙ ይእተ ምድረ እንተ መሐልኩ ለአበዊክሙ ቅድሜክሙ ለአብርሃም ወለይስሐቅ ወለያዕቆብ ከመ አሀቦሙ ሎሙ ወለዘርዎሙ እምድኅሬሆሙ ምድረ እንተ ትውሕዝ ሐሊበ ወመዓረ።

Deut. 1:8 ወእቤለክሙ በውእቱ መዋዕል እንዘ እብል ኢይክል ባሕቲትየ ክሂሎተክሙ እስመ አብዝኅነ እግዚአብሔር አምላክነ።

Deut. 1:9 ወናሁ ብዙኃን አንትሙ ዮም ከመ ከዋክብተ ሰማይ።

Deut. 1:10 ወያብዝኅክሙ እግዚአብሔር አምላኩሙ ለአበዊነ ምእልፊተ ወለይባርክሙ በከመ ይቤለክሙ።

Deut. 1:11 ወእፎ እክል ባሕቲትየ ጳማክሙ ወሥራሐክሙ ወተባህሎተክሙ።

Deut. 1:12 አውፅኡ ለክሙ ዕደወ ጠቢባነ ወለባውያነ ወማእምራነ እምነገድክሙ ወእሠይሞሙ ለክሙ መሳፍንቲክሙ።

Deut. 1:13 ወአውሃእክሙኒ ወትቤሉኒ ሠናይ ዝንቱ ቃል ወትቤሉኒ ግበር ከማሁ።

Deut. 1:14 ወነሃእኩ እምውስቴትክሙ ዕደወ ጠቢባነ ወማእምራነ ወለባውያነ ወሢምክዎሙ ላዕሌክሙ ይኩኑክሙ መላእክተ ምእተ ወመላእክተ ኅምሳ ወመላእክተ ዐሠርቱ ወጸሐፍቶሙ ለመኳንንቲክሙ።

Deut. 1:15 ወእቤሎሙ በውእቱ መዋዕል ስምዑ ማእከል አኅዊክሙ ወማእከል ግዩር ማእከል ብእሲ ወእኑሁ ወማእከል ወአግብኡ ፍትሐ ጽድቅ።

Deut. 1:16 ወኢትንሥኡ ገጸ በፍትሕ ኢ ለንኡስ ወኢ ለዐቢይ ኩንኑ በጽድቅ ወኢትንሥኡ ገጸ ሰብእ እስመ ፍትሕ ዘእግዚአብሔር ውእቱ ወለእመ ቦ ዘተዐጸበክሙ ነገር ታዐርጉ ኅቤየ ወእሰምዎ።

Deut. 1:17 ወአዘዝኩክሙ በውእቱ መዋዕል ኩሎ ቃለ ዘትገብሩ።

Deut. 1:18 ወግዕዝነ እምኮሬብ ወሐርነ ኩሎ ዝክተ ገዳመ ዐቢየ ወግሩመ ዘርኢክሙ በፍኖተ ደብረ አሞሬዎን በከመ አዘዘነ እግዚአብሔር አምላክነ ወበጻሕነ እስከ ቃዴስ በርኔ።

Deut. 1:19 ወነገርኩክሙ በውእቱ መዋዕል ወእቤለክሙ ብጽሑ እስከ ደብረ አሞሬዎን ዘይሁበክሙ እግዚአብሔር አምላክክሙ።

Deut. 1:20 ወናሁ ርእዩ ከመ ወሀበክሙ እግዚአብሔር አምላክክሙ ይእተ ምድረ ቅድመ ገጽክሙ ዕረጉ እንከ ወተዋረስዎ በከመ ይቤሎሙ እግዚአብሔር አምላኩሙ ለአበዊነ ወኢትፍርሁ ወኢትደንግፁ።

Deut. 1:21 ወእምዝ መጻክሙ ኩልክሙ ኅቤየ ወትቤሉኒ ንፈኑ ዕደወ ቅድሜኒ ወይርአይዎ ለይእቲ ምድር ለነ ወይዜንዉነ ዜናሃ ለይእቲ ፍኖት እንተ ሀለወነ ንዕረግ ውስቴታ ወለአህጉርኒ እለ ሀለወነ ንባእ ውስቴቶን።

Deut. 1:22 ወደደሙኝ ውእቱ ነገር ወነሣእኩ እምወስቱትክሙ ዐሠርተ ወክልኤተ ዕደወ በበ አሐዱ ብእሲ እምነገድ።

Deut. 1:23 ወሐሩ ወዐርጉ ውስተ ደብር ወበጽሑ ውስተ ቈላተ ዐጽቅ ወርእይዋ።

Deut. 1:24 ወነሥኡ ምስሌሆሙ እምፍሬሃ ለይእቲ ምድር ወአምጽኡ ኀቤነ ወንቤ ሠናይት ምድር ዘይሁበነ እግዚአብሔር አምላክነ።

Deut. 1:25 ወአበይክሙ ዐሪገ ወክሐድክሙ ቃለ እግዚአብሔር አምላክክሙ።

Deut. 1:26 ወአንጉርጉርክሙ በውስተ ተዐይኒክሙ ወትቤሉ እስመ ይጻልኣነ እግዚአብሔር አውፅኣነ እምድረ ግብጽ ከመ ያግብኣነ ውስተ እዴሆሙ ለአሞሬዎን ከመ ይሰወር አይቱ እንከ ነዐርግ ንሕነ።

Deut. 1:27 ወባሕቱ አኅዊክሙ አክሐድዎ ለልብክሙ ወይቤሉክሙ ዐቢይ ሕዝብ ወብዙኅ ወይጸንዑ እምኔክሙ ወአህጉሪሆሙኝ ዐበይት ወቦቶን ጥቅመ ዘይበጽሕ እስከ ሰማይ ወርኢነ በህየ ደቂቆሙ ለእለ ያርብሕ።

Deut. 1:28 ወእቤለክሙ ኢትፍርሁ ወኢትደንግፁ እምኔሆሙ።

Deut. 1:29 እግዚአብሔር አምላክክሙ ውእቱ ይጸብእ ለክሙ ምስሌክሙ ወውእቱ የሐውር ቅድመ ገጽክሙ በከመ ኩሉ ዘገብረ ለክሙ በምድረ ግብጽ።

Deut. 1:30 ወበውስተ ዝንቱ ገዳም ዘርኢክሙ በከመ ሴሰየክሙ እግዚአብሔር አምላክክሙ ከመ ይሴሲ ብእሲ ወልዶ በኩሉ ፍኖት እንተ ሓርክሙ እስከ በጻሕክሙ ውስተ ዝንቱ መካን።

Deut. 1:31 ወኢአመንክምዎ በዝንቱ ቃል ለእግዚአብሔር አምላክክሙ ዘየሐውር ቅድሚክሙ ውስተ ፍኖት ከመ ይኅረይ ለክሙ መካነ ወይምራሕክሙ ሌሊተ በእሳት ከመ ያርኢክሙ ፍኖተ ዘተሐውሩ ባቲ ወመዓልተኝ በደመና።

Deut. 1:32 ወሰምዐ እግዚአብሔር ቃለ ነገርክሙ ወተምዕዐ ወመሐለ ወይቤ ከመ ኢይሬእይዋ እሉ ዕደወ ለይእቲ ምድር ቡርክት ዘመሐልኩ ለአበዊሆሙ ዘእንበለ ካሌብ ወልደ ዮፎኝ።

Deut. 1:33 ውእቱ ይሬእያ ወሎቱ እሁባ ለይእቲ ምድር እንተ ውስቱታ ዐርገ ወለደቂቁ እስመ ኀበ እግዚአብሔር ወእቱ ልቡ።

Deut. 1:34 ወኪያየኝ ተምዕዕኝ እግዚአብሔር በእንቲኣክሙ ወይቤለኝ አንተኝ ኢትበውእ ህየ።

Deut. 1:35 እስመ ኢያሱ ወልደ ነዌ ዘይቀውም ቅድሚከ ውእቱ ዘይበውእ ህየ ኪያሁ አጽንዖ ወውእቱ ያወርሶሙ ይእተ ምድረ ለእስራኤል።

Deut. 1:36 ወደቂቅክሙ እለ ትቤሉ ይፃወው ወኩሉ ሕፃን ንኡስ ዘኢያአምር ዮም ሠናይተ ወእኪተ እሙንቱ ይበውኡ ህየ ወሎሙ እሁባ ወእሙንቱ ይትወረስዋ።

Deut. 1:37 ወአንትሙሰ ተመየጡ ወገዐዙ ውስተ ገዳም ፍኖተ ባሕረ ኤርትራ።

Deut. 1:38 ወአውሣእክሙኝ ወትቤሉኝ አበስነ ቅድመ እግዚአብሔር አምላክነ ነዐርግ ንሕነ ወንትቃተል ወንገብር ኩሉ ዘከመ አዘዘነ እግዚአብሔር አምላክነ ወነሣእክሙ ብእሲ ብእሲ ንዋየ ሐቅልክሙ ወዐረግሙ ውስተ ደብር።

Deut. 1:39 ወይቤለኝ እግዚአብሔር በሎሙ ኢትዕርጉ ወኢትትቃተሉ እስመ ኢህለውኩ ምስሌክሙ ከመ ኢትትቀጥቀጡ ቅድመኡ ፀርክሙ።

Deut. 1:40 ወነገርኩክሙ ወኢሰማዕክሙኝ ወተዐወርክሙ ቃለ እግዚአብሔር ወተኅየልክሙ ወዐረግሙ ውስተ ደብር።

Deut. 1:41 ወወፅኡ አሞሬዎን እለ ይነብሩ ውስተ ውእቱ ደብር ወተቀበሉክሙ ወአንትዑክሙ ወሰደዱክሙ ወነደፋክሙ ከመ ንህብ ወወግኡክሙ እምሴይር እስከ ሔርማ።

Deut. 1:42 ወነበርክሙ ወበከይክሙ ቅድመ እግዚአብሔር ወኢሰምዐክሙ ቃለክሙ ወኢነጸረክሙ።

Deut. 1:43 ወነበርክሙ ውስተ ቃዴስ ብዙኅ መዋዕለ አምጣነ ነበርክሙ ቀዲሙ።

Deut. 2:1 ወተመየጥነ ወሐርነ ውስተ ገዳም ፍኖተ ባሕረ ኤርትራ በከመ ይቤለነ እግዚአብሔር ወያድናሁ ለደብረ ሴይር ብዙኅ መዋዕለ።

Deut. 2:2 ወይቤለኝ እግዚአብሔር ኮነክሙ ዐዊዶቶ ለዝንቱ ደብር ግብኡ እንከሰ ለመንገለ መስዕ።

Deut. 2:3 ወአዝዞሙ ለሕዝብ ወበሎሙ ናሁ ተሐውሩ አንትሙ እንተ አድዋሊሆሙ ለአኅዊክሙ ደቂቀ ዓሳው እለ ይነብሩ ውስተ ሴይር ወይፈርሁክሙ ጥቀ።

Deut. 2:4 ዑቁ ኢትትቃተሉ ምስሌሆሙ እስመ ኢይሁበክሙ እምድሮሙ ርስተ ወኢ ምሥጋረ እግር እስመ መክፈልቶ ወሀብክዎ ለዓሳው ደብረ ሴይር።

- Deut. 2:5 ተሳዋጦ እክለ በኅቤሆሙ በወርቅክሙ ወተሴሰዩ ወማየኒ በመስፈርት ንሥኡ እምኅቤሆሙ በወርቅክሙ ወስተዩ እስመ ባረከክሙ እግዚአብሔር አምላክክሙ በኩሉ ግብረ እደዊክሙ።
- Deut. 2:6 አእምር እፎ ዐደውካሁ ለዝንቱ ገዳም ዐቢይ ዘግሩም ውእቱ ናሁ አርብዓ ዓመ ሀለወ ምስሌክ እግዚአብሔር አምላክክ እንዘ አልቦ ዘያጥኦክ እምኩሉ ዘነበብከ።
- Deut. 2:7 ወተዐደውናሆሙ ለአጎዊን ደቂቀ ዔሳው እለ ይነብሩ ውስተ ሴይር ንበ ፍኖተ ዐራባ እምኤሎም ወእምጋስዮን ጋቤር ወእምዝ ተመየጥነ ወተዐደውን ፍኖተ ገዳም ዘሞአብ።
- Deut. 2:8 ወይቤለኒ እግዚአብሔር ኢትፃረርዎሙ ለሞአባውያን ወኢትትቃተሉ ምስሌሆሙ እስመ ኢይሁብክሙ ርስተ እምድሮሙ እስመ ለደቂቀ ሎጥ ወሀብክዎሙ ርስቶሙ።
- Deut. 2:9 ወዞሚን ቀደሙ ነበሩ ውስቴታ ሕዝብ ዐበይተ ጥቀ ወጽኑዓን ከመ እለ ውስተ አቂም።
- Deut. 2:10 ወራፋይን ካዕበ የጎድሩ እሙንቱኒ ከመ እለ ውስተ አቂም ወሞአባውያን ዞሚን ይብልዎሙ።
- Deut. 2:11 ወኮሬዎስ ውስተ ሴይር ይነብሩ ቀዲሙ ወደቂቀ ዔሳው አጥፍእዎሙ ወቀጥቀጥዎሙ እምቅድመ ገጽሙ ወነበሩ በመካኖሙ ከማሁ ይገብርዎ እስራኤል ለምድረ ርስቶሙ እንተ ዘወሀቦሙ እግዚአብሔር።
- Deut. 2:12 ወይእዜኒ ተንሥኡ ወገዐዙ አንትሙ ወሑሩ ውስተ ቈላተ ዛሬድ ወተዐደውናሁ ለቈላተ ዛሬድ።
- Deut. 2:13 ወመዋዕሊሁ በዘቦቱ ግእዝነ እምቃዴስ በርኔ እስከ ተዐደውናሁ ለቈላተ ዛሬድ ሠላሳ ወሰመንቱ ዓመት እስከ ሞቱ ኩሎሙ ዕደው ዘይእቲ ትውልድ እለ መስተቃትላን እሙንቱ ወጠፍኡ እማእከለ ትዕይንት በከመ መሐለ ላዕሌሆሙ እግዚአብሔር እግዚእ።
- Deut. 2:14 እስመ እደ እግዚአብሔር ሀለወት ላዕሌሆሙ ከመ ታጥፍኦሙ እማእከለ ትዕይንት እስከ ወድቁ።
- Deut. 2:15 ወኮነ እምዘወድቁ ኩሎሙ ውእቶሙ ዕደው መስተቃትላን ወሞቱ እማእከለ ሕዝብ።
- Deut. 2:16 ወነበበኒ እግዚአብሔር ወይቤለኒ ናሁ ተሐውሩ ወተዐደው ውስተ አድዋሊሆሙ ለሞአብ ወትበጽሑ ቅሩቦሙ ለደቂቀ አሞን።
- Deut. 2:17 ኢትፃረርዎሙ ወኢትትአጎዙ ቀትለ ምስሌሆሙ እስመ ኢእሁብክሙ እምድሮሙ ለደቂቀ አማን ርስተ እስመ ለደቂቀ ሎጥ ወሀብክዎሙ መክፈልቶሙ።
- Deut. 2:18 ወይእቲ ምድረ ራፋይን ትሰመይ እስመ ራፋይን ይነብሩ ውስቴታ ቀዲሙ ወአሞናውያንኒ ዞሚን ይብልዎሙ።
- Deut. 2:19 ሕዝብ ዐበይት ወብዙኃን ወጽኑዓን ውጎያላን ከመ እለ አቂም ዘአጥፍኦሙ እግዚአብሔር እምቅድመ ገጽሙ።
- Deut. 2:20 ወወረስዎሙ ወነበሩ ህየንቴሆሙ ከመ ገብሩ ደቂቀ ዔሳው እለ ይነብሩ ውስተ ሴይር በከመ አስዐሮሙ እግዚአብሔር እምቅድመ ገጽሙ ለኮሬውያን ወወረስዎሙ ወነበሩ ህየንቴሆሙ እስከ ዛቲ ዕለት።
- Deut. 2:21 ወሔዋውያንኒ እለ ይነብሩ ውስተ አሴሮት እስከ ጋዜስ ወቀጳዶቅያ አጥፍእዎሙ ወነበሩ ህየንቴሆሙ።
- Deut. 2:22 ወይእዜኒ ተንሥኡ ወገዐዙ አንትሙ ወዕድውዎ ለቈላተ አርኖን ናሁ አግባእክዎ ውስተ እዴክ ለሴዎን ንጉሠ ሔሴቦን አሞርያዊ ወለምድሩ ወምልካ ወተዋረሳ ወአጎዞሙ ወተቃተሎሙ።
- Deut. 2:23 ወበዛቲ ዕለት አቀድም አምጽኦ ላዕለ ኩሉ አሕዛብ እለ ሀለዉ መትሕተ ሰማይ ከመ ይፍርሁክ ወይርዐዱ እምኒክ ወይደንግፁ እምከመ ሰምዑ ስመክ ወትእጎዞሙ ፍርሀት እምቅድመ ገጽከ።
- Deut. 2:24 ወፈነውኩ ተናብልተ እምነ ገዳም ዘቈድሞት ንበ ሐሴቦን በቃለ ሰላም እንዘ እብል እጎልፍ እንተ ምድርክ ወፍኖተ አሐውር ኢእትገሐስ ኢ ለየማን ወኢ ለፀጋም።
- Deut. 2:25 እክለኒ በወርቅየ ትሁበኒ ወእሴሰይ ወማየኒ በወርቅየ ትሁበኒ ወእሰቲ ወዳእሙ እጎልፍ በእግርየ።
- Deut. 2:26 በከመ ገብሩ ሊተ ደቂቀ ዔሳው እለ ይነብሩ ውስተ ሴይር ወሞአባውያንኒ እለ ይነብሩ ውስተ አሮኤር እስከ አዐድዎ ለዮርዳኖስ ውስተ ምድር እንተ ወሀበነ እግዚአብሔር አምላክነ።
- Deut. 2:27 ወአበየ ሴዎን ንጉሠ ሐሴቦን አጎልፎተነ እንተ ኅቤሁ እስመ አጽንዐ እግዚአብሔር አምላክነ መንፈሶ ወእእከየ ልቦ ከመ ይግባእ ውስተ እዴነ በይእቲ ዕለት።
- Deut. 2:28 ወይቤለኒ እግዚአብሔር ናሁ አጎዝኩ አግብኦ ውስተ እዴክ በቅድመ ገጽክ ለሴዎን ንጉሠ ሐሴቦን አሞርያዊ ወምድሮሂ ወአጎዝ ተወረሳ ምድሮ ርስተ።
- Deut. 2:29 ወወፅእ ሴዎን ወተቀበለነ ውእቱ ወኩሉ ሕዝቡ ከመ ይትቃተለነ በኢያሳ።
- Deut. 2:30 ወአግብኦ እግዚአብሔር አምላክነ ውስተ እዴነ ወቀተልናሁ ሎቱ ወለኩሉ ደቂቁ ወለኩሉ ሕዝቡ።

- Deut. 2:31 ወነሣእን ኩሎ አህጉሪሁ በውእቱ መዋዕል ወአጥፋእናሆን ለኩሎን አህጉሪሁ ወአንስቲያሆሙኒ ወደቂቆሙኒ ወአልቦ ዘአትረፍን ነፋጺተ እምኔሆሙ ዘእንበለ እንስሳሆሙ ዘማህረክን ወበርበርን አህጉሪሆሙ ።
- Deut. 2:32 ወነሣእን ምድሮሙ እምአሮኤር እንተ ማዕዶተ ፈለገ አርኖን ወሀገረኒ እንተ ሀለወት ውስተ ቄላት እስከ ደብረ ገለአድ።
- Deut. 2:33 ወአልቦ ሀገር እንተ አምሰጠተን እስመ ኩሎ አህጉረ አግብአ እግዚአብሔር አምላክን ውስተ እዴን ዘእንበለ ምድረ ደቂቀ አሞን ዘኢበጻሕን።
- Deut. 2:34 ወኩሎ ዘውስተ ፈለገ ያቦቅ ወአህጉረኒ ዘውስተ ቴርኔ በከመ አዘዘን እግዚአብሔር አምላክን።
- Deut. 3:1 ወተመየጥነ ወዐረግነ ውስተ ፍኖተ ባሳን ወወፅአ አግ ንጉሠ ባሳን ተቀበለን ውእቱ ወኩሎ ሕዝቡ ውስተ ኤድራይን ከመ ይትቃተለን።
- Deut. 3:2 ወይቤለኒ እግዚአብሔር ኢትፍርሆ እስመ ውስተ እዴከ አገብኦ ወለኩሎ ሕዝቡ ወለኩሎ ምድሩ ወትገብሮ ከመ ገበርካሁ ለሴዎን ንጉሠ አሞሬዎን ዘይነብር ውስተ ሐሴቦን።
- Deut. 3:3 ወአግብኦ እግዚአብሔር አምላክን ውስተ እዴን ለአግ ንጉሠ ባሳን ወለኩሎ ሕዝቡ ወቀተልናሁ እስከ ኢያትረፍን እምኔሁ ዘርዐ።
- Deut. 3:4 ወአስተጋባእን ኩሎ አህጉሪሁ በውእቱ መዋዕል ወአልቦ ሀገር ዘኢነሣእን እምኔሆሙ ስሳ አህጉር ወኩሎ ዘአድያማ ለአርጎብ ዘመንግሥቱ ለአግ በባሳን።
- Deut. 3:5 ወኩሎን አህጉረ እለ ቦን ጥቅም ወነዋኃት አረፋቲሆን እለ ቦን መዓፁት ወመናሥግት ዘእንበለ አህጉረ ፊርዜዎን እለ እለ ብዙኃት እማንቱ ጥቀ።
- Deut. 3:6 ወስወርናሆሙ በከመ ገበርን በሴዎን ንጉሠ ሐሴቦን ወአጥፋእን ኩሎ አህጉረ ጎቡረ ወአንስቲያሆሙኒ ወደቂቆሙኒ እስከ ኢያትረፍን ነፋጺተ።
- Deut. 3:7 ወኩሎ እንስሳሆሙ ወምህርካ ዘበርበርን እምአህጉሪሆሙ።
- Deut. 3:8 ወነሣእን ምድሮሙ በውእቱ መዋዕል እምአደዊሆሙ ለክልኤቱ ነገሥተ አሞሬዎን እለ ሀለዉ ማዕዶተ ዮርዳኖስ እምፈለገ አርኖን እስከ ፈለገ ኤርሞን ዘይብልዎ ሰብአ ፊንቂስ አኤርሞን ወሳንዮርስ ወአሞሬዎን ይብልዎ ሳኔር።
- Deut. 3:9 ወኩሎ አህጉረ እለ ኔሶር ወኩሎ ዘገለአድ ወኩሎ ዘባሳን እስከ ኤልክድ ወኤንድራይን ሀገረ መንግሥቱ ለአግ በባሳን።
- Deut. 3:10 ባሕቱ እስመ ዓግ ንጉሠ ባሳን ውእቱ ዘተርፈ እምራፋይን ወናሁ ዐራቱ ዐራተ ሐፂን ሀለወት ውስተ ጽንፎሙ ለደቂቀ አሞን ትስዕ በእመት ኑኃ ወርብዕ በእመት ግድማ።
- Deut. 3:11 ወበርበርናሃ ለይእቲ ምድር በውእቱ መዋዕል እምአሮኤር እስከ ማዕዶተ ፈለገ ዘአርኖን ወመንፈቃ ለደብረ ገለአድ ወአህጉሪሁኒ ወሀብክዎሙ ለሮቤል ወለጋድ።
- Deut. 3:12 ወዘተርፈ እምገለአድ ወኩሎ ባሳን እመንግሥቱ ለአግ ወሀብክዎሙ ለመንፈቀ ነገደ ለምናሴ ወኩሎ አድያሚሃ ለአርጎብ ዝንቱ ኩሎ ባሳን ዘይትኃለቀኑ ውስተ ምድረ ራፋይን።
- Deut. 3:13 ወኢያእር ወልደ ምናሴ ነሥአ ኩሎ አድያሚሃ ለአርጎብ እስከ ደወለ ጌርጋሴ ወመከጢ ወሰመዮ ወስሙ ለባሳን አውታይ ኢያእር እስከ ዛቲ ዕለት ወለማኪር ወሀብክዎ ገለአድሃ።
- Deut. 3:14 ወለሮቤል ወለጋድ ወሀብክዎሙ እምድረ ገለአድ እስከ ፈለገ አርኖን ዘማእከለ ፈለገ አድባር ወእስከ ኢያቦቅ ፈለገ አድባር ዘደቂቀ አሞን።
- Deut. 3:15 ወአራባ ወዮርዳኖስ ወሰኖሙ ለመከናራት ወእስከ ባሕረ ዐረብ ባሕረ ኤሌቄ እምአሴዶን ዘፋስጋ ጽባሒሁ።
- Deut. 3:16 ወአዘዝኩከሙ በውእቱ መዋዕል ወእቤለክሙ እግዚአብሔር አምላክከሙ ወሀበክሙ ለዛቲ ምድረ መክፈልተክሙ ከመ ትሑሩ ምስለ ንዋየ ሐቅልክሙ ቅድሜሆሙ ለደቂቀ እስራኤል አጎዊክሙ ኩሎ ደቂቀ ጎይል።
- Deut. 3:17 ዘእንበለ አንስትያክሙ ወደቂቅክሙ ወአአምር ከመሂ ብዙኅ እንስሳ ብክሙ።
- Deut. 3:18 ወይነብር ባሕቱ ውስተ አህጉሪክሙ ዘወሀብኩክሙ እስከ አመ ያዐርፎሙ እግዚአብሔር አምላክን ለአጎዊክሙ ከማክሙ።
- Deut. 3:19 ወይወርሱ እሙንቱሂ ምድረ እንተ ይሁቦሙ እግዚአብሔር አምላክን በማዕዶተ ዮርዳኖስ ወእምዝ ትገብኡ ኩልክሙ ውስተ ርስትክሙ ዘወሀብኩክሙ።

Deut. 3:20 ወአዘዝክም ለኢያሱኒ በውእቱ መዋዕል ወእቤሎ ርእያ አዕይንቲክሙ ኩሎ ዘገብረ እግዚአብሔር በእሉ ክልኤቱ ነገሥት ከማሁ ይገብር እግዚአብሔር በኩሉ መንግሥት ኅብ ተሐውር አንተ ህየ ወኢትፍራህ እምኔሆሙ እስመ እግዚአብሔር ይፀብአሙ ለክሙ።

Deut. 3:21 ወስአልክዎ ለእግዚአብሔር በውእቱ መዋዕል ወእቤሎ እግዚአብሔር አንተ አጎዝክ ታርእዮ ለገብርክ ዕብይክ ውኅይለክ ወጽንዐ እዴክ ወልዕልና መዝራዕትክ ወመኑ ውእቱ አምላክ በሰማይ ወበምድር ዘይገብር በከመ ገበርክ አንተ።

Deut. 3:22 አብሐኒ እዕዱ ወእርአያ ለይእቲ ምድር ቡርክት ይእቲ እንተ ሀለወት ማዕዶተ ዮርዳኖስ ወለውእቱ ደብር ቡሩክ ወአንጢሊባኖን።

Deut. 3:23 ወተጸመመኒ እግዚአብሔር ወኢሰምዐኒ ወይቤለኒ እግዚአብሔር በዝኅ አክለክ ወኢትድግም እንከ ተናግሮ ቃለ አላ ዕረግ ውስተ ርእስ ዘውቅሮ።

Deut. 3:24 ወነጽር በአዕይንቲክ መንገለ ባሕር ወመስዕ ወአዜብ ወሠረቅ ወርኢ በአዕይንቲክ እስመ ኢተዐድዎ ለዝንቱ ዮርዳኖስ።

Deut. 3:25 ወአዝዞ ለኢያሱ ወአጽንዖ ሎቱ እስመ ውእቱ የዐዱ ቅድሜሁ ለዝንቱ ሕዝብ ወውእቱ ያወርሶሙ ምድረ እንተ ርኢክ።

Deut. 3:26 ወነበርኒ ውስተ ወግር ኅብ ቤተ ፌጎር።

Deut. 4:1 ወይእዜኒ እስራኤል ስምዑ ኩነኒሁ ወፍትሐ እግዚአብሔር ዘእሜህረክሙ ኣነ ዮም ከመ ትግበሩ ወትሕየዉ ወትብዝጉ ወትምልኡ ወትባኡ ወትረስዋ ለምድር ዘይሁበክሙ እግዚአብሔር አምላኮሙ ለአበዊክሙ።

Deut. 4:2 ወኢትወስኩ ላዕለ ዝ ቃል ዘእኤዝዘክሙ ኣነ ዮም ወኢትንትጉ እምኔሁ ከመ ትዕቀቡ ኩሎ ትእዛዞ ለእግዚአብሔር አምላክክሙ።

Deut. 4:3 አዕይንቲክሙ ርእያ ኩሎ ዘገብረ እግዚአብሔር አምላክኒ ብዔል ፌጎር ቀጥቀጦ እግዚአብሔር አምላክክሙ እምኔክሙ።

Deut. 4:4 ወአንትሙስ እለ ገባእክሙ ኅብ እግዚአብሔር አምላክክሙ ሕያዋን ኩልክሙ ዮም።

Deut. 4:5 ናሁ ርእዩ ዘአይክኩክሙ ኩነኒ ወፍትሐ በከመ አዘዘኒ እግዚአብሔር እግበር ከማሁ በምድር ዘትበውኡ ህየ አንትሙ ከመ ትትዋረስዋ።

Deut. 4:6 ወዕቀብዎ ወግበርዎ እስመ ውእቱ ጥበብክሙ ወአእምሮትክሙ በቅድመ ኩሎ አሕዛብ እለ ይሰምዕዎ ለዝንቱ ኩሎ ኩነኒ ወይብሉ ናሁ ሕዝብ ጠቢብ ወማእምር ወሕዝብ ዐቢይ ውእቱ ዝንቱ።

Deut. 4:7 ወመኑ ውእቱ ሕዝብ ዐቢይ ዘቦቱ አምላክ ዘይቀርቦ ከመ አምላክኒ እግዚአብሔር በኩሉ ዘጸዋዕናሁ።

Deut. 4:8 ወመኑ ውእቱ ሕዝብ ዐቢይ ዘቦቱ ኩነኒ ወፍትሐ ዘጽድቅ በከመ ዝንቱ ኩሎ ሕግ ዘኣነ እሁበክሙ ዮም ቅድሜክሙ።

Deut. 4:9 ዑቅ ርእስክ ወዕቀብ ነፍሰክ ጥቀ ከመ ኢትርሳዕ ኩሎ ዘንተ ነገረ ዘርእያ አዕይንቲክ ወኢይፃእ እምልብክ በኩሉ መዋዕለ ሕይወትክ ወመሀሮሙ ለደቂቅክ ወለደቂቀ ደቂቅክ።

Deut. 4:10 ወአይድያሙ ዘከመ ቆምክሙ ቅድመ እግዚአብሔር አምላክክሙ በኮሬብ አመ ዕለተ ተጋባእክሙ እስመ ይቤለኒ እግዚአብሔር አስተጋብኡሎ ለሕዝብ ኅቤየ ወይስምዑ ቃልየ ከመ ይትመሀሩ ፈሪሆትየ በኩሉ መዋዕል ዘቦቱ የሐይዉ እሙንቱ ላዕለ ምድር ወይምሀሩ ለደቂቆሙ።

Deut. 4:11 ወመጻእክሙ ወቆምክሙ ታሕተ ደብር ወይነድድ ደብሩ በእሳት እስከ ሰማይ ወጽልመት ወዐውሎ ወጣቃ።

Deut. 4:12 ወነበበኒ እግዚአብሔር በማእከለ እሳት ወሰማዕክሙ አንትሙ ቃሎ እንዘ ይትናገር ወርእየቶስ ኢርኢክሙ ዘእንበለ ቃሎ ዘሰማዕክሙ።

Deut. 4:13 ወአይድዐክሙ ኪዳኖ ዘአዘዘክሙ ከመ ትግበሩ ዐሥሩ ቃላተ ዘጸሐፎን ውስተ ክልኤ ጽላት ዘእብን።

Deut. 4:14 ወኢተኒ ዘአዘዘኒ እግዚአብሔር ከመ እምህርክሙ በውእቱ መዋዕል ኩነኒ ወፍትሐ ዘትገብሩ በምድር እንተ ውስቲታ ትበውኡ አንትሙ ትረስዋ።

Deut. 4:15 ወዕቀቡ ጥቀ ነፍሰክሙ እስመ ኢርኢክሙ ርእየቶ በይእቲ ዕለት እንተ ባቲ ተናገረክሙ እግዚአብሔር በኮሬብ ላዕለ ደብር እማእከለ እሳት ከመ ኢትጌግዩ።

Deut. 4:16 ወኢትግበሩ ለክሙ ግልፎ በአምሳለ ኩሎ ምስል በአምሳለ ተባዕት አው በአምሳለ አንስት።

Deut. 4:17 ወበአምሳለ ኩሉ እንስሳ ዘሀለወ ላዕለ ምድር ወበአምሳለ ኩሉ ያፍ ሰራሪ ዘይሰርር በታሕተ ሰማይ።

Deut. 4:18 ወበአምሳለ ኩሉ ሕያው ዘይትሐወስ ላዕለ ምድር ወበአምሳለ ኩሉ ዓሣ ዘሀለወ ውስተ ማይ መትሕተ ምድር።

Deut. 4:19 ወለእመ ነጻርከ ሰማየ ወርኢከ ፀሓየ ወወርኅ ወከዋክብተ ወኩሎ ሠርጓቲሃ ለሰማይ ዮጊ ትጌጊ ወትሰግድ ሎሙ ወታመልኮሙ ለእለ ገብረ እግዚአብሔር አምላክከ ለኩሉ አሕዛብ ዘታሕተ ሰማይ።

Deut. 4:20 ወኪያክሙስ ነሥኣክሙ እግዚአብሔር ወአውፅኣክሙ እምእቶነ ሐፂን እምግብጽ ከመ ትኩንዎ መክፈልተ ሕዝቡ እስከ ዛቲ ዕለት።

Deut. 4:21 ውተምዕዕኒ እግዚአብሔር በእንተ ዘትቤሉ አንትሙ ወመሐለ ከመ ኢየዐድዎ ለዝንቱ ዮርዳኖስ ወከመ ኢይበውእ ውስተ ምድር ዘይሁበከ እግዚአብሔር አምላክከ ርስተ።

Deut. 4:22 ናሁ አንስ እመውት በዛቲ ምድር ወኢየዐድዎ ለዮርዳኖስ ወአንትሙስ ተዐድውዎ ለዮርዳኖስ ወትትዋረስዎ ለይእቲ ምድር ቡርክት።

Deut. 4:23 ወዑቁ እንከ አንትሙ ኢትርስዑ ኪዳኖ ለእግዚአብሔር አምላክክሙ ዘተካየደ ምስሌክሙ ወእመ አበስክሙ ወገበርክሙ ለክሙ ግልፎ በአምሳለ ኩሉ ምስለ ዘበእንቲአሁ ቀሥፈከ እግዚአብሔር አምላክክ።

Deut. 4:24 እስመ እግዚአብሔር አምላክከ እሳት እንተ ታኅልቅ ውእቱ ወአምላክ ቀናኢ ውእቱ።

Deut. 4:25 ለእመ ወለድከ ደቂቀ ወአዋልደ ወደቂቀ ደቂቅከ ወጐንደይክሙ ላዕለ ምድር ወአበስክሙ ወገበርክሙ እኪተ ቅድመ እግዚአብሔር አምላክክሙ ከመ ታምዕዕዎ።

Deut. 4:26 ናሁ አስምዕ ለክሙ ሰማየ ወምድረ ከመ ትጠፍኡ ወትደመስሱ እምድር እንተ ላቲ አንትሙ ተዐድውዎ ለዮርዳኖስ ህየ ከመ ትትዋረስዎ ወኢትጐንድዩ መዋዕለ ውስቴታ አላ ተቀጥቅጦ ትትቀጠቀጡ።

Deut. 4:27 ወይዘርወክሙ እግዚአብሔር ውስተ ኩሉ አሕዛብ ወትተርፉ ውጉዳነ በጉልቀ ውስተ አሕዛብ እለ ውስቴቶሙ ያበውኣክሙ እግዚአብሔር ህየ።

Deut. 4:28 ወታመልኩ በህየ አማልክተ ባዕድ ግብረ እደ ዕጓለ እመሕያው ዕፀወ ወእእባነ እለ ኢያፌእዩ ወኢይሰምዑ ወኢይበልዑ ወኢያጼንው።

Deut. 4:29 ወእምዝ ተኅሥሥዎ ለእግዚአብሔር አምላክክሙ በህየ ወትረክብዎ ሶበ ኀሥሥክምዎ በኩሉ ልብክሙ ወበኩሉ ነፍስክሙ በሕማምክሙ።

Deut. 4:30 ወይረክበክሙ ኩሉ ዝንቱ ነገር በደኃሪ መዋዕል ወትትመየጡ ኀበ እግዚአብሔር አምላክክሙ ወይሰምዐክሙ።

Deut. 4:31 እስመ አምላክ መሓሪ ውእቱ እግዚአብሔር አምላክከ ኢየኅድገከ ወኢያጠፍኣከ ወኢይረስዕ ኪዳኖሙ ለአበዊከ ዘመሐለ ሎሙ።

Deut. 4:32 ተሰኣሉ ዘቀዲሙ መዋዕለ ዘኮነ እምቅድሜክሙ እምአመ ፈጠሮ እግዚአብሔር ለዕጓለ እመሕያው ዲበ ምድር እምአጽናፈ ሰማይ እስከ አጽናፈ ሰማይ ለእመ ኮነ ከመ ዝንቱ ነገር።

Deut. 4:33 ወለእመ ሰምዑ ሕዝብ ቃለ እግዚአብሔር አምላክ ዘሕያው እንዘ ይትናገር እማእከለ እሳት በከመ ሰማዕከ አንተ ወሐየውከ።

Deut. 4:34 ለእመ አመከረ እግዚአብሔር ወቦኣ ወነሥኣ ሎቱ ሕዝበ እማእከለ ሕዝብ በአመክሮ ወበተአምር ወበመድምም ወበቀትል ወበእድ ጽንዕት ወበመዝራዕት ልዑል ወበመደንግፅ ዐቢይ በከመ ኩሉ ዘገብረ እግዚአብሔር በምድረ ግብጽ በቅድሜከ እንዘ ትሬኢ።

Deut. 4:35 ከመ ታእምር ከመ ውእቱ እግዚአብሔር አምላክ ወአልቦ ባዕደ ዘእንበሌሁ።

Deut. 4:36 እምሰማይ ተሰምዐ ቃሉ ከመ ይምህርከ ወበምድር አርኣየ እሳቶ ዐቢየ ወሰማዕከ ቃሎ እማእከለ እሳት።

Deut. 4:37 እስመ ያፈቅሮሙ ለአበዊከ ውኅረዮሙ ለዘርዎሙ እምድኅሬሆሙ ኪያከ እምኩሉ አሕዛብ ወአውፅኣከ ውእቱ በኀይሉ ዐቢይ እምግብጽ።

Deut. 4:38 ከመ ያጥፍሎሙ ለአሕዛብ ዐበይት ወጽኑዓን እምቅድመ ገጽከ ወከመ ያብእከ ወየሀብከ ምድሮሙ ትረስ በከመ ሀለውከ ዮም።

Deut. 4:39 ወተአምር ዮም ከመ ውእቱ እግዚአብሔር አምላክከ ውእቱ እግዚአብሔር በሰማይ በላዕሉ ወበምድር በታሕቱ ወአልቦ ባዕደ እንበሌሁ።

Deut. 4:40 ወዕቀቡ ኩነኒሁ ወትእዛዞ ዘእኤዝዘክሙ ኣነ ዮም ከመ ሠናየ ይኩንክሙ ወለውሉድክሙሂ እምድጎሬክሙ ወከመ ይኩን መዋዕሊክሙ ውስተ ምድር ዘይሁበክሙ እግዚአብሔር አምላክክሙ በኩሉ መዋዕል።

Deut. 4:41 ወይእተ አሚረ ፈለጠ ሙሴ ሠላሰ አህጉረ በማዕዶተ ዮርዳኖስ በመንገለ ሠረቀ ፀሓይ ከመ ይስኪ ህየ ቀታሊ ዘቀተለ ካልኦ እንዘ ኢየአምር ወኢኮነ ጸላኢሁ ትካት ወይስኪ ውስተ አሐቲ እምእላንቱ አህጉር ወየሐዩ።

Deut. 4:42 ባሶር በገዳም ውስተ ምድረ ሐቅል ዘሮቤል ወአራሞት በገለአድ ዘጋድ ወአውሎን በባሳን ዘምናሴ።

Deut. 4:43 ዝንቱ ውእቱ ሕግ ዘአዘዘሙ ሙሴ በቅድሚሆሙ ለደቂቀ እስራኤል።

Deut. 4:44 ወዝንቱ ውእቱ ትእዛዝ ወኩነኒ ወፍትሕ ኩሉ ዘነገሮሙ ሙሴ ለኩሉ ደቂቀ እስራኤል በገዳም ወሂአሙ እምድረ ግብጽ።

Deut. 4:45 በማዕዶተ ዮርዳኖስ በቄላት ዘቅሩበ ቤተ ፌንር በምድረ ሴዎን ንጉሠ አሞሬዎን ዘይነብር ውስተ ሐሴቦን ዘቀተለ ሙሴ ወደቂቀ እስራኤል ወሂአሙ እምድረ ግብጽ።

Deut. 4:46 ወተዋረሱ ምድሮ ወምድረ አግሂ ንጉሠ ባሳን ክልኤቱ ነገሥተ አሞሬዎን እለ ይነብሩ ማዕዶተ ዮርዳኖስ መንገለ ሠረቀ ፀሓይ።

Deut. 4:47 እምአሮኤር እንተ ማዕዶተ ፈለገ አርኖን እስከ ደብረ ሴዎን ዘኤርሞን።

Deut. 4:48 ወኩሉ ዐረባ ለማዕዶተ ዮርዳኖስ ዘመንገለ ሠርቀ ፀሓይ ዘመትሕተ አሴዶን ዘበ መንደቀ።

Deut. 5:1 ወጸውያሙ ሙሴ ለኩሎሙ ማኅበረ እስራኤል ወይቤሎሙ ስምዑ እስራኤል ኩሎ ኩነኒ ወፍትሕ ዘአነ እነግረክሙ ዮም ውስተ እዘኒክሙ በዛቲ ዕለት ወተመሀሩ ገቢሮቶ ወዐቂቦቶ።

Deut. 5:2 እግዚአብሔር አምላክክሙ ዐቀመ ኪዳድ ምስሌክሙ በኮሬብ አኮ ለአበቂክሙ ዘዐቀመ ዘንተ ኪዳነ አላ ለክሙ እስመ አንትሙ ሀለውክሙ ዝየ ዮም ኩልክሙ ሕያዋን።

Deut. 5:3 ገጸ በገጽ ተናገረክሙ እግዚአብሔር በደብር ማእከለ እሳት።

Deut. 5:4 ወአንሰ እቀውም ማእከለ እግዚአብሔር ወማእከሌክሙ በይእቲ ዕለት ከመ እንግረክሙ ቃሎ ለእግዚአብሔር እስመ ፈራህክሙ እምቅድመ ገጸ እሳት ወኢዐረግሙ ውስተ ደብር።

Deut. 5:5 ወይቤ አነ ውእቱ እግዚአብሔር አምላክክ ዘአውፃእኩክ እምድረ ግብጽ እምቤተ ቅንዩት ወኢይኩንክ ባዕድ አምላክ ዘእንበሌየ።

Deut. 5:6 ወኢትግበር ለክ አምላክ ዘግልፎ ወኢ በኩሉ አምሳል ዘውስተ ሰማይ በላዕሉ ወኢ በኩሉ ዘውስተ ምድር በታሕቱ ወኢ በኩሉ ዘውስተ ማይ ዘመትሕተ ምድር ወኢትስግድ ሎሙ ወኢታምልኮሙ።

Deut. 5:7 እስመ አነ እግዚአብሔር አምላክክ አምላክ ቀናኢ ዘእኃልቀኑ ኀጣውኦ ወላዲ ላዕለ ውሉድ እስከ ኀልስ ወራብዕት ትውልድ ለእለ ይጸልኡኒ።

Deut. 5:8 ወእገብር ምሕረተ እስከ ዐሠርቱ ምእት ትውልድ ለእለ ያፈቅሩኒ ወለእለ የዐቅቡ ትእዛዝየ።

Deut. 5:9 ኢትምሐል በስመ እግዚአብሔር አምላክክ በሐሰት እስመ ኢያነጽሖ እግዚአብሔር ለዘይምሕል በስሙ በሐሰት።

Deut. 5:10 ወዕቀብ ዕለተ ሰንበት ወቀድሳ በከመ አዘዘክ እግዚአብሔር አምላክክ።

Deut. 5:11 ሰዱስ መዋዕለ ትገብር ኩሎ ግብረክ ወሳብዕት ዕለት ሰንበቱ ለእግዚአብሔር አምላክክ።

Deut. 5:12 ወኢትግበር ባቲ ኩሎ ግብረክ ኢ ወልድክ ወኢ ወለትክ ወኢ ገብርክ ወኢ አመትክ ወኢ ላሕምክ ወኢ አድግክ ወኢ ኩሎ እንስሳክ ወኢ ግዩር ዘውስተ ዴዴክ ከመ ያዕርፍ ገብርክ ወአመትክ ከማክ።

Deut. 5:13 ወተዘከር ከመ ገብር አንተ በምድረ ግብጽ ወአውፅኦክ እግዚአብሔር አምላክክ እምህየ በእድ ጽንዕት ወበመዝራዕት ልዑል ወበበይነ ዝ አዘዘክ እግዚአብሔር አምላክክ ከመ ትዕቀባ ለዕለተ ሰንበት ወትቀድሳ።

Deut. 5:14 አክብር አባክ ወእመክ በከመ አዘዘክ እግዚአብሔር አምላክክ ከመ ሠናየ ላዕሌክ ወይኩን መዋዕሊክ በዲበ ምድር ዘይሁበክ እግዚአብሔር አምላክክ።

Deut. 5:15 ኢትሑር ኀበ ብእሲተ ብእሲ።

Deut. 5:16 ወኢትቅትል ነፍሰ።

Deut. 5:17 ወኢትስርቅ።

Deut. 5:18 ወኢትኩን ስምዐ በሐሰት ላዕለ ቢጽክ ኢተሐሱ ስምዐ።

Deut. 5:19 ወኢትፍቱ ብእሲተ ካልእከ ወኢትፍቱ ቤቶ ለካልእከ ወኢ ገራህቶ ወኢ ገብሮ ወኢ አመቶ ወኢ ላሕሞ ወኢ አድጎ ወኢ እምኩሉ እንሰሳሁ ወኢ እምኩሉ ዘቦቱ ካልእከ።

Deut. 5:20 ዝንቱ ነገር ዘተናገረ እግዚአብሔር ለኩሉ ተዐይኒክሙ በውስተ ደብር በማእከል እሳት ወጽልመት ወወሎ ወቆባር ወቃል ዐቢይ ወኢደገመ እንከ ወጸሐፎ ውስተ ክልኤ ጽላት ዘእብን ወወሀበኒ እግዚአብሔር።

Deut. 5:21 ወኮነ ሶበ ሰማዕክሙ ውእተ ቃለ እምነ ማእከል እሳት ወደብሩሂ ይነድድ በእሳት ወመጸእክሙ ኅቤየ ኩልክሙ መላእክተ ነገድክሙ ወአእሩጊክሙ።

Deut. 5:22 ወትቤሉነ ናሁ አርአየኒ እግዚአብሔር አምላክነ ስብሐቲሁ ወቃሎኒ ሰማዕነ እማእከል እሳት ወዮም አእመርነ በዛቲ ዕለት ከመ ይትናገር እግዚአብሔር ምስለ ሰብእ ወየሐዩ።

Deut. 5:23 ወይእዚኒ ኢንሙት ወኢታጥፍኡነ ዛቲ እሳት ዐባይ ለእመ ደገምነ ንሕነ ሰሚዖተ ቃሉ ለእግዚአብሔር አምላክነ ዓፂ ንመውት እንከ።

Deut. 5:24 ወመኑ ውእቱ ዘሥጋ ዘይሰምዕ ቃሉ ለእግዚአብሔር ዘሕያው እንዘ ይትናገር እማእከል እሳት ዘከማነ ወየሐዩ።

Deut. 5:25 ሑር አንተ ወስማዕ ኩሉ ዘይብል እግዚአብሔር አምላክነ ወንግረነ አንተ ኩሉ ዘይቤለከ እግዚአብሔር አምላክነ ወንሰምዕ ወንገብር።

Deut. 5:26 ወሰምዕ እግዚአብሔር ቃለ ነገርክሙ ዘነበብክሙ ወዘትቤሉኒ ወይቤለኒ እግዚአብሔር ሰማዕኩ ቃሎሙ ዘይቤሉ ዝንቱ ሕዝብ ኩሉ ዘይቤሉከ ወርቱዕ ኩሉ ዘይቤሉ።

Deut. 5:27 መኑ እምወሀቦሙ ከመ ዝ ይኩን ሳዕሌሆሙ ከመ ይፍርሁኒ ወይዕቀቡ ትእዛዝየ በኩሉ መዋዕሊሆሙ ከመ ሠናይት ትኩኖሙ ወለውሉዶሙ እስከ ለዓለም።

Deut. 5:28 ሑር ወበሎሙ እትወ ውስተ አብያቲክሙ።

Deut. 5:29 ወአንተሰ ቁም ኅቤየ እንግርከ ትእዛዝየ ወኩነኒየ ወፍትሕየ ወኩሉ ዘትሚህሮሙ ወይግበሩ ከማሁ ውስተ ምድር እንተ ኣነ እሁቦሙ ርስቶሙ።

Deut. 5:30 ወዕቀቡ ከመ ትግበሩ በከመ አዘዘኒ እግዚአብሔር አምላክክሙ።

Deut. 5:31 ወኢትትገሐሡ ኢ ለየማን ወኢ ለፀጋም እምኩሉ ፍኖት ዘአዘዘክሙ እግዚአብሔር አምላክክሙ ከመ ትሑር ባቲ ከመ ሠናይት ትኩንክሙ ወከመ ታዕርፉ ወይኑኅ መዋዕሊክሙ ውስተ ምድር እንተ ትትዋረሱ።

Deut. 6:1 ወዝንቱ ውእቱ ትእዛዝ ወኩነኒ ወፍትሕ ኩሉ ዘአዘዘ እግዚአብሔር አምላክነ ከመ እመሀርክሙ ትግበሩ በውስተ ምድር እንተ ውስቴታ ትበውኡ ትትዋረስዋ።

Deut. 6:2 ከመ ትፍርህዎ ለእግዚአብሔር አምላክክሙ ወከመ ትዕቀቡ ኩሉ ኩነኒሁ ወትእዛዘ ዘኣነ እኤዝዘክሙ ዮም አንትሙ ወደቂቅክሙ በኩሉ መዋዕለ ሕይወትክሙ ከመ ይኑኅ መዋዕሊክሙ።

Deut. 6:3 ወስማዕ እስራኤል ከመ ትግበሩ ወከመ ትዕቀቡ ከመ ሠናይት ትኩንክሙ ወከመ ይኑኅ መዋዕሊክሙ ወከመ ትትባዝኑ ጥቀ በከመ ይቤ እግዚአብሔር አምላክሙ ለአበዊክሙ ከመ የሀብክሙ ምድረ እንተ ትውሕዝ ሐሊበ ወመዓረ።

Deut. 6:4 ወዝንቱ ውእቱ ትእዛዝ ወኩነኒ ኩሉ ዘአዘዘሙ ሙሴ ለደቂቀ እስራኤል በገዳም ወዲኦሙ እምድረ ግብጽ።

Deut. 6:5 ስማዕ እስራኤል እግዚአብሔር አምላክከ አሐዱ ውእቱ።

Deut. 6:6 ወአፍቅሮ ለእግዚአብሔር አምላክከ በኩሉ ልብከ ወበኩሉ ነፍስከ ወበኩሉ ኅሊናከ ወበኩሉ ኅይልከ።

Deut. 6:7 ወየሀሉ ውስተ ልብከ ኩሉ ወውስተ ነፍስከ ዝንቱ ኩሉ ነገር ዘኣነ እነግረከ ዮም።

Deut. 6:8 ወመሀሮ ለወልድከ ወንግሮ ኪያሁ እንዘ ትነብር ውስተ ቤት ወእንዘ ተሐውር ውስተ ፍኖት ወለእመ ሰከብከሂ ወለእመ ተንሣእከሂ።

Deut. 6:9 ወግበሮ ከመ ትእምርት ውስተ እዴከ ወይኩንከ ዘኢይትሐወስ እምቅድመ አዕይንቲከ።

Deut. 6:10 ወጸሐፎ ውስተ ምርፋቃተ ጥኅተ አብያቲከ ወውስተ ዴድያቲክሙ።

Deut. 6:11 ወኣመ አብኣከ እግዚአብሔር አምላክከ ውስተ ምድር እንተ መሐለ እግዚአብሔር ለአበዊከ ለአብርሃም ወለይስሐቅ ወለያዕቆብ ከመ የሀብከ አህጉረ ዐበይተ ወሠናይት ዘኢነደቀ።

Deut. 6:12 ወአብያተ ዘምሉእ እምኩሉ በረከት ዘኢዘገብከ ወዐዘቅተ ዘውቅሮ ዘኢወቀርከ ወአዕጻዳተ ወይን ወአዕጻደተ ዘኢተከልከ።

Deut. 6:13 ወእምድኅረ በላዕከ ወጸገብከ ዑቅ እንከ ኢትርስዖ ለእግዚአብሔር አምላክከ ዘአውፅኦከ እምድረ ግብጽ እምነ ቤተ ቅኔት።

Deut. 6:14 ወፍርሆ ለእግዚአብሔር አምላክከ ወሎቱ ለባሕቲቱ አምልኮ ወሎቱ ትልዎ ወበስመ ዚአሁ መሐል።

Deut. 6:15 ወኢትሑር ድኅረ አማልክተ ባዕድ ኅበ አማልክተ አሕዛብ እለ ዐውድከ እስመ አምላክ ቀናኢ ውእቱ እግዚአብሔር አምላክከ።

Deut. 6:16 ወዑቅ ኢይትመዐዕከ እግዚአብሔር አምላክከ በመዐቱ ወይሥሩከ እምነ ገጸ ምድር።

Deut. 6:17 ወኢታመክሮ ለእግዚአብሔር አምላክከ በከመ አመከርካሁ አመ ዕለተ መንሱት።

Deut. 6:18 ተዐቀብ ወዕቀብ ትእዛዞ ለእግዚአብሔር አምላክከ ወስማዕ ኩሎ ኩነኔሁ ዘአዘዘከ።

Deut. 6:19 ከመ ትግበር ዘሠናይ ወዘአዳም ቅድሜሁ ለእግዚአብሔር አምላክከ ከመ ሠናይተ ትኩንከ ወትባእ ትትዋረስ ምድረ ቡርክተ ዘመሐለ እግዚአብሔር ለአበዊከ።

Deut. 6:20 ከመ ይስድድ ኩሎ ፀረከ እምቅድመ ገጽከ በከመ ይቤ እግዚአብሔር።

Deut. 6:21 ወሶበ ተስእለከ ወልድከ ጌሠመ ወይቤለከ ምንት ውእቱ ዝንቱ ትእዛዝ ወኩነኔ ወፍትሕ ኩሎ ዘአዘዘከ እግዚአብሔር አምላክከ።

Deut. 6:22 ወትብሎ ለወልድከ አግብርቲሁ ንሕነ ለፈርዖን በብሔረ ግብጽ ወአውፅኦከ እግዚአብሔር አምላክከ እምህየ በእድ ጽንዕት ወበመዝራዕት ልዕልት።

Deut. 6:23 ወፈነወ እግዚአብሔር ተአምረ ወመድምመ ዐቢየ ወእኩየ ላዕለ ግብጽ ወላዕለ ፈርዖን ወላዕለ መማብቱ ወአግብርቲሁ ወላዕለ ቤቱ በቅድሜኑ።

Deut. 6:24 ወኪያነሰ አውፅኦከ እምህየ ከመ ያብኦነ ውስተ ዛቲ ምድር ወየሀበነሃ ዘመሐለ ከመ የሀበሙ ለአበዊከ።

Deut. 6:25 ወአዘዘከ እግዚአብሔር ዘንተ ኩሎ ኩነኔ ወፍትሕ ከመ ንግበር ወከመ ንፍርሆ ለእግዚአብሔር አምላክከ ከመ ሠናይት ትኩን በኩሎ መዋዕሊኒ ላዕሌነ ወከመ ንሕየው በከመ ዮም።

Deut. 6:26 ወከመ ንርከብ ምሕረተ ለእመ ዐቀብነ ከመ ንግበር ዘንተ ኩሎ ትእዛዝ በቅድመ እግዚአብሔር አምላክከ በከመ አዘዘከ እግዚአብሔር።

Deut. 7:1 ወለእመ አብኦከ እግዚአብሔር አምላክከ ውስተ ምድር እንተ ላቲ ተሐውር ህየ ከመ ትረሳ ወአሰሰለ አሕዛብ ዐበይተ ወበዙኃን እምቅድመ ገጽከ ኬጤዎን ወጌርጌሴዎን ወአሞሬዎን ወከናኔዎን ወፌርዜዎን ወኤዌዎን ወኢያቡሴዎን ሰብዓተ አሕዛብ ዐበይተ እለ ይጸንዑከ።

Deut. 7:2 ወአግብሎሙ ውስተ እዴከ ወቀተልካሆሙ ወአጥፍኦ አጥፍኦሙ ወኢትትካየድ ምስሌሆሙ ኪዳነ ወኢትምሐሮሙ።

Deut. 7:3 ወኢትትሐመዎሙ ወለትከ ኢተሀብ ለወልዱ ወወለቶ ኢትንሣእ ለወልድከ።

Deut. 7:4 እስመ ያግሕሦ ለወልድከ እምኔየ ወያመልክ ባዕዳነ አማልክተ ወይትመዐዕ እግዚአብሔር መዓተ ላዕሌክሙ ወይሄርወከ ፍጡነ።

Deut. 7:5 አላ ከመ ዝ ግበርዎሙ ምሥዋዓቲሆሙ ንሥቱ ወምስላቲሆሙ ቀጥቅጡ ወአዕዋማቲሆሙ ግዝሙ ወአማልክቲሆሙ ዘግልፎ አውዕዩ በእሳት።

Deut. 7:6 እስመ ሕዝብ ቅዱስ አንተ ለእግዚአብሔር አምላክከ ወኪያከ አብደረ ወኅርየ እግዚአብሔር አምላክከ ከመ ትኩኖ ሕዝብ ሎቱ እምኩሎ አሕዛብ እለ ሀለጢ ዲበ ገጸ ምድር።

Deut. 7:7 ወአኮ እስመ ትበዝኩ አንትሙ እምኩሎ አሕዛብ አብደረ ኅርዮተክሙ እግዚአብሔር አንትሙሰ ትውሕዱ እምኩሎ አሕዛብ።

Deut. 7:8 አላ እስመ ያፈቅረክሙ እግዚአብሔር ወእስመ የዐቅብ መሐላሁ ዘመሐለ ለአበዊከሙ ወበበይነ ዝንቱ አውፅኦክሙ በእድ ጽንዕት ወበመዝራዕት ልዕልት ወቤዘወክሙ እምቅኔት ወእምእዴሁ ለፈርዖን ንጉሠ ግብጽ።

Deut. 7:9 ወተአምር ከመ ውእቱ አምላክከ ውእቱ እግዚእ ወውእቱ አምላክ ማእምን ዘየዐቅብ ኪዳኖ ወምሕረቶ ለእለ ያፈቅርዎ ወየዐቅቡ ትእዛዞ እስከ ዐሠርቱ ምእት ትውልድ።

Deut. 7:10 ወይትቤቀሎሙ ለእለ ይጸልእዎ በቅድመ ገጽሙ ወይሄርዎሙ ወኢያጐነዲ ሠርዎቶሙ ለእለ ይጸልእዎ በቅድመ ገጽሙ።

Deut. 7:11 ወዕቀቡ ትእዛዞ ወኩነኔሁ ወፍትሕ ኩሎ ዘኣነ እኤዝዘክሙ ዮም ከመ ትግበርዎ።

Deut. 7:12 ወለእምከመ ሰማዕከመ ዘንተ ኩነኔሁ ወዐቀብክምዎ ወገበርክምዎ እግዚአብሔር የዐቅብ ለክመ ኪዳኖ ወምሕረቶ ዘመሐለ ለአበዊክመ።

Deut. 7:13 ወያፈቅረከ ወይባርከከ ወያስተባዝካከ ወይባርከ ለከ ፍሬ ከርሥከ ወፍሬ ምድርከ ወስርናየከ ወወይካከ ወቅብዐከ ወአዕጸዳተ ላሕምከ ወመራዕየ አባግጫከ ላዕለ ምድር ዘመሐለ ለአበዊከ የሀብከ።

Deut. 7:14 ወትከውን ቡሩከ እምኩሉ አሕዛብ ወአልቦ መካን እምአንስትከ ወአንተ እንተ አልባቲ ውሉድ ወኢ መካን እምእንስሳከ።

Deut. 7:15 ወያሴስል እግዚአብሔር እምኔከ ኩሎ ደዌ ወኩሎ ሕማመ እኩየ ዘርኢከ መጽአ ላዕለ ግብጽ ወኢያመጽአ ላዕሌከ ለውእቱ ኩሎ ዘርኢከ ወይመይሆ እምኔከ ወይወስዶ ላዕለ ፀርከ ወላዕለ ኩሎም እለ ይጸልኡከ።

Deut. 7:16 ወትበልዕ ምህርካሆመ ለአሕዛብ ዘይሁበከ እግዚአብሔር አምላክከ ወኢትምሐኮመ ዐይካከ ወኢታምልክ አማልክቲሆመ እስመ እኩይ ውእቱ ለከ ዝንቱ።

Deut. 7:17 ወለእመሰ ትብል በልብከ ይበዝኅ ዝንቱ ሕዝብ ወእፎ እክል አጥፍአቶመ ኢትፍርሆመ።

Deut. 7:18 ተዘክሮ ተዘክር ኩሎ ዘገብረ እግዚአብሔር አምላክከ ላዕለ ፈርዖን ወላዕለ ኩሎ ግብጽ ዐቢየ መንሱተ ዘርእያ አዕይንቲከ ወውእተ ተአምረ።

Deut. 7:19 ወመድምመ ዐበይተ ወበእድ ጽንዕት ወመዝራዕት ልዑል ዘከመ አውፅአከ እምህየ ከማሁ ይገብሮመ እግዚአብሔር አምላክከመ ለኩሎመ አሕዛብ እለ ትፈርሁ አንትመ እምቅድመ ገጸመ።

Deut. 7:20 ወይፌኑ እግዚአብሔር አምላክከ ቅድሜከ መቅሠፍተ ላዕሌሆመ እስከ ያጠፍአመ ለእለ ተርፉ ወለእለ ተኅብኡ እምኔከ።

Deut. 7:21 ወኢትደንግዕ እምቅድመ ገጸመ እስመ እግዚአብሔር አምላክከ ሀለወ ምስሌከ ወውእቱ አምላክ ዐቢይ ወጽኑዕ።

Deut. 7:22 ወያጠፍአመ ለእሉ አሕዛብ እምቅድመ ገጽከ በበ ንስቲት ንስቲት ወኢትበል አጠፍአመ ፍጡኅ ከመ ኢትኩን ምድር ሐቅለ ወይበዝኑ ላዕሌከ አራዊተ ገዳም።

Deut. 7:23 ወያገብአመ እግዚአብሔር አምላክከ ውስተ እዴከ ወይደመስሶመ በዐቢይ ሕርትምና እስከ ያጠፍአመ።

Deut. 7:24 ወያገብአመ ለነገሥቶመ ውስተ እዴከ ወይደመስሰ ስሞመ እምውእቱ መካን ወአልቦ ዘይትቃወም ቅድመ ገጽከ እስከ ያጠፍአመ እግዚአብሔር።

Deut. 7:25 ወኩሎ ግልፎ አማልክቲሆመ አውዕዩ በእሳት ወኢትፍቱ ኢ ወርቀ ወኢ ብሩረ እምኔሆመ ወኢትንሣእ ለከ ከመ ኢትጌጊ ቦመ እስመ ርኩሳን እሙንቱ በኅበ እግዚአብሔር አምላክከ።

Deut. 7:26 ወኢታብእ ርኩሰ ውስተ ቤትከ ወትኩን ርጉመ ከማሁ አርኩሶ ታረኩሶ ወአስቆርሮ ታስቆርሮ እስመ ርጉም ውእቱ።

Deut. 8:1 ወዕቀቡ ከመ ትግበሩ ኩሎ ትእዛዘ ዘእኤዝዘከመ ኣነ ዮም ከመ ትሕየዉ ወትትባዝኑ ወትባኡ ትትዋረስዋ ምድረ ዘመሐለ እግዚአብሔር ለአበዊክመ።

Deut. 8:2 ወተዘክር ኩሎ ፍኖተ ዘወሰደከ እግዚአብሔር አምላክከ ውስተ ገዳም ከመ ያሕምምከ ወከመ ያመክርከ ወከመ ያእምር ልበከ ለእመ ትዐቅብ ትእዛዞ ወለእመ አልቦ።

Deut. 8:3 ወአሕመመከ ወአርኅበከ ወእምዝ መና ሴሶየከ ዘኢየአምሩ አበዊከ ከመ ያርኢከ ከመ ኢኮነ በእክል ባሕቲቱ ዘየሐዩ ሰብእ ኣላ በኩሉ ቃል እንተ ትወፅእ እምአፉሁ ለእግዚአብሔር የሐዩ ሰብእ።

Deut. 8:4 አልባሲከኒ ኢበልየ በላዕሌከ ወእገሪከኒ ኢረስሐ ናሁ አርብዓ ዓም።

Deut. 8:5 ወእእምር በልብከ እስመ በከመ ይጌሥጽ ብእሲ ወልዶ ከማሁ ይጌሥጸከ እግዚአብሔር አምላክከ።

Deut. 8:6 ወዕቀብ ኩሎ ትእዛዞ ለእግዚአብሔር አምላክከ ከመ ትሑር በፍኖቱ ወትፍርሆ።

Deut. 8:7 እስመ እግዚአብሔር አምላክከ ያበውአከ ውስተ ምድር ቡርክት ወብዝኅት ዘአፍላገ ማይ ወዐዘቃቲሃ ከመ ቀላይ ወይትከዐው ውስተ ገዳም ወውስተ አድባር።

Deut. 8:8 ምድረ ስርናይ ወስገም ወዐጸደ ወይን ወበለስ ወሮማን ምድረ ቅብዕ ወዘይት ወመዓር።

Deut. 8:9 ምድር እንተ ኢኮነት በአስተአክሎ ዘትበልዖ ለእክላ ወአልቦ ዘተኅጥእ ምንተኒ ውስቲታ ምድር እንተ እበኒሃ ሐፂን ወእምውስተ አድባሪሃ ይኤልድዎ ለብርት።

Deut. 8:10 ወብላዕ ወጽገብ ወባርኮ ለእግዚአብሔር አምላክከ በውስተ ምድር ቡርክት ዘወሀበከ።

Deut. 8:11 ዑቅ ርእስከ ወኢትርስዖ ለእግዚአብሔር አምላክከ ከመ ትዕቀብ ትእዛዞ ወፍትሖ ወኩነኔሁ ወኩሎ ዘኣነ እኤዝዘከ ዮም።

- Deut. 8:12 የጊ ሶበ በላዕከ ወጸገብከ ወነደቀ አብያተ ሠናያነ ወነበርከ ውስቴቶሙ ወበዝኅ ለከ አባግዲከ ወአልሕምቲከ ወሶበ በዝኅ ለከ ወርቅ ወብሩር ወበዝኅ ለከ ኩሉ ንዋይከ የጊ ታዐቢ ልበከ።
- Deut. 8:13 ወትረስዖ ለእግዚአብሔር አምላክከ ዘአውፅአከ እምነ ምድረ ግብጽ እምቤተ ቅኔት።
- Deut. 8:14 ወወሰደከ ውስተ ገዳም ዐቢይ ወግሩም ዘውስቴቱ ዘአራዊተ ምድር ዘይነስከ ወዐቃርብት ወጽምእ ዘአልበ ማይ ለሰትይ ዘአውፅአ ለከ እምውስተ እብነ ኩኩሕ ነቅዐ ማየ ጥዑም።
- Deut. 8:15 ዘሴሰየከ መና በገዳም ዘኢየአምሩ አበዊከ ከመ ያሕምምከ ወያመክርከ ወያሠኒ ላዕሌከ በደጋሪትከ።
- Deut. 8:16 ወኢትበል በልብከ በኅይልከ ወበጽንዐ እዴየ ገበርኩ ዘንተ ኩሉ ኅይል ዐቢየ።
- Deut. 8:17 ወተዘከሮ ለእግዚአብሔር አምላክከ እስመ ውእቱ ይሁበከ ኅይል ከመ ያቅም ኪዳኖ ዘመሐለ ለአበዊከ በከመ የም።
- Deut. 8:18 ወለእመ ረሲዐ ረሳዕካሁ ለእግዚአብሔር አምላክከ ወሐርከ ድኅረ ባዕዳን አማልክት ወአምላካሆሙ ወሰገድከ ሎሙ አሰምዕ ላዕሌከ የም ሰማየ ወምድረ ከመ ጠፊአ ትጠፍእ።
- Deut. 8:19 በከመ አሕዛብ ኩሎሙ እለ ደምሰሶሙ እግዚአብሔር እምቅድመ ገጽከ ከማሁ ትደመሰስ ለእመ ኢሰማዕከ ቃለ እግዚአብሔር አምላክከ።
- Deut. 9:1 ስማዕ እስራኤል ናሁ ተዐድዎ አንተ የም ለየርዳኖስ ከመ ትሑር ትትዋረሶሙ ለአሕዛብ ዐበይት እለ ይጸንዑከ ወአህጉረ ዐበይተ ዘዐረፍተ ቅጽሮን ይበጽሕ እስከ ሰማይ።
- Deut. 9:2 ሕዝብ ዐቢይ ወብዙኅ ወነዋጋት ደቂቀ ኤናቅ እለ ትብሎሙ አንተ።
- Deut. 9:3 ወተአምር የም ከመ እግዚአብሔር አምላክከ የሐውር ቅድመ ገጽከ እሳት ዘይዌድእ ውእቱ ወውእቱ ይሄርዎሙ ወያነትዖሙ እምቅድመ ገጽከ ወያጠፍአሙ ወይደመስሶሙ ፍጡነ በከመ ይቤለከ።
- Deut. 9:4 ወኢትበል በልብከ ሶበ አጥፍአሙ እግዚአብሔር ለውእቶሙ አሕዛብ እምቅድመ ገጽከ በበይነ ጽድቅየ አብአኒ እግዚአብሔር እትወረሳ ለዛቲ ምድር ቡርክት አኮ በበይነ ጽድቅከ ወአኮ በበይነ ንጽሐ ልብከ ዘትበውእ አንተ ትትዋረሳ ለምድሮሙ።
- Deut. 9:5 አላ በበይነ ኅጢአቶሙ ለውእቶሙ አሕዛብ ያጠፍአሙ እግዚአብሔር እምቅድመ ገጽከ ወከመ ያቅም ኪዳኖ ዘመሐለ ለአበዊከ ለአብርሃም ወለይስሐቅ ወለያዕቆብ።
- Deut. 9:6 ወተአምር የም ከመ አኮ በበይነ ጽድቅከ ዘይሁበከሃ ለይእቲ ምድር ቡርክት አኮኩ ሕዝብ ዘያገዝፍ ክሳዶ አንተ።
- Deut. 9:7 ወተዘከር ወኢትርሳዕ ሚ መጠነ አምዐዕካሁ ለእግዚአብሔር አምላክከ በገዳም እምአመ አውፅአከ እምድረ ግብጽ እስከ በጸሕክሙ ውስተ ዝንቱ መካነ እንዘ ትክሕድዎ ለእግዚአብሔር አምልክክሙ።
- Deut. 9:8 ወበኮሬብሂ አምዐዕክምዎ ለእግዚአብሔር ወተምዕዐ እግዚአብሔር ላዕሌክሙ ከመ ያጥፍእክሙ።
- Deut. 9:9 አመ ዐረጉ አነ ውስተ ደብር ከመ እንሣእ ክልኤ ጽላተ ዘእብን ጽላተ ዘኪዳን ዘተካየደ እግዚአብሔር ምስሌክሙ።
- Deut. 9:10 ወነበርኩ ውስተ ደብር አርብዓ መዓልተ ወአርብዓ ሌሊተ እክለ ኢበላዕኩ ወማየ ኢሰተይኩ።
- Deut. 9:11 ወወሀበኒ እግዚአብሔር ክልኤ ጽላተ ዘእብን ዘተጽሕፋ በአጽባዕቱ ለእግዚአብሔር ወጽሑፍ ውስቴቶን ኩሉ ቃል ዘነገረኒ እግዚአብሔር በውስተ ደብር አመ ተጋባእክሙ።
- Deut. 9:12 ወበአርብዓ መዓልት ወበአርብዓ ሌሊት ወሀበኒ እግዚአብሔር ክልኤ ጽላተ ዘእብን ጽላተ ዘኪዳን።
- Deut. 9:13 ወይቤለኒ እግዚአብሔር ተንሥእ ወሑር ፍጡነ እምዝየ እስመ አበሱ ሕዝብከ ዘአውፃእከ እምድረ ግብጽ ወፍጡነ ክሕዱ እምፍኖት ዘአዘዝኩሙ ወገብሩ ሎሙ ስብኮ።
- Deut. 9:14 ወይቤለኒ እግዚአብሔር እቤለከ ምዕረ ወካዕበ እንዘ እብል ርኢክዎ ለዝንቱ ሕዝብ ከመ ሕዝብ ግዙፈ ክሳድ ውእቱ።
- Deut. 9:15 ኅድገኒ አጥፍአ ወእደምስስ ስሞ እምቃሕተ ሰማይ ወእገብር ውስተ ሕዝብ ዐቢይ ወጽኑዕ ወዘይበዝኅ እምዝንቱ ፈድፋድ።
- Deut. 9:16 ወተመየጥኩ ወወረድኩ እምነ ደብር ወደብሩሰ ይነድድ በእሳት ወእልክቱኒ ክልኤ ጽላት ውስተ ክልኤሆን እደውየ።
- Deut. 9:17 ወሶበ ርኢኩ ከመ አበስክሙ ቅድመ እግዚአብሔር አምላክክሙ ወገበርክሙ ለከሙ ስብኮ ወኅደግሙ ፍኖተ እንተ ዘአዘዝክሙ እግዚአብሔር ወነሣእክዎን ለእልክቱ ክልኤ ጽላት ወገደፍክዎን እምውስተ ክልኤሆን እደውየ ወቀጥቀጥክዎን በቅድሚክሙ።

Deut. 9:18 ወሰአልኩ ዳግመ ቅድመ እግዚአብሔር በከመ ቀዲሙ አርብዓ መዓልተ ወአርብዓ ሌሊተ እክለ ኢበላዕኩ ወማየ ኢሰተይኩ በእንተ ኩሉ ኅጣይኢክሙ ዘአበስክሙ ወዘገበርክሙ እኩየ ቅድመ እግዚአብሔር አምላክክሙ ከመ ታምዕዕዎ።

Deut. 9:19 ወፈራህኩ በእንተ መዐቱ ዘተምዕዐ እግዚአብሔር ላዕሌክሙ ከመ ያጥፍእክሙ ወሰምዐኒ እግዚአብሔር በውእቱ መዋዕል።

Deut. 9:20 ወላዕለ አሮንሂ ተምዕዐ እግዚአብሔር ጥቀ ከመ ይስርዎ ወጸለይኩ በእንተ አሮንሂ በውእቱ መዋዕል ወበእንተ ጌጋይክሙሂ ዘገበርክሙ ላሕሙ።

Deut. 9:21 ወነሣእክዎ ወቀጥቀጥክዎ ወሐረጽክዎ እስከ አድቀቅክዎ በሕቄ ወኮነ ከመ ጸበል ወወደይክዎ ለውእቱ ሐሪጽ ውስተ ነቅዕ ዘይወርድ እምደብር።

Deut. 9:22 ወበኅበ ውዕየትኒ ወአመ መንሱትኒ ወበኅበ መቃብረ ፍትወትኒ አምዕዕክምዎ ለእግዚአብሔር አምላክክሙ።

Deut. 9:23 ወአመሂ ፈነወክሙ እግዚአብሔር እምቃዴስ በርኔ ወይቤለክሙ ዕረጉ ወትወርስዎ ለይእቲ ምድር ዘእሁበክሙ ክሕድክሙ ቃለ እግዚአብሔር አምላክክሙ ወኢአመንክምዎ ወኢሰማዕክሙ ቃሎ።

Deut. 9:24 ወኮንክሙ ከሐድያነ እግዚአብሔር እምይእቲ ዕለት እንተ ተአምረ ለክሙ።

Deut. 9:25 ወሰአልኩ ለክሙ ቅድመ እግዚአብሔር አርብዓ ዕለተ ወአርብዓ ሌሊተ በከመ ሰአልኩ ቀዲሙ እስመ ይቤ እግዚአብሔር ከመ ያጥፍእክሙ።

Deut. 9:26 ወጸለይኩ ኅበ እግዚአብሔር ወእቤ እግዚአ ንጉሦሙ ለአማልክት ኢትስርዎሙ ለሕዝብከ ወለመክፈልትከ ዘቤዘውከ በኅይልከ ዐቢይ ዘአውፃእከ እምግብጽ በዐቢይ ኅይልከ ወበእዴከ ጽንዕት ወበመዝራዕትከ ልዑል።

Deut. 9:27 ተዘከር አብርሃምሃ ወይስሐቅሃ ወያዕቆብሃ አግብርቲከ እለ መሐልከ ሎሙ በርእስከ ወኢትነጽር እከዮሙ ለእሉ ሕዝብ ወአበሳሆሙ ወጌጋዮሙ።

Deut. 9:28 ከመ ኢይበሉ እለ ይነበሩ ውስተ ምድር እለ እምኅቤሆሙ አውፃእከነ እስመ ስእነ እግዚአብሔር አብአቶሙ ውስተ ምድር እንተ ይቤሎሙ ወእስመ ይጸልአሙ አውፅአሙ ከመ ይቅትሎሙ በገዳም።

Deut. 9:29 ወእሉሰ ሕዝብከ እሙንቱ ወርስትከ እለ አውፃእከ እምግብጽ በዐቢይ ኅይልከ ወበጽኑዕ ወልዑል መዝራዕትከ።

Deut. 10:1 ወይቤለኒ እግዚአብሔር በውእቱ መዋዕል ቀር ለከ ክልኤ ጽላተ ዘእብን ከመ እለ ቀዲሙ ወዕረግ ኅቤየ ውስተ ደብር ወግበር ታቦተ እምዕዕ።

Deut. 10:2 ወእጽሕፍ ውስተ ውእቶን ጽላት ኩሎ ቃለ ዘሀለወ ውስተ እልክቱ ጽላት እለ ቀዲሙ ቀጥቀጥከ ወደዮን ውስተ ታቦት።

Deut. 10:3 ወገበርኩ ታቦተ እምዕዕ ዘኢይነቅዝ ወወቀርኩ ክልኤ ጽላተ ዘእብን ከመ እለ ቀዲሙ ወዐረጉ ውስተ ደብር ወውስተ እዴየ ውእቶን ክልኤሆን ጽላት።

Deut. 10:4 ወጸሐፈ ውስተ ውእቶን ጽላት በከመ ውእቶን ጽላት ዘቀዲሙ ዐሥሩ ቃላተ ዘነገረነ እግዚአብሔር በደብረ ሲና በማእከለ እሳት።

Deut. 10:5 ወወደይክዎን ውስተ ታቦት ለውእቶን ጽላት ዘገበርኩ ወነበራ ህየ በከመ አዘዘኒ እግዚአብሔር።

Deut. 10:6 ወግዕዙ ደቂቀ እስራኤል እምቤሮሱ ዘደቂቀ ኢያቅም ዘማሳቤ ወበህየ ሞተ አሮን ወተቀብረ በህየ ወተሠይመ በህየ አልዓዛር ወልዱ ካህን ህየንቴሁ።

Deut. 10:7 ወእምህየ ግዕዙ ውስተ ገድገድ ወእምገድገድ ውስተ ኤጤቦታ ምድር ዘአንቅዕተ ማይ።

Deut. 10:8 ወበውእቱ መዋዕል ፈለጦሙ እግዚአብሔር ለነገደ ሌዊ ከመ ይጹሩ ታቦተ ሕጉ ለእግዚአብሔር ወከመ ይቁሙ ቅድመ እግዚአብሔር ወይግበሩ ወይጸልዩ በስመ ዚአሁ እስከ ዛቲ ዕለት።

Deut. 10:9 ወበበይነ ዝንቱ አልቦሙ ለሌዋውያን ክፍል ወርስት ምስለ አኅዊሆሙ እስመ እግዚአብሔር ውእቱ ክፍሎሙ በከመ ይቤሎሙ።

Deut. 10:10 ወአንሰ ቆምኩ ውስተ ደብር አርብዓ መዓልተ ወአርብዓ ሌሊተ ወሰምዐኒ እግዚአብሔር በውእቱ መዋዕል ወኅደገክሙ እግዚአብሔር ወኢያጥፍአክሙ።

Deut. 10:11 ወይቤለኒ እግዚአብሔር ሑር ወንግር ቅድሜሆሙ ለእሉ ሕዝብ ይባኡ ወይትዋረስዎ ለምድረ ዘመሐልኩ ለአበዊሆሙ ከመ አህቦሙ።

Deut. 10:12 ወይእዚኒ እስራኤል ምንተ ይፈቅድ እግዚአብሔር እምነቤክ እንበለ ከመ ትፍርህ ወትሑር በኩሉ ፍናዊሁ ወከመ ታፍቅሮ ወታምልኮ በኩሉ ልብክ ወበኩሉ ነፍስክ ወትዕቀብ ትእዛዛ ወኩነኔሁ ኩሎ ዘኣነ እኤዝዘክ ዮም ከመ ሠናይ ይኩንክ።

Deut. 10:13 ወናሁ ለእግዚአብሔር አምላክክ ሰማይ ወሰማየ ሰማያት ወምድር ወኩሉ ዘውስቴታ።

Deut. 10:14 ወዳእሙ አበዊክሙ አብደረ ያፍቅሮሙ ውኅረየ ዘርዖሙ እምድኅሬሆሙ ኪያክሙ እምኩሉ አሕዛብ እስከ ዛቲ ዕለት።

Deut. 10:15 ወግዝሩ እከዮ ለልብክሙ ወኢታግዝፉ ክሳደክሙ እንከ እስመ እግዚአብሔር አምላክክሙ ውእቱ።

Deut. 10:16 አምላክ አማልክት ወእግዚአ ኢጋእዝት ውእቱ እግዚአብሔር ዐቢይ ወጽኑዕ ወግሩም ዘኢያደሉ ለገጽ ወኢይነሥእ ሕልያነ።

Deut. 10:17 ወይገብር ፍትሐ ለግደር ወለዕንላ ማውታ ወለእቤር ወያፈቅሮ ለግደር ወይሁቦ ሲሳዮ ወዐራዞ።

Deut. 10:18 ወአፍቅርዎ ለግደር እስመ አንትሙኒ ግደራነ ኮንክሙ በምድረ ግብጽ።

Deut. 10:19 ለእግዚአብሔር አምላክክ ፍርህ ወሎቱ ለባሕቲቱ አምልኮ ወሎቱ ትልዎ ወበስመ ዚአሁ መሐል።

Deut. 10:20 እስመ ውእቱ ትምክሕትክሙ ወውእቱ አምላክክ ዘገብረ ለከ ዐቢያተ ወእላንተ ክቡራተ ዘርእያ አዕይንቲክ።

Deut. 10:21 በሰብዓ ነፍስ ወረዱ አበዊክ ውስተ ግብጽ ወይእዚሰ ገብረክ እግዚአብሔር አምላክክ ከመ ከዋክብተ ሰማይ ብዝሃ።

Deut. 11:1 ወአፍቅሮ ለእግዚአብሔር አምላክክ ወዕቀብ ሕጎ ወኩነኔሁ ወትእዛዛ ወፍትሐ በኩሉ መዋዕለ ሕይወትክ።

Deut. 11:2 ወተአምሩ ዮም ከመ ኣኮ ደቂቅክሙ ዘርእዩ ወእእመሩ ተግሣጾ ለእግዚአብሔር አምላክክሙ ወዕበያቲሁ ወእድ ጽንዕተ ወመዝራዕተ ልዑሉ።

Deut. 11:3 ወተአምራሁ ወመድምሞ ወኩሉ ዘገብረ በማእከለ ግብጽ ወበፈርዖን ንጉሠ ግብጽ ወበኩሉ ምድሩ።

Deut. 11:4 ወኩሉ ዘገብረ በኅይሎሙ ለግብጽ ወበሰረገላቲሆሙ ወበአፍራሲሆሙ ዘከመ ከደኖሙ ማየ ባሕረ ኤርትራ ላዕለ ገጽሙ እንዘ ይዴግኩክሙ እሙንቱ እምድኅሬክሙ ወአጥፍአሙ እግዚአብሔር አምላክክሙ እስከ ዛቲ ዕለት።

Deut. 11:5 ወኩሉ ዘገብረ ለክሙ በገዳም እስከ በጻሕክሙ ውስተ ዛቲ መካን።

Deut. 11:6 ወኩሉ ዘገብረ በዳታን ወበአቤሮን ደቂቀ ኤልያብ ወልደ ሮቤል እንተ ፈትሐት ምድር አፉሃ ወውኅጠቶሙ ወለአብያቲሆሙ ወለደባትሪሆሙ ወለኩሉ ንዋያቲሆሙ ዘምስሌሆሙ እማእከሎሙ ለኩሉ እስራኤል።

Deut. 11:7 እስመ አዕይንቲክሙ ርእያ ኩሉ ግብረ ዐቢያተ ዘገብረ እግዚአብሔር።

Deut. 11:8 ወዕቀቡ ኩሉ ትእዛዛ ዘኣነ እኤዝዘክሙ ዮም ከመ ትሕየዉ ወትትባዝኑ ወትባኡ ትትዋረስዋ ለምድር እንተ ላቲ ተዐድዉ ዮርዳኖስ ከመ ትትዋረስዋ በህየ።

Deut. 11:9 ወከመ ይኑህ መዋዕሊክሙ በዲበ ምድር ዘመሐለ እግዚአብሔር ለአበዊክሙ ከመ የሀበሙ ወለዘርዖሙ እምድኅሬሆሙ ምድረ እንተ ታውሕዝ ሐሊበ ወመዓረ።

Deut. 11:10 ወከመ ዝ ይእቲ ምድር እንተ ትበውእ ህየ ትትዋረሳ አኮ ከመ ምድረ ግብጽ ይእቲ እንተ እምኔሃ ወግእከ ዘሰበ ዘይዘርዐ ዘርዐ ይሰቅዩ በእገሪሆሙ ከመ ዐጸደ ሐምል።

Deut. 11:11 ወምድርሰ እንተ ህየ ትበውእ ከመ ትትዋረሳ ምድር ይእቲ እንተ ባቲ አድባር ወአምዳር ወእምዝናመ ሰማይ ትሰቀይ ማየ።

Deut. 11:12 ምድር እንተ ዘልፈ ይሔውጻ እግዚአብሔር አምላክክ ወአዕይንቲሁ ለእግዚአብሔር አምላክክ ላዕሌሃ እምርእስ ዓመት እስከ ማኅለቅተ ዓመት።

Deut. 11:13 ወለእመስ ሰሚዐ ሰማዕክ ኩሉ ትእዛዛ ዘኣነ እኤዝዘክ ዮም ከመ ታፍቅር ለእግዚአብሔር አምላክክ ወታምልኮ በኩሉ ልብክ ወበኩሉ ነፍስክ ይሁብ ዝኖመ በበ መዋዕሊሁ ላዕለ ምድርክሙ ዘነግህኒ ወዘሠርክኒ።

Deut. 11:14 ወአስተጋቢአክ እክለክ ወወይንክ ወቅብዐክ ይሁብ ሣዕረ ውስተ ገዳምክ ለእንስሳክ ወተበልዕ ወትጸግብ።

Deut. 11:15 ወዑቅ ባሕቱ ኢታሥብሑ ልበክሙ ወኢትከሐዱ ወኢትሑሩ ወኢታምልኩ ባዕዳነ አማልክተ ወኢትስግዱ ሉሙ።

Deut. 11:16 ወይትመዐዕ እግዚአብሔር መዓተ ላዕሌክሙ ወየዐጽዋ ለሰማይ ወኢይመጽእ ዝናመ ወምድርኒ ኢትሁብ ፍሬሃ ወትጠፍኡ ፍጡነ እምድር ቡርክት ዘመሀበክሙ እግዚአብሔር።

Deut. 11:17 ወዕቀብዎ ለዝንቱ ነገር ውስተ ልብክሙ ወውስተ ነፍስክሙ ወረስይዎ ተአምረ ውስተ እዴክሙ ወይኩን ዘኢይትሐወስ ቅድመ አዕይንቲክሙ።

Deut. 11:18 ወመሐርዎሙ ለደቂቅክሙ ከመ ይትናገሩ ቦቱ ለእመ ነበሩ ውስተ ቤት ወለእመኒ ሑሩ ውስተ ፍኖት ወሶበኒ ትስክብ ወሶበኒ ትትነሣእ።

Deut. 11:19 ወጸሐፍዎ ውስተ መርፈቀ ጥጎተ ቤትክሙ ከመ ይብዛህ መዋዕሊክሙ ወመዋዕለ ውሉድክሙ ውስተ ምድር ዘመሐለ እግዚአብሔር ለአበቂክሙ ከመ የሀበሙ በአምጣነ መዋዕለ ሰማይ ውስተ ምድር።

Deut. 11:20 ወለእመ ሰሚዐ ሰማዕክሙ ኩሎ ትእዛዘ ዘኣነ እኤዝዘክሙ ዮም ከመ ትግበሩ ወታፍቅርዎ ለእግዚአብሔር አምላክክሙ ወከመ ትሑሩ በኩሉ ፍናዊሁ ወከመ ትትልውዎ ያወፅእሙ እግዚአብሔር ለኩሉ አሕዛብ እምቅድመ ገጽክሙ።

Deut. 11:21 ወትትዋረስዎሙ ለአሕዛብ ዐበይት እለ ይጸንዑ ፈድፋደ እምኔክሙ።

Deut. 11:22 ወኩሉ መካን ጎበ ኬደ መከየደ እገሪክሙ ለክሙ ውእቱ እምገዳም ወእምኣንጢሊባኖን ወእምፈለግ ዐቢይ ፈለገ ኤፍራጥስ እስከ ባሕር እንተ መንገለ ዐረብ ይከውን ደወልክሙ።

Deut. 11:23 ወአልቦ መኑሂ ዘይትቃወም ቅድመ ገጽክሙ ወይወዲ እግዚአብሔር ፍርሀተክሙ ወርዕደተክሙ ላዕለ ኩሉ ገጸ ምድር እንተ ዐረግሙ ላዕሌሃ በከመ ይቤለክሙ እግዚአብሔር።

Deut. 11:24 ወናሁ አነ ዮም አቀውም ቅድሜክሙ በረከተ ወመርገሙ።

Deut. 11:25 በረከትሰ ለእመ ሰማዕክሙ ትእዛዘ ለእግዚአብሔር አምላክክሙ ዘኣነ እኤዝዘክሙ ዮም።

Deut. 11:26 ወመርገምሰ ለእመ ኢሰማዕክሙ ኩሎ ትእዛዘ ለእግዚአብሔር አምላክክሙ ዘኣነ እኤዝዘክሙ ዮም ወጎደግምዋ ለፍኖት ዘኣነ እኤዝዘክሙ ዮም ወሐርክሙ ወአምለክሙ ባዕዳነ አማልክተ ዘኢተአምሩ።

Deut. 11:27 ወሶበ አብኣክ እግዚአብሔር አምላክክ ውስተ ምድር እንተ ላቲ ተዐዱ ዮርዳኖስ ከመ ትትወረሳ በህየ ታገብእ በረከተ ላዕለ ደብረ ገሪዛን ወመርገሙ ላዕለ ደብረ ጌባል።

Deut. 11:28 ዘሀለዉ ማዕዶተ ዮርዳኖስ ድጎረ ፍኖት ዛ መንገለ ዐረብ ፀሓይ በምድረ ከነዓን እለ ሀለዉ ውስተ ዐረባ መኣጋዘ ጎልጎል ቅሩበ ዕፀት ነዋህ።

Deut. 11:29 ወናሁ ተዐድውዎ ለዮርዳኖስ አንትሙ ከመ ትባኡ ትረስዋ ለምድር ዘይሁበክሙ እግዚአብሔር አምላክክሙ መክፈልተክሙ በኩሉ መዋዕል ወትነብሩ ውስቲታ።

Deut. 11:30 ወዕቀቡ ከመ ትግበሩ ኩሎ ትእዛዘ ወፍትሐ ዘኣነ እሁበክሙ ቅድሜክሙ ዮም።

Deut. 12:1 ወዝንቱ ውእቱ ትእዛዘ ወፍትሐ ዘተዐቅቡ ከመ ትግበሩ በምድር ዘይሁበክሙ እግዚአብሔር አምላክክሙ መክፈልተክሙ በኩሉ መዋዕል ዘተሐይዉ አንትሙ ላዕለ ምድር።

Deut. 12:2 ወደምስሶ ደምስሶዎ ለኩሉ መካን ዘውስቱቱ አምለኩ አማልክቲሆሙ አሕዛብ ዘአንትሙ ትወርስዎሙ በዲበ አድባር ነዋህት ወአውግር ወበታሕተ አእዋም ዘቦቱ ቈጽል።

Deut. 12:3 ወንሥቱ ምሥዋዓቲሆሙ ወቀጥቅጡ ምስላቲሆሙ ወግዝሙ አእዋማቲሆሙ ወአውዕዩ በእሳት ግልፎ አማልክቲሆሙ ወደምስሶ አስማቲሆሙ እምውእቱ መካን።

Deut. 12:4 ወኢትገብሩ ከመ ዝ ለእግዚአብሔር አምላክክሙ በአሐቲ እምአህጉሪክሙ ዘእንበለ ውስተ መካን ዘጎረየ እግዚአብሔር ከመ ይሰመይ ስሙ በህየ።

Deut. 12:5 ወትወስዱ መሥዋዕተክሙ ወቅርባክሙ ወቀዳምያቲክሙ ወብፅዐቲክሙ ወዘበፈቃድክሙ ወዘዐሥራቲክሙ ወበኩረ አልሕምቲክሙ ወዘአባግዒክሙ።

Deut. 12:6 ወብልዑ በህየ በቅድመ እግዚአብሔር አምላክክሙ ወተፈሥሑ በኩሉ ዘውስቱቱ ወደይክሙ እዴክሙ አንትሙ ወቤትክሙኒ እስመ ባረከክሙ እግዚአብሔር አምላክክሙ።

Deut. 12:7 ወኢትግበሩ ኩሎ ዘንሕነ ንጉብር ዮም በዝየ አሐዱ አሐዱ እምኔክሙ ዘአደም በቅድሜሁ።

Deut. 12:8 እስመ ኢበጻሕክሙ እስከ ይእዜ ውስተ ምዕራፍክሙ ወውስተ ርስትክሙ ዘይሁበክሙ እግዚአብሔር አምላክክሙ።

Deut. 12:9 ወዕድዉ ዮርዳኖስ ወንበሩ ውስተ ምድር ዘያወርስክሙ እግዚአብሔር አምላክክሙ ወያዐርፈክሙ እምኩሉ ፀርክሙ እለ ዐደውክሙ ወትነብሩ ተአሚነክሙ።

Deut. 12:10 ወይኩን ዝኩቱ መካን ዘኅርየ እግዚአብሔር ኣምላክኩም ከመ ይሰመይ ስሙ በህየ ወትወስዱ ኩሎ ዘኣነ እኤዝዘኩም ዮም መሥዋዕተኩም ወቅርባክኩም ወዐሥራተኩም ወቀዳምያተ እደዊክኩም ወሀብተኩም ኅሩየ ወኩሎ መባእዳኩም ወኩሎ ዘበፃዕኩም ለኣምላክኩም።

Deut. 12:11 ወተፈሥሑ ቅድመ እግዚአብሔር ኣምላክኩም ኣንትሙ ወደቂቅኩም ወአዋልዲኩም ወአግብርቲኩም ወአእማቲኩም ወሌዋውያን እለ ውስተ ኣንቀጽኩም እስመ አልቦሙ ክፍል ወርስት ምስሌኩም።

Deut. 12:12 ወዑቅ ርእሰክ ወኢትግበር መሥዋዕተክ በኩሎ መካን በኅበ ዘርኢክ ዘእንበለ ውስተ መካን ዘኅርየ እግዚአብሔር ኣምላክክ በውስተ ኣሓዱ እምሕዝብክ ህየ ትገብር ኩሎ መሥዋዕተክ ወኩሎ ዘኣነ እኤዝዘክ ዮም።

Deut. 12:13 ወባሕቱ በኩሎ መካን ዘወሀበክ ትጥባሕ በህየ ወትበልዕ ሥጋ በከመ በረከቱ ለእግዚአብሔር እግዚአብሔር ዘወሀበክ በኩሎ ኣህጉር ዘርኩስኒ ወዘንጹሕኒ ኅቡረ ብልዕዎ ከመ ወይጠል አው ከመ ህየል።

Deut. 12:14 ወባሕቱ ደሞ ኢትብልዑ ውስተ ምድር ከዐውዎ ከመ ማይ።

Deut. 12:15 ወኢትክል በሊዖቶ በኩሎ ኣህጉሪክ በዐሥራተ ወይንክ ወእክልክ ወቅብዕክ ወበኩረ አልሕምቲክ ወዘአባግዲክ ወኩሎ ብዕዕቲክ ዘበፃዕክ ወዘበፈቃድክ ወቀዳምያተ እደዊክ።

Deut. 12:16 በቅድመ እግዚአብሔር ኣምላክክ ብላዕ በውስተ መካን ዘኅርየ እግዚአብሔር ኣምላክክ ኣንተ ወደቂቅክ ወወለትክ ወገብርክ ወአመትክ ወግዩር ዘውስተ ሀገርክ ወትትፌሣኡ በቅድመ እግዚአብሔር ኣምላክክ በኩሎ ዘወደይክ ውስቴቱ እደክ።

Deut. 12:17 ወዑቅ ርእሰክ ኢትኅድኅ ለሌዋዊ በኩሎ መዋዕል ዘሕያው ኣንተ ላዕለ ምድር።

Deut. 12:18 ወለእመኒ አርሕበ ለክ እግዚአብሔር ደወለክ በከመ ይቤለክ ወትቤ እበልዕ ሥጋ እምኩሎ ዘፈተወት ነፍስክ ብላዕ።

Deut. 12:19 ወለእመሰ ርሑቅ ውእቱ መካን ኅበ ኅረየ እግዚአብሔር ኣምላክክ ከመ ይሰመይ ስሙ በህየ ትጠብሕ እምኩሎ አልሕምቲክ ወአባግዲክ እምዘወሀበክ እግዚአብሔር ኣምላክክ በከመ ኣዘዝኩክ ወብላዕ በሀገርክ ዘፈተወት ነፍስክ።

Deut. 12:20 በከመ ትበልዑ ወይጠል አው ኅየለ ከማሁ ብልዑ ዘርኩስኒ ወዘንጹሕኒ።

Deut. 12:21 ወተዐቀብ ጥቀ ከመ ኢትብላዕ ደመ እስመ ደሙ ነፍሱ ውእቱ ወኢይበልዑ ነፍሱ ምስለ ሥጋ ኣላ ውስተ ምድር ከዐውዎ ከመ ማይ።

Deut. 12:22 ወኢትብልዖ ከመ ሠናይ ይኩንክ ወለውሉድከኒ እምድኅሬክ ወለእመ ገበርክ ዘሠናይ ወዘአዳም ቅድመ እግዚአብሔር ኣምላክክ።

Deut. 12:23 ወባሕቱ ዘረሰይክ ቅዱስ ወዘበፃዕክ ንሣእ ወሑር ውስተ መካን ኅበ ኅርየ እግዚአብሔር ኣምላክክ ከመ ይሰመይ ስሙ በህየ።

Deut. 12:24 ወትገብር ሥጋሁ መሥዋዕተ ወትወዲ ላዕለ ምሥዋዕ ወደሞስ ትክዑ ኅበ መንበረ ምሥዋዕ ዘእግዚአብሔር ኣምላክክ ወብላዕ እምነ ሥጋሁ።

Deut. 12:25 ወዕቀብ ወስማዕ ኩሎ ቃለ ዘኣነ እኤዝዘክ ዮም ከመ ሠናይ ይኩንክ ወለውሉድክ ለዓለም ለእመ ገበርክ ዘሠናይ ወዘአዳም ቅድመ እግዚአብሔር ኣምላክክ።

Deut. 12:26 ወለእመኒ ኣጥፍኦሙ እግዚአብሔር ኣምላክክ ለኣሕዛብ ዘኣንተ ትበውእ ህየ ከመ ትትዋረሶሙ እምቅድመ ገጽክ ወትነብር ውስተ ምድሮሙ ዑቅ ርእሰክ።

Deut. 12:27 ወኢትፍቅድ ተሊዖቶሙ እምድኅረ ተሰረዉ እምቅድመ ገጽክ ወኢትፍቅድ ኣማልክቲሆሙ ወኢትበል ከመ ዘይገብሩ ኣሕዛብ ለኣማልክቲሆሙ እግበር ኣነኒ።

Deut. 12:28 ወኢትግበር ከማሁ ለእግዚአብሔር ኣምላክክ እስመ ጸልኦ እግዚአብሔር ርኩሰ ዘይገብሩ ኣሕዛብ ለኣማልክቲሆሙ እስመ ደቂቆሙ ወአዋልዲሆሙ ያውዕዩ በእሳት ለኣማልክቲሆሙ።

Deut. 12:29 ወኩሎ ቃለ ዘኣነ እኤዝዘክ ዮም ኪያሁ ዕቀብ ለገቢር ኢትወስክ ላዕሌሁ ወኢታንኪ እምኒሁ።

Deut. 13:1 ወለእመኒ ተንሥኦ እምኒክ ነቢይ አው ሐላሜ ሕልም ወገብረ ተኣምረ አው መድምመ ወበጽሐ ተኣምሪሁ አው መድምመ ዘይቤለክ እንዘ ይብል ነዕ ንሑር ወናምልክ ኣማልክተ ባዕድ ዘኢታኣምሩ ኢትስምዕዎ ቃሎ ለውእቱ ነቢይ አው ለውእቱ ሐላሜ ሕልም።

Deut. 13:2 እስመ ያሜክረኩም እግዚአብሔር ኣምላክኩም ከመ ይርኣይ ለእመ ታፈቅርዎ እምኩሎ ልብኩም ወእምኩሎ ነፍስኩም።

Deut. 13:3 ወትልውዎ ለእግዚአብሔር ኣምላክኩም ወኪያሁ ፍርሁ ወትእዛዞ ዕቀቡ ወቃሎ ስምዑ ወኅቢሁ ተማሕፀኑ።

Deut. 13:4 ወዝክቱስ ነቢይ አው ሐላሚ ሕልም ለይሙት እስመ ነገረከ በዘያስሕተክ እምእግዚአብሔር አምላክክ ዘአውፅአክ እምድረ ግብጽ ወቤዘወክ እምቅኔት።

Deut. 13:5 እስመ ፈቀደ ያጎድገ ፍኖተ ዘአዘዘክ እግዚአብሔር አምላክክ ከመ ትሑር ባቲ ወታሰስል ወታማስን እኩየ እምኔክ።

Deut. 13:6 ወለእመኒ አስተበቅሶክ እኩክ ዘእምአቡክ አው ዘእምእምክ አው ወልድክ አው ወለትክ አው ብእሊትክ እንተ ውስተ ሕፅንክ አው ዐርክክ ዘከመ ነፍስክ ወይቤለክ በጽሚት ነዐ ንሑር ወናምልክ ባዕዳን አማልክተ ዘኢታአምር አንተ ወአበዊክ።

Deut. 13:7 እምአማልክተ አሕዛብ እለ ዐውድክሙ ወእለ ቅሩብክሙ አው እለ ርሑቃን እምኔክሙ እምጽጉፈ ምድር እስከ አጽናፈ ምድር ኢትጎበር ምስሌሁ ወኢትስምሮ ወኢትምሐኮ ዐይንክ ወኢትምሐሮ ወኢትጎብእ።

Deut. 13:8 አይድዕ ወንግር በእንቲአሁ ወእደዊክ ይቅድማ ቀቲሎቶ ወእምዝ እደወ ኩሉ ሕዝብ ይወግራሁ በአእባን ወይቅትልዎ።

Deut. 13:9 እስመ ፈቀደ ያርሕቀ እምእግዚአብሔር አምላክክ ዘአውፅአክ እምድረ ግብጽ እምቤተ ቅኔት።

Deut. 13:10 ወኩሉ እስራኤል ሰሚሖ ይፍራህ ወኢይድግም እንከ ገቢረ እኩይ ውስቴትክሙ።

Deut. 13:11 ወለእመኒ ሰማዕክ በውስተ አሐቲ እምአህጉሪክ ዘወሀበክ እግዚአብሔር አምላክክ ከመ ትንበር ህየ እንዘ ይብሉ ወፅኡ ዕደው ኃጥአን እምኔክ።

Deut. 13:12 ወአክሐድዎሙ ለኩሎሙ እለ ይነብሩ ውስተ አህጉሪሆሙ ወይቤልዎሙ ንዑ ንሑር ወናምልክ ባዕዳን አማልክተ ዘኢታአምር ትሴአል ወተሐትት ጥቀ።

Deut. 13:13 ወእምከመ እሙን ኮነ ወጥቶ ነገሩ ከመ ኮነ ርኩስ ውስቴትክሙ ቀቲለ ትቀትል በሐፂን ኩሎሙ እለ ይነብሩ ውስተ ይእቲ ሀገር።

Deut. 13:14 ወረጊመ ትረግም ኩሉ ዘሀለወ ውስቴታ ወኩሉ ንዋያ ታስተጋብእ ማእከለ መርጎባ ወታውዲ በእሳት።

Deut. 13:15 ወሀገራኒ ምስለ ኩሉ ንዋያ ወለኩሉ ሀገር ከማሁ ትገብራ በቅድመ እግዚአብሔር አምላክክ ወአልቦ ዘይነብር ውስቴታ ለዓለም ወኢትነድቅ።

Deut. 13:16 ወኢትግስስ በእዴክ ምንተኒ ዘርጉም እምዘውስቴታ ከመ ይሚጥ እግዚአብሔር መዐቶ ወየሀብክ ምሕረቶ ወይምሐርክ ወያስተባዝኻክ በከመ መሐለ ለአበዊክ።

Deut. 13:17 ለእመ ሰሚዐ ሰማዕክ ቃሎ ወዐቀብክ ኩሉ ትእዛዞ ኩሉ ዘአነ እኤዝዘክ ዮም ወገበርክ ዘሠናይ ወዘአዳም ቅድመ እግዚአብሔር አምላክክ ወልደ ትከውን ሎቱ።

Deut. 14:1 ወኢትትላጻይ ርእሰክ ዲበ ዘሞተ እስመ ሕዝብ ቅዱስ አንተ ለእግዚአብሔር አምላክክ ወኪያክ ጎርየ ከመ ትኩኖ ሕዝበ ለርእሱ እምኩሉ አሕዛብ ዘውስተ ገጸ ምድር።

Deut. 14:2 ወኢትብልዑ ዘንተ ኩሉ ዘንተ ርኩስ ወዝንቱ ውእቱ ዘትበልዑ እምእንስሳ ላሕም ወበግዕ ወጠለ ወሀየል ወወይጠል ወቶራ ወደስክን ወወዕላ ወአሪጋ ወዘራት።

Deut. 14:3 ወኩሉ እንስሳ ዘንፋቅ ሰኩናሁ ወዘንፋቅ ጽፈሪሁ ወክልኤቱ ጽፈሪሁ ወያመስኩዕ ዝንቱ ዘትበልዑ እምእንስሳ።

Deut. 14:4 ወዝንቱ ዘኢትበልዑ እምዘያመስኩዕ ወዘንፋቅ ሰኩናሁ ወዘንፋቅ ጽፈሪሁ ገመል ወዳስጴዳ እስመ ያመስኩዕ ወኢኮነ ንፋቅ ጽፈሪሁ ሰኩናሁሙ ርኩሳን እሙንቱ ለክሙ።

Deut. 14:5 ወኪሮግልዮስኒ ሐራውያ እስመ ንፋቅ ሰኩናሁሙ ወኢያመስኩዕ ርኩሳን እሙንቱ ለክሙ።

Deut. 14:6 ወዝእብኒ እስመ ንፋቅ ሰኩናሁ ወክፋል ጽፈሪሁ ወኢያመስኩዕ ርኩሳን እሙንቱ ለክሙ እምሥጋሆሙ ኢትብልዑ ወበድኖሙ ኢትግስሱ።

Deut. 14:7 ወዝንቱ ውእቱ ዘትበልዑ እምእንስሳ ወዝ ዘትበልዑ ዘእምውስተ ማይ ኩሉ ዘቦቱ ክንፍ ወቅሣር ብልዑ።

Deut. 14:8 ወኩሉ ዘአልቦቱ ክንፍ ወቅሣር ኢትብልዑ ርኩስ ውእቱ ዝንቱ ለክሙ።

Deut. 14:9 ወኩሉ ሶፈ ንጹሐ ብልዑ።

Deut. 14:10 ወዝንቱ ዘኢትበልዑ እምኔሆሙ ንስር ወጊጳ ወኤልያጦን ወግሪጳ ወሆባይ ወዘአምሳሊሁ።

Deut. 14:11 ወቋዕ ወዘአምሳሊሁ።

Deut. 14:12 ወስገኖ ወገላውቃ ወለሮን ወኦርድዮን ወቀቀኖ ወኢብን ወቅጥራቅጥሬን ወጉዛ ወዘአምሳሊሁ።

Deut. 14:13 ወሄጳጳ ወጉን ወአባ ጉንባሕ ወከራድዮን ወዘአምሳሊሁ።

Deut. 14:14 ወጽርፍርፍን ወጽግነት።

- Deut. 14:15 ወእሉ ኩሎም አዕዋፍ ርኩሳን እሙንቱ ለክሙ ወኢትብልዑ እምኔሆሙ።
- Deut. 14:16 እምኩሉ አዕዋፍ ዘንጹሕ ብልዑ።
- Deut. 14:17 ወኩሎ ማውታ ኢትብልዑ ለፈላሲ ዘውስተ ሀገርክሙ አው ለባዕድ ሀብዎም ይብልዑ እስመ ሕዝብ ቅዱስ አንተ ለእግዚአብሔር አምላክክ።
- Deut. 14:18 ወኢታብስል ማሕስዕ በሐሊበ እሙ።
- Deut. 14:19 ዐሥራተ ትዔሥር እምኩሉ እክልክ ዘዘራዕክ ዘታኡቱ እምውስተ ገራውሂክ በበ ዓመቱ።
- Deut. 14:20 ወብልዖ በበ ዓመት በቅድመ እግዚአብሔር አምላክክ በመካን ዘኅረየ እግዚአብሔር አምላክክ ከመ ይሰመይ ስሙ በህየ።
- Deut. 14:21 ወታበውእ ዐሥራቲሁ ለእክልክ ወለወይንክ ወለቅብዕክ ወበኩረ አልሕምቲክ ወአባግዒክ ከመ ትትመሀር ፈሪሆቶ ለእግዚአብሔር አምላክክ በኩሉ መዋዕል።
- Deut. 14:22 ወለእመሰ ርሑቅ ውእቱ እምኔክ ፍኖቱ ወኢትክል ወሲደ እስመ ውእቱ መካን ዘኅረየ እግዚአብሔር አምላክክ ከመ ይሰመይ ስሙ በህየ እስመ ባረከክ እግዚአብሔር አምላክክ ወትሬስዮ ለብሩር።
- Deut. 14:23 ወትነሥእ ብሩሮ በእዴክ ወተሐውር ኅበ መካን ዘኅረየ እግዚአብሔር አምላክክ ወትሁብ ብሩረ ለኩሉ ዘፈተወት ነፍስክ።
- Deut. 14:24 አው ለላሕም አው ለበግዕ አው ለወይን አው ለሜስ አው ለኩሉ ዘፈተወት ነፍስክ ወብላዕ በህየ በቅድመ እግዚአብሔር አምላክክ ወተፈሣሕ አንተ ወቤትክ።
- Deut. 14:25 ወለሌዋዊ ዘውስተ ሀገርክ ኢትኅድኅ እስመ አልቦ ክፍል ወርስት ምስሌክ።
- Deut. 14:26 ወበሣልስ ዓም ታበውእ ኩሎ ዐሥራተ እክልክ ወዘዓመቲሁሰ ታነብር ውስተ ቤትክ ወእምዝ ይመጽእ ምስሌክ ሌዋዊ እስመ አልቦ ክፍል ወርስት ምስሌክ።
- Deut. 14:27 ወግዩር ወዕጓለ ማውታ ወእቤር ዘውስተ ሀገርክ ከመ ይብልዑ ከመ ይባርክ እግዚአብሔር አምላክክ በኩሉ ግብርክ ዘገበርክ።
- Deut. 15:1 ወበሳብዕ ዓም ትገብር ኅድገተ ወከመ ዝ ውእቱ ትእዛዙ ለኅድገት ዘይትኅደግ።
- Deut. 15:2 ኩሎ ንዋየክ ዘይፈድየክ ካልእክ ወእኑክ ኢትትፈደይ እስመ ኅድገተ ተስምየት ለእግዚአብሔር አምላክክ።
- Deut. 15:3 ወዘኅቤ ነኪርሰ ትትፈደይ ኩሎ ዘብክ ኅቤሁ ወዘኅበ እኑክሰ ኅድገተ ትገብር ኩሎ ዘይፈድየክ።
- Deut. 15:4 እስመ አልቦ ነዳይ እምኔክ እስመ ባርኮ ይባርክክ እግዚአብሔር አምላክክ በውስተ ምድር ዘይሁበክ እግዚአብሔር አምላክክ ርስተ ዘትወርስ።
- Deut. 15:5 ወለእመ ሰሚዕ ሰማዕክ ቃለ እግዚአብሔር አምላክክ ወዐቀብክ ወገበርክ ኩሎ ትእዛዞ ዘእነ እኤዝዘክ ዮም እስመ ባረከክ እግዚአብሔር አምላክክ በከመ ይቤለክ።
- Deut. 15:6 ወትሌቅሕ ለባዕዳን አሕዛብ ብዙኃን ወአንተሰ ኢትትሌቃሕ ወትኳንኖሙ ለአሕዛብ ብዙኃን አንተ ወለከሰ ኢይኳንኑክ።
- Deut. 15:7 ወለእመሰ ቦ ዘተፀነሰ እምአኅዊክ በአሐቲ እምአህጉሪክ ዘወሀበክ እግዚአብሔር አምላክክ ወኢታጽንዕ ልበክ ወኢትሚጥ እዴክ እምውሂቦቱ ለእኑክ።
- Deut. 15:8 ወፍታሐ ወአርኑ እዴክ ወሀቦ ለእኑክ እምዘሰአለክ።
- Deut. 15:9 ወዑቅ ርእሰክ ኢይኩን ቃለ ኅጢአት ውስተ ልብክ እንዘ ትብል ቅሩብ ውእቱ ዓመተ ኅድገት ዘሳብዕ ዓም ወኢይሁቦ ወያኣኪ ዐይኖ እኑክ ወይጸርሕ ላዕሌክ ኅበ እግዚአብሔር ወይከውን ኅጢአት ላዕሌክ።
- Deut. 15:10 አላ ውሂበኒ ሀቦ ወለቅሖኒ ለቅሖ መጠነ ሰአለክ ወኢይተክዝ ልብክ እንዘ ትሁቦ እስመ በበይነ ዝንቱ ይባርክክ እግዚአብሔር አምላክክ በኩሉ ምግባሪክ በውስተ ኩሎ ዘወደይክ እዴክ።
- Deut. 15:11 እስመ ኢይትኅጣእ ነዳይ ውስተ ምድርክ ወበበይነ ዝንቱ እኤዝዘክ እነ ዮም ትግበር ዘንተ ነገረ ወእቤለክ ከመ ትፍታሕ ወከመ ታርኑ እዴክ ለእኑክ ነዳይ ወለዘይስእለክሂ ዘቅሩብክ ዘውስተ ምድርክ ሀቦ።
- Deut. 15:12 ወለእመኒ ተሠይጦ ኅቤክ እኑክ ዕብራዊ አው ዕብራዊት ስድስተ ዓመተ ይትቀነይ ለክ ወበሳብዕ ዓም ትፌንዎ አግዒዘክ እምኅቤክ።
- Deut. 15:13 ወአመ ትፌንዎ አግዒዘክ እምኅቤክ ኢትፌንዎ ዕራቆ።
- Deut. 15:14 አላ ስንቀ ታሰንቆ እምአባግዒክ ወእምእክልክ ወእምክደደ ወይንክ በአምጣነ ባረከክ እግዚአብሔር አምላክክ ትሁቦ።
- Deut. 15:15 ወተዘከር ከመ ገብር አንተ በምድረ ግብጽ ወቤዘወክ እግዚአብሔር አምላክክ እምህየ ወበበይነ ዝንቱ እኤዝዘክ እነ ዮም ከመ ትግበር ዘንተ ነገረ።

- Deut. 15:16 ወለእመሰ ይቤለከ ለሊሁ ኢይወፅእ እምነቤከ እስመ አፍቀረከ ወለቤትከኒ እስመ ኅየሶ ነቢር ኅቤከ ትነሥእ መስፌ ወትሠቀኑሮ አንፎ ኅበ ጥኅት በኅበ መድረክ።
- Deut. 15:17 ወይኩንከ ገብረ ለዓለም ወለእመኒ አመትከ ከማሁ ትገብር።
- Deut. 15:18 ወኢይፅዕብከ ፈንዎቶ አግዓዜ እምነቤከ እስመ እምነ ዓመተ ውንየት ተቀንየ ለከ ስድስተ ዓመተ ወይባርከከ እግዚአብሔር አምላክከ በኩሉ ዘገበርከ።
- Deut. 15:19 ወኩሎ በኩረ ዘተወልደ እምአልሕምቲከ ወእምአባግዒከ ተባዕቶ ትቈድስ ለእግዚአብሔር አምላክከ ወኢትቅኒ በኩረ አልሕምቲከ ወኢትቅርፅ በኩረ አባግዒከ።
- Deut. 15:20 በቅድመ እግዚአብሔር አምላክከ ብልዖ በበ ዓመት በውስተ መካን ዘኅረየ እግዚአብሔር አምላክከ አንተ ወካሉ ቤትከ።
- Deut. 15:21 ወለእመሰ ቡቱ ነውር እመኒ ዕዉር ውእቱ አው ሐንካስ አው እምዘኮነ ነውረ እኩይ ላዕሌሁ ኢትሠዖ ለእግዚአብሔር አምላክከ።
- Deut. 15:22 በሀገርከ ብልዖ ርኩስኒ ወንጹሕኒ ኅቡረ ይብልዕዎ ከመ ወይጠል አው ከመ ሀየል።
- Deut. 15:23 ወዳእሙ ደሞ ኢትብልዑ ውስተ ምድር ከመ ማይ።
- Deut. 16:1 ወዕቀብ ወርኅ ኔሳን ወግበር ፋሲካሁ ለእግዚአብሔር አምላክከ እስመ በወርኅ ኔሳን ወፃእከ እምብሔረ ግብጽ ሌሊተ።
- Deut. 16:2 ወትጠብሕ ፋሲካሁ ለእግዚአብሔር አምላክከ አባግዐ ወአልሕምተ በውስተ መካን ዘኅረየ እግዚአብሔር ከመ ይሰመይ ስሙ በህየ።
- Deut. 16:3 ወኢትብላዕ ምስሌሁ ብሔኦ ሰቡዐ መዋዕለ ናእተ ብላዕ ምስሌሁ ኅብስተ ሕማም እስመ በጉጉኦ ወፃእከ እምግብጽ ከመ ትዘከር ዕለተ ፀኣትከ እምድረ ግብጽ በኩሉ መዋዕለ ሕይወትከ።
- Deut. 16:4 ወኢያስተርኢ ብሔኦ በኩሉ ደወልከ ሰቡዐ ዕለተ ወኢይቢት እምውእቱ ሥጋ ዘጠባሕከ ሠርከ በቀዳሚት ዕለት ለነግህ።
- Deut. 16:5 ወኢትክል ጠቢሖቶ ለፋሲካ በውስተ አሐቲ እምአህጉሪከ ዘወሀበከ እግዚአብሔር አምላክከ ከመ ይሰመይ ስሙ በህየ።
- Deut. 16:6 ወበህየ ትጠብሕ ፋሲካ ሠርከ ጊዜ ተዐርብ ፀሓይ እስመ በውእቱ ጊዜ ወፃእከ እምድረ ግብጽ።
- Deut. 16:7 ወታብስል ወትጠብሕ ወትበልዕ በውእቱ መካን ዘኅረየ እግዚአብሔር አምላክከ ወትገብእ በነግህ ወተኦቱ ውስተ ቤትከ።
- Deut. 16:8 ሰዱሰ መዋዕለ ብላዕ ናእተ ወሳብዕትሰ ዕለት እንተ አስተዋፅኦ ይእቲ ዘበዓሉ ለእግዚአብሔር አምላክከ ወኢትግበር ባቲ ኩሎ ግብረ ዘእንበለ ዘይትገበር ለነፍስ።
- Deut. 16:9 ወይትኃለቁ ለከ ሰብዐ ሰናብተ እምዘአጎዝከ ትዕፅድ ማእረረከ ወትእጎዝ ትጉልቁ ሰብዐ ሰናብተ።
- Deut. 16:10 ወትገብር በዓለ ሰንበት ለእግዚአብሔር አምላክከ በአምግነ ትክል እዴከ ዘትሁብ ወበአምግነ ባረከከ እግዚአብሔር አምላክከ።
- Deut. 16:11 ወትትፌሣሕ በቅድመ እግዚአብሔር አምላክከ አንተ ወደቂቅከ ወአዋልዲከ ወገብርከ ወአመትከ ወሌዋዊ ዘውስተ ሀገርከ ወግድር ወዕጓለ ማውታ ወእቤር እንተ ሀለወት ኅቤከ ውስተ ውእቱ መካን ዘኅረየ እግዚአብሔር አምላክከ ከመ ይሰመይ ስሙ በህየ።
- Deut. 16:12 ወተዘከር ከመ ገብር አንተ በምድረ ግብጽ ወዕቀብ ወግበር ኩሎ ዘንተ ትእዛዞ።
- Deut. 16:13 ወትገብር ለከ በዓለ መጸለት ሰቡዐ ዕለተ ሶበ አስተጋባእከ እክለከ እምውስተ ዐውድ ወእምውስተ ምክያደ ወይንከ።
- Deut. 16:14 ወተፈሣሕ በበዓልከ ወወልድከኒ ወወለትከኒ ወገብርከኒ ወአመትከኒ ወሌዋዊ ዘውስተ ሀገርከ ወግድር ወዕጓለ ማውታ ወእቤር እንተ ሀለወት ውስተ ሀገርከ።
- Deut. 16:15 ሰቡዐ ዕለተ ትገብር በዓለ ለእግዚአብሔር አምላክከ በውስተ መካን ዘኅረየ እግዚአብሔር አምላክከ በኩሉ ወይንከ ወእክልከ ወበኩሉ ግብረ እደዊከ።
- Deut. 16:16 ወተፈሣሕ ሠለስተ ጊዜያተ በዓመት ወያስተርኢ ኩሎ ተባዕትከ ቅድመ እግዚአብሔር አምላክከ በውስተ መካን ዘኅረየ እግዚአብሔር በበዓለ ናእት ወበበዓለ ሰንበት ወበበዓለ መጸለት ወኢታስተርኢ ቅድመ እግዚአብሔር አምላክከ ዕራቅከ።
- Deut. 16:17 አሐዱ አሐዱ በአምግነ ኅይለ እዴክሙ ወበአምግነ በረከቱ ለእግዚአብሔር አምላክክሙ ዘወሀበክሙ ታመጽኡ።

Deut. 16:18 ወሢሙ ለክሙ ፈታሕተ ወጸሐፍተ መባእ በኩሉ አህጉሪክሙ ዘመሀበክሙ እግዚአብሔር አምላክክሙ በበ ዘመድክሙ በበ ነገድክሙ ወይኩንንዎ ለሕዝብ ኩነኔ ጽድቅ።

Deut. 16:19 ወኢያድልዉ ለገጽ ወኢይንሥኡ ሕልያን እስመ ሕልያን ያወውሮሙ ለጠቢባን ወያሴስሎ ለቃለ ጽድቅ።

Deut. 16:20 ዘይጸድቅኒ በጽድቁ ለይትሉ ከመ ትሕየዉ ወትባኡ ትትዋረሱ ምድረ ዘይሀብክሙ እግዚአብሔር አምላክክሙ።

Deut. 16:21 ወኢትትክል ለከ አመ እምውስተ ኩሉ ዕፅ ዘያመልኩ ኅበ ምሥዋዑ ለእግዚአብሔር አምላክክሙ።

Deut. 16:22 ወኢትግበር ምስለ ዘይጸልኦ እግዚአብሔር አምላክከ በጥቃ ምስዋዑ ለእግዚአብሔር ዘትገብር ለከ ወኢታቅም ለከ ሐውልተ።

Deut. 17:1 ወኢትሁዕ ለእግዚአብሔር አምላክከ ላሕመ አው በግዑ ዘቦቱ ነውር ላዕሌሁ ወኩሉ ነገር እኩይ ርኩስ ውእቱ በኅበ እግዚአብሔር አምላክከ።

Deut. 17:2 ወለእመኒ ተረክቡ በውስተ አሐቲ እምአህጉሪክ ዘመሀበከ እግዚአብሔር አምላክከ ብእሲ አው ብእሲት ዘገብሩ እኩየ በቅድመ እግዚአብሔር አምላክከ እለ ተዐወሩ ሕን።

Deut. 17:3 ወሐሩ ወአምለኩ ባዕዳነ አማልክተ ወሰገዱ ሎሙ ለፀሓይ አው ለወርኅ አው እምውስተ ሠርንቲሃ ለሰማይ ዘኢአዘዘከ እግዚአብሔር አምላክከ ወእምከመ ሰማዕከ ተሐትት ጥቀ።

Deut. 17:4 ወለእመ እሙነ ኮነ ዝ ነገር ርኩስ በውስተ እስራኤል ወታወፅኦ ለውእቱ ብእሲ ወእመኒ ብእሲት ይእቲ ወይውግርዎሙ በእብን ወይቅትልዎሙ።

Deut. 17:5 በክልኤቱ ወሠለስቱ ሰማዕት ይሙቱ እለ ይመውቱ ወኢይሙቱ በአሐዱ ስምዕ።

Deut. 17:6 ወእደዊሆሙ ለውእቶሙ ሰማዕት ይቅድማ ቀቲሎቶሙ ወእምድኅሬሆሙ ዕደወ ኩሉ ሕዝብ ወታወፅኦ እኩየ እምኔክሙ።

Deut. 17:7 ወለእመ ቦ ዘተስእነከ ቃል በውስተ ፍትሕ ዘማእከለ ደም ወደም ወማእከለ ንጹሕ ለአንጽሖ ወማእከለ ላኳ ወላኳ ቃለ ፍትሕ በውስተ አህጉሪክ ትነሣእ ወተዐርግ ውስተ መካን ዘኅረየ እግዚአብሔር አምላክከ ከመ ይሰመይ ስሙ በህየ።

Deut. 17:8 ወተሐውር ኅበ ካህናት ወሌዋውያን ውኅበ መኳንንት እለ ሀለዉ በውእቱ መዋዕል ወትሴአል ወያየድዑከ ፍትሐ።

Deut. 17:9 ወትገብር በከመ ቃል ዘነገሩከ በውእቱ መካን ዘኅረየ እግዚአብሔር አምላክከ ከመ ይሰመይ ስሙ በህየ ወዕቀብ ኩሉ ከመ ትግበር ዘመሀሩከ ሕን።

Deut. 17:10 ወበከመ ፍትሑ ዘነገሩከ ግበር ወኢትትገሐሥ እምቃል ዘነገሩከ ኢ ለየማን ወኢ ለፀጋም።

Deut. 17:11 ወገክቱስ ብእሲ ዘይገብር በትዕቢተ ከመ ኢይትአዘዝ ለካህን ዘይቀውም ወይገብር በስሙ ለእግዚአብሔር አምላክከ አው ለመኩንን ዘሀለወ በውእቱ መዋዕል ለይሙት ውእቱ ብእሲ ወአሰስሎ እኩየ እምእስራኤል።

Deut. 17:12 ወኩሉ ሕዝብ ሰሚዖ ይፍራህ ወኢይድግም እንከ አብሶ።

Deut. 17:13 ወለእመኒ ቦእከ ውስተ ምድር ዘይሀብከ እግዚአብሔር አምላክከ መክፈልተከ ወተወረስካሃ ወነበርከ ውስቲታ ወትቤ እሠይም ሊተ መልኦከ ከመ ኩሉ አሕዛብ እለ ዐውድየ።

Deut. 17:14 ወትሠይም ለከ መልኦከ ዘኅረየ እግዚአብሔር አምላክከ ዘእምአኅዊከ።

Deut. 17:15 ወኢትክል ሠይመ ለከ ብእሴ ነኪረ ዘኢኮነ እኅከ ከመ ኢያብዝኅ ሎቱ አፍራስ ወከመ ኢያብኦ ለሕዝብ ውስተ ግብጽ እስመ እግዚአብሔር ይቤ ኢትድግም እንከ ገቢኦታ ለይእቲ ፍኖት።

Deut. 17:16 ወኢያብዝኅ ሎቱ አንስተ ወኢይሚጥ ልቦ ወኢያብዝኅ ሎቱ ወርቀ ወብሩረ ጥቀ።

Deut. 17:17 ወሶበ ነበረ ውስተ ምክናኑ ለይጽሐፍ ሎቱ ዘንተ ዳግመ ኦሪተ ውስተ መጽሐፍ እምኅበ ካህናት ወሌዋውያን።

Deut. 17:18 ወያንብሮ ኅቤሁ ወያንብብ ቦቱ በኩሉ መዋዕል ሕይወቱ ከመ ይትመሀር ፍኖቶ ለእግዚአብሔር አምላኩ ወይዕቀብ ኩሉ ትእዛዞ ወይግበር ኩነኔሁ።

Deut. 17:19 ከመ ኢያዕቢ ልቦ እምአኅዊሁ ወከመ ኢይኅድግ እምትእዛዙ ለእግዚአብሔር አምላኩ ወኢይትገሐሥ ኢ ለየማን ወኢ ለፀጋም ወከመ ያኑኅ መዋዕል በውስተ ምክናኑ ውእቱ ወውሎዱ ወአኅዊሁ በውስተ ደቂቀ እስራኤል።

Deut. 18:1 ወአልበሙ መክፈልት ለካህናት ወሌዋውያን ወለኩሉ ሕዝበ ሌዊ ምስለ እስራኤል መባኡ ለእግዚአብሔር ክፍሎሙ ወኪያሁ ይሴሰዩ።

Deut. 18:2 ወባሕቱ ክፍል አልበሙ በውስተ አኅዊሆሙ እስመ እግዚአብሔር ውእቱ ክፍሎሙ በከመ ይቤሎሙ።

Deut. 18:3 ወዝንቱ ውእቱ ሕጎሙ ለካህናት ዘእምኅበ ሕዝብ እለ ይጠብሑ ጥብሐ እመኒ ላሕመ ወእመኒ በግዕ ዘይሁብዎ ለካህን መዝራዕተ ወሕልቀ ወቄስጤ።

Deut. 18:4 ወቀዳሜ እክልከ ወቀዳሜ ወይንከ ወቀዳሜ ቅብዕከ ወእምዘቀረፅከ አባግዒከ ትሁቦ።

Deut. 18:5 እስመ ኀረዮ እግዚአብሔር አምላክ እምኩሉ ሕዝብከ ከመ ይቁም ቅድሜሁ ወይትለክኮ ወይባርክ በስመ ዚአሁ ውእቱ ወደቂቁ በኩሉ መዋዕል።

Deut. 18:6 ወለእመ መጽአ ሌዋዊ እምውስተ አህጉሪክሙ ዘእምኩሉ ደቂቀ እስራኤል ዘኅበ ይነብር ውእቱ እስመ ፈተወ በነፍሱ ከመ ይትለክክ በውእቱ መካን ኀበ ኀረዮ እግዚአብሔር አምላክከ።

Deut. 18:7 ወይትቀነይ ለስመ እግዚአብሔር አምላኩ ከመ ኩሉ አኅዊሁ ሌዋውያን እለ ይቀውሙ ህየ ቅድመ እግዚአብሔር።

Deut. 18:8 ይትከፈል መክፈልቶ ወይሴሰይ ዘእንበለ በሢመቱ ዘበሀገሩ።

Deut. 18:9 ወለእመ ቦእከ ውስተ ምድር ዘይሁበከ እግዚአብሔር አምላክከ ኢትትመሀር ገቢረ ርኩሶሙ ለውእቶሙ አሕዛብ።

Deut. 18:10 ወኢይትረከብ በውስቴትክሙ ዘይሁውዕ ወልዶ አው ወለቶ በእሳት ወዘያስተቀስም መቅሰመ ወዘያስተሰግል ወዘይጤየር ወዘሥራይ ወዘሐረስ ወዘበግውዕ ወዘያንቅህ ምዉተ ወዘያስተሰግል በዖፍ።

Deut. 18:11 እስመ ርኩስ ውእቱ በኀበ እግዚአብሔር ኩሉ ዘይገብሮ ለዝንቱ እስመ በበይነ ዝንቱ ርኩሶሙ ያጠፍአሙ እግዚአብሔር እምኔከ።

Deut. 18:12 ወኩን ፍጹመ ቅድመ እግዚአብሔር አምላክከ እስመ እልክቱ አሕዛብ ዘአንተ ትትዋረሶሙ እሙንቱ ያስተሰግሉ ወያጸምኡ መቅሰመ ወለከስ አኮ ከማሁ።

Deut. 18:13 ነቢየ ወሀበከ እግዚአብሔር አምላክከ እምአኅዊከ ዘከማየ ወያነሥእ ለከ እግዚአብሔር አምላክከ ወሎቱ ስምዕዎ በኩሉ።

Deut. 18:14 ወበኩሉ ዘሰአልክምዎ ለእግዚአብሔር አምላክክሙ በኩራብ አመ ዕለተ ተጋባእክሙ ወትቤሉ ኢንድግም እንከ ሰሚዖተ ቃሉ ለእግዚአብሔር አምላክነ ወዛቲኒ እሳት ዐባይ ኢንርኢያ እንከ ከመ ኢንሙት።

Deut. 18:15 ወይቤለኒ እግዚአብሔር አማን ኩሉ ዘይቤሉ።

Deut. 18:16 ነቢየ አነሥእ ሎሙ እምአኅዊሆሙ ዘከማከ ወአነብር ቃልየ ውስተ አፋሁ ወይነግሮሙ ዘከመ አዘዝክዎ።

Deut. 18:17 ወብእሲ ዘኢይሰምዖ ለውእቱ ነቢይ ኩሉ ዘነገረ በስመ ዚአየ አነ እትቤቀል እምኔሁ።

Deut. 18:18 ወባሕቱ ነቢይ ዘይኤብስ ወይነብብ ቃለ በስምየ ዘኢአዘዝክዎ ይንብብ ወዘነበበሂ በስመ ባዕዳን አማልክት ለይሙት ውእቱ ነቢይ።

Deut. 18:19 ወለእመስ ትብል በልብከ እፎ አአምር ቃለ ዘኢይቤ እግዚአብሔር እምኩሉ ዘነበበ ነቢይ በስመ እግዚአብሔር እምከመ ኢበጽሐ ቃሉ ወኢኮነ በከመ ኢነበበ እግዚአብሔር ለውእቱ ቃል ወበሐስት ነበበ ውእቱ ነቢይ ወኢትስምዕዎ።

Deut. 19:1 ወለእመ አጥፍአሙ እግዚአብሔር አምላክከ ለአሕዛብ ዘይሁበከ ምድሮሙ ወወረስኮሙ ወነበርከ ውስተ ምድሮሙ ወውስተ አህጉሪሆሙ ወውስተ አብያቲሆሙ ሠላሰ አህጉረ ትፈልጥ ለከ በማእከለ ምድርከ ዘወሀበከ እግዚአብሔር አምላክከ።

Deut. 19:2 ወተአምር ለሊከ ፍኖቶን ወትከፍል ደወለ ምድርከ መሥልስተ ዘአስተከፈለከ እግዚአብሔር አምላክከ ወይኩን ህየ ምስካዩ ለኩሉ ቀታሊ።

Deut. 19:3 ወዝንቱ ውእቱ ሕጉ ለቀታሊ እምከመ ሰከየ ህየ ይሕየው ለእመ በኢያእምሮ ቀተሎ ለካልኡ ወለእመ ኢኮነ ጸላኢሁ ቀዲሙ።

Deut. 19:4 ወለእመ ቦ ዘሐረ ምስለ ካልኡ ሐቅለ ይሕጥብ ዕፅ ወወድቀ እምእዴሁ በጉድብ እንዘ ይገዝም ዕፅ ወወድቀ ሐፂኑ እምዕፅ ወወረደ ላዕለ ካልኡ ወቀተሎ ይሰኪ ውእቱ ውስተ አሐቲ እምእላንቱ አህጉር ወየሐዩ።

Deut. 19:5 ከመ ኢይዴግኖ አበ ደም ወይቅትሎ ለቀታሊ እስመ ተቀየሞ በልቡ ወይረከቦ ለእመ ርሕቆ ፍኖት ወይቀትሎ እንዘ ኢኮነ አበሳሁ ለሞት እስመ ኢኮነ ጸላኢሁ ለምዉት ቀዲሙ።

Deut. 19:6 ወበበይነ ዝንቱ አዘዝኩከ አነ ትግበር ዘንተ ነገረ ወእቤለከ ሠላሰ አህጉረ ፍልጥ ለከ።

Deut. 19:7 ወለእመ ኦርሕበ ለከ እግዚአብሔር ደወለከ በከመ መሐለ ለአበዊከ ወወሀበከ ኩሎ ምድረ ዘይቤ እሁቦሙ ለአኅዊከ።

Deut. 19:8 ለእመ ሰማዕከ ከመ ትግበር ዘንተ ኩሎ ትእዛዘ ዘአነ እኤዝዘከ ዮም ከመ ታፍቅሮ ለእግዚአብሔር አምላክከ ወከመ ትሑር በኩሎ ፍናዊሁ በኩሎ መዋዕል ወትዌስከ ለከ ዓዲ ሠላሳ አህጉረ ላዕለ እልክቱ ሠላስ።

Deut. 19:9 ወኢይትከዐው ደም ንጹሕ ውስተ ምድር ዘወሀበከ እግዚአብሔር አምላክከ መክፈልተከ ወኢየሀሉ ውስቴትከ ቀታሌ ነፍስ።

Deut. 19:10 ወለእመሰ ቦ ብእሲ ዘይጸልኦ ለካልኡ ወይጸንሖ ወእምዝ ተንሥኦ ላዕሌሁ ወቀተሎ ወቀተሎ ወሰከየ ውስተ አሐቲ እምእላንቱ አህጉር ይልእኩ ሊቃናተ ሀገሩ ወያመጽእዎ እምህየ ወይሚጥውዎ ኪያሁ ለአበ ደም ወይቀትሎ።

Deut. 19:11 ወዐይንከ ኢትምሐኮ ወታነጽሕ ደመ ንጹሕ እምእስራኤል ወትከውን ሠናይት ላዕሌከ።

Deut. 19:12 ወኢትትኅለፍ ደወለ ቢጽከ ዘሠርዑ አበዊከ በውስተ ርስትከ ዘተወረስከ ዘወሀበከ እግዚአብሔር አምላክከ መክፈልተከ።

Deut. 19:13 ወኢይከውን አሐዱ ሰማዕት ከመ ይኩን ስምዐ ላዕለ ሰብእ በኩሎ ጌጋይ ወበኩሎ አበሳ ዘአበሱ በአፈ ክልኤቱ ወሠለስቱ ሰማዕት የኅልቅ ኩሎ ነገር።

Deut. 19:14 ወለእመ አምጽኡ ሎቱ ለሰብእ ሰማዕተ በዐመፃ ወነበበ ላዕሌሁ ሐሰተ ይቀውሙ እልክቱ ክልኤቱ ዕደው እለ ይትኃሠሡ ቅድመ እግዚአብሔር ወቅድመ ካህናት ወቅድመ መኳንንት እለ ሀለዉ በውእቱ መዋዕል ወየሐትቱ መኳንንት ወይጤይቁ።

Deut. 19:15 ወእልክቱ ክልኤቱ ሰማዕት ወለዝክቱኒ አሐዱ ዐማሂ ዘኮነ ስምዐ በሐሰት ወቆመ ላዕለ ካልኡ ይግበርዎ ዘከመ ፈቀደ ይግበር እኪተ ላዕለ ካልኡ ወታሴስሉ እኩየ እምኔክሙ።

Deut. 19:16 ወባዕድኒ ሰሚዖ ይፍራህ ወኢይድግም እንከ ገቢረ ዘንተ ነገረ እኩየ በውስቴትክሙ።

Deut. 19:17 ወዐይንከ ኢትምሐኮ ነፍስ ህየንተ ነፍስ ወዐይን ህየንተ ዐይን ወሰን ህየንተ ስን ወእድ ህየንተ እድ ወእግር ህየንተ እግር።

Deut. 20:1 ወለእመ ወፃእከ ፀብኦ ላዕለ ፀርከ ወርኢከ አፍራሰ ወመስተጽናነ ወሕዝበ ዘይበዝኅከ ኢትፍራህ እምኔሆሙ እስመ እግዚአብሔር አምላክከ ዘአውፅኦከ እምድረ ግብጽ ምስሌከ ውእቱ።

Deut. 20:2 ወሶበ አኅዝከ ትትቃተል ይምጸእ ካህን ወይንግር ለሕዝብ ወይበሎሙ ስማዕ እስራኤል ናሁ ተሐውሩ አንትሙ ዮም ከመ ትቅትሉ ፀረክሙ ኢይደንግዕክሙ ልብክሙ ወኢትፍርሁ ወኢትመምዑ ወኢትትገሐሡ እምቅድመ ገጸሙ።

Deut. 20:3 እስመ እግዚአብሔር አምላክክሙ የሐውር ፍጽመ ለክሙ ከመ ይቅትል ለክሙ ፀረክሙ ወለክሙሰ ያድኅነክሙ።

Deut. 20:4 ወይብልዎሙ ጸሐፍትኒ ለሕዝብ ለእመ ቦ ብእሲ ዘነደቀ ቤተ ሐዲሰ ወኢገብረ መድቅሐ ቤቱ ለይሑር ወለይግባእ ውስተ ቤቱ ከመ ኢይሙት በውስተ ቀትል ወካልእ ብእሲ ኢይግበር መድቅሐ ቤቱ።

Deut. 20:5 ወለእመ ቦ ብእሲ ዘተከለ ዐጸደ ወይን ወኢተፈሥሐ ቦቱ ለይሑር ወይግባእ ውስተ ቤቱ ከመ ኢይሙት በውስተ ቀትል ወካልእ ብእሲ ኢይትፈሣከ ቦቱ።

Deut. 20:6 ወለእመ ቦ ብእሲ ዘፈኅረ ብእሲተ ወኢነሥኦ ለይሑር ወይግባእ ውስተ ቤቱ ከመ ኢይሙት በውስተ ቀትል ወካልእ ብእሲ ኢይንሥኦ።

Deut. 20:7 ወይድግሙ ብሂሎቶሙ ጸሐፍት ለሕዝብ ለእመ ቦ ብእሲ ፈራህ ለይግባእ ውስተ ቤቱ ከመ ኢያፍርህ ልበ ቢጹ ከማሁ።

Deut. 20:8 ወሶበ አኅለቁ ነጊሮቶሙ ጸሐፍት ለሕዝብ ይሂሙ መላእክተ ሠራዊት እምዐበይተ ሕዝብ።

Deut. 20:9 ወሶበ ትቀርብ ውስተ ሀገር ከመ ትትቃተል ትጹውዎሙ በቃለ ሰላም።

Deut. 20:10 ወለእመ አውሥኡከ በቃለ ሰላም ወአርኅዉ ለከ ይኩኑከ ኩሎ ሕዝብ እለ ተረክቡ ውስቴታ እለ ያገብኡ ለከ ጸባሕተ ወምኩናኒከኒ ይኩኑከ።

Deut. 20:11 ወለእመሰ ኢያውሥኡከ ወገብሩ ጸብኦ ምስሌከ ትነብር ላዕሌሃ ወያገብኦ እግዚአብሔር አምላክከ ውስተ እዴከ።

Deut. 20:12 ወትቀትል ኩሎ ተባዕተ በቀትለ ሐሂን ዘእንበለ አንስት ወንዋይ።

Deut. 20:13 ወኩሎ እንሰሳ ወኩሎ ዘሀለወ ውስተ ሀገር ወኩሎ ጥሪቶሙ ትበረብር ለከ ውብላዕ ኩሎ በርበረ ፀርከ ዘወሀበከ እግዚአብሔር አምላክከ።

Deut. 20:14 ወከመ ዝ ትገብር ለኩሎ ኣህጉረ እለ ጥቀ ርሑቃን እምኒክ ዘኢኮኑ እምኣህጉሪሆሙ ለእሉ ኣሕዛብ ዘይሁበክ እግዚአብሔር ኣምላክክ ምድሮሙ ከመ ትትዋረስ።

Deut. 20:15 ወኢታሕዩ ኩሎ ዘነፍስ ኣላ መርገመ ተረግምዎሙ ለኬጤዎን ወለኣሞሬዎን ወለከናኒዎን ወለፌርዜዎን ወለኤዌዎን ወለኢያቡሴዎን ወለጌርጌሴዎን በከመ ኣዘዘክ እግዚአብሔር ኣምላክክ።

Deut. 20:16 ከመ ኢይምህሩክ ገቢረ ኩሉ ርኩሶሙ ወኩሎ ዘከመ ይገብሩ ለኣማልክቲሆሙ ወትጌግዩ ቅድመ እግዚአብሔር ኣምላክክሙ።

Deut. 20:17 ወለእመ ነበርክ ውስተ ሀገር ብዙኅ መዋዕለ ከመ ትትቃተላ ወከመ ትንሥኣ ኢትግዝም ሶማ ወኢታውርድ ሓፂነ ላዕሌሁ ኣላ እምኒሁ ብላዕ ቦኑ ሰብእ ውእቱ ሶመ ገዳም ከመ ይምጸእ ቅድሜክ ወይባእ ውስተ ቅጽርክ።

Deut. 20:18 ወባሕቱ ዕፀ ዘተኣምር ከመ ኢይፈሪ ኪያሁ ትገዝም ወትመትር ወትነድቅ ሓጽረ ላዕለ ይእቲ ሀገር እንተ ትገብር ጸብኣ ምስሌክ እስከ ታስተጋብኣ።

Deut. 21:1 ወለእመ ተረክበ ቅቱል ውዱቀ ውስተ ገዳም በውስተ ምድር ዘመሀበክ እግዚአብሔር ኣምላክክ ትትወረሳ ወኢያእመሩ ቀታሊሁ ይወፅኡ ሊቃናቲክሙ ወመኳንንቲክሙ ወይሜጥኑ ኣህጉረ ዘወውዱ ለውእቱ ቅቱል።

Deut. 21:2 ወሀገር እንተ ቅርብት ይእቲ መንገሌሁ ለውእቱ ቅቱል ኣእሩጊሃ ለይእቲ ሀገር ያመጽኡ እጐልተ እምኣልሕምት እንተ ኢተቀንየት ወእንተ ኢሰሐበት ኣርዑተ።

Deut. 21:3 ወያወርድዋ ኣእሩጊሃ ለይእቲ ሀገር ለይእቲ እጐልት ውስተ ቈላ መብእስ ዘኢተሐርሰ ወኢተዘርዐ ውስቱቱ ወይመትሩ ሥረዊሃ ለይእቲ እጐልት በውስተ ቈላ።

Deut. 21:4 ወይመጽኡ ካህናት ወሌዋውያን እስመ ኪያሆሙ ኅረየ እግዚአብሔር ይቁሙ ቅድሜሁ ወይባርኩ በስመ ዚኣሁ ወበቃለ ዚኣሆሙ ይቀውም ኩሉ ተስናን ወኩሎ ዘይትኅደግ።

Deut. 21:5 ወኩሎ ኣእሩጊሃ ለይእቲ ሀገር እንተ ቅርብት መንገሌሁ ለውእቱ ቅቱል ወይትኅፀቡ እደዊሆሙ ላዕለ ርእሳ ለይእቲ እጐልት ዘመተሩ ሥረዊሃ በውስተ ቈላ።

Deut. 21:6 ወይነብቡ ወይብሉ እደዊነ ደም ለዝንቱ ወኣዕይንቲነ ኢርእያ።

Deut. 21:7 ወሥረይ ለሕዝብክ እስራኤል እግዚኣ ዘቢዘውካሆሙ እምድረ ግብጽ ከመ ኢይኩን ጌጋየ ነፍስ ላዕለ ሕዝብክ እስራኤል ወይሰሪ ሎሙ በእንተ ውእቱ ነፍስ።

Deut. 21:8 ወኣንተሰ ኣሰስል ጌጋየ ነፍስ እምላዕሌክ ወትከውን ሠናይት ላዕሌክ ለእመ ገበርክ ዘሠናይ ወዘኣዳም ቅድመ እግዚአብሔር ኣምላክክ።

Deut. 21:9 ወለእመኒ ወያእክ ጸብኣ ላዕለ ፀርክ ወኣግብኣሙ እግዚአብሔር ኣምላክክ ውስተ እዴክ ወዚውከ ዪዋሆሙ።

Deut. 21:10 ወርኢክ በውስተ ዪዋ ብእሲተ እንተ ሠናይ ርእየታ ወፈተውካሃ ወነሣእካሃ ለክ ትኩንክ ብእሲተ።

Deut. 21:11 ወታበውኣ ውስተ ጽርሐ ቤትክ ወትላጽያ ርእሳ ወትፀፍራ ወታሴስል ኣልባሲሃ ዘቦቱ ተዚወወት ወታነብራ ውስተ ቤትክ ወትበኪ ለኣቡሃ ወለእማ ሠላሳ መዋዕለ።

Deut. 21:12 ወእምድኅረ ዝንቱ ትበውእ ኅቤሃ ወትነብር ምስሌሃ ወትከውነክ ብእሲተ።

Deut. 21:13 ወእምዝ ለእመ ኢፈቀድካሃ ትፌንዋ ኣግዓዚተ ወሠይጠሰ ኢትሠይጣ በወርቅ ወኢትክሕዳ ከመ ኣውሰብካሃ።

Deut. 21:14 ወለኣመኒ ኣውሰበ ብእሲ ክልኤ ኣንስተ ለኣሐቲ ይጸልኣ ወለኣሐቲ ያፈቅራ ወወለደት ሎቱ ወልደ በኩሮ እንተ ይጸልኣ።

Deut. 21:15 ኣመ ያስተዋርሶሙ ንዋዮ ለደቂቁ ኢይክል ኣዕብዮቶ ለወልዳ ለእንተ ያፈቅራ ወተዐውሮቶ ለወልዳ ለእንተ ይጸልኣ።

Deut. 21:16 ወይሁቦ ምክዕቢተ እምኩሉ ዘተረክበ ሎቱ እስመ ውእቱ ቀዳሜ ውሉዱ ወሎቱ ይፈሲ ዘበኩሩ።

Deut. 21:17 ወለእመ ቦ ዘቦቱ ወልድ ከሓዲ ወዝኅር ወኢይትኤዝዝ ለቃለ ኣቡሁ ወለቃለ እሙ ወይጌሥጽዎ ወኢይሰምዎሙ ይሰድዎ ኅበ ሊቃናተ ሀገሩ ወውስተ ኣንቀጸ ብሔሩ።

Deut. 21:18 ወይበልዎሙ ለሰብኣ ሀገሮሙ ዝንቱ ወልድነ ይክህደነ ወያዐቢ ርእሶ ወኢይሰምዕ ቃለነ ወይሄግር ወይሰክር።

Deut. 21:19 ወይወግርዎ በእብን ሰብአ ሀገሩ ወይቅትልዎ ወታሴስል እኩየ እምኔክሙ ወኩሉ እስራኤል ሰሚዎ ይፍራህ።

Deut. 21:20 ወለእመ ቦ ብእሲ ዘአበሰ ወበጽሐ ጌጋዩ ለኩነኔ ሞት ትሰቅልዎ ዲበ ዕፅ ወትቀትልዎ።

Deut. 21:21 ወኢይቢት ሥጋሁ ዲበ ዕፅ አላ ቀቢረ ቅብርዎ በይእቲ ዕለት እስመ ርጉም ውእቱ በኅበ እግዚአብሔር ዘስቁል ዲበ ዕፅ ወኢታርኩስዎ ለምድር ዘይሁበክሙ እግዚአብሔር አምላክከ ርስተ።

Deut. 22:1 ወለእመ ርኢከ ላሕመ ቢጽከ አው በግዎ ኅበ ተገድፈ በፍኖት ኢትትዐወር አግብእ ሎቱ ለካልእከ ወአወፍዮ።

Deut. 22:2 ወለእመኒ ኢኮነ ቅሩበ ኅቤከ ካልእከ ወለእመኒ ዘኢተአምሮ ታስተጋብእ ወታኦቱ ቤተከ ወታነብር ኅቤከ እስከ አመ የኅሥዮ ካልእከ ወታገብእ ሎቱ።

Deut. 22:3 እመኒ አድጉ ላሕሙ ከመ ዝ ትገብር ወእመኒ ልብሱ ከማሁ ትገብር በእንተ ኩሉ ዘገደፈ ካልእከ ወዘተገድፈ እምኅቤሁ ወረከብካሁ ኢትክል ተዐውሮቶ።

Deut. 22:4 ወለእመ ርኢከ አድገ ቢጽከ አው ላሕሞ እንዘ ውዱቅ ውስተ ፍኖት ኢትትዐወሮሙ ታነሥእ ወታስተላዕል ምስሌሁ።

Deut. 22:5 ወኢትትረሰይ ብእሲት በትርሲተ ብእሲ ወኢይልበስ ብእሲ ልብሰ ብእሲት እስመ ርኩስ ውእቱ በኅበ እግዚአብሔር አምላክከ ኩሉ ዘይገብሮ ለዝገቱ።

Deut. 22:6 ለእመ ረከብከ ዕጋለ ዖፍ ቅድመ ገጽከ በውስተ ፍኖት ወእመኒ በውስተ ኩሉ ዕፅው አው በውስተ ኩሉ ምድር ወእመኒ አፍኅርተ ዘኢይሰርር ወእመኒ አንቆቀሖ ኢትንሣእ እመ ምስለ እጐሊሃ።

Deut. 22:7 ዳእሙ ታሰርራ ወታግዕዛ ለእም ወአፍኅርቲሃ ትነሥእ ለከ ከመ ትኩን ሠናይት ላዕሌከ ወይብዛኅ መዋዕሊከ።

Deut. 22:8 ወለእመ ነደቀ ቤተ ሐዲሰ ትገብር ተድባበ ለናሕስከ ወኢትገብር ቀትለ በውስተ ቤትከ ከመ ኢይደቅ እመ ቦ ዘይወድቅ እምኒሁ።

Deut. 22:9 ወኢትትክል እምኩሉ ኅብር ዐጸደ ወይንከ ከመ ኢትቅስም ፍሬሁ ወዘርዕከኒ ዘትዘርዕ ምስለ ፍሬ ወይንከ።

Deut. 22:10 ወኢትሕርስ በአድግ ወበላሕም ኅብረ ወኢትልበስ ልብሰ ዘተአንመ በፀምር ወበአጌ።

Deut. 22:11 ወትገብር ለከ ዘፈረ ፍቱለ ላዕለ አርባዕቱ መዓዝነ አልባሲከ ዘትለብስ።

Deut. 22:12 ወለእመ ጸልኦ ብእሲ ለብእሲቱ ዘአውሰባ እምድኅረ ነበረ ላዕሌሃ ወአምጽኦ ላቲ ነገረ ምክንያት ወአውፅኦ ላቲ ስመ እኩየ ወይቤ ነሣእክዋ ለዛቲ ብእሲት ወሶበ ቦእኩ ኅቤሃ ኢረከብኩ ድንግልናሃ ይነሥኡ አቡሃ ወእማ ልብሰ ድንግልናሃ ለወለቶሙ ወይሰዱ ኅበ ሊቃናት ኅበ አንቀጽ።

Deut. 22:13 ወይበሎሙ አቡሃ ለይእቲ ወለት ለሊቃናት ዛቲ ወለትየ ወሀብክዎ ለዝገቱ ብእሲ ትኩኖ ብእሲተ ወሶበ ጸልኦ ይእዜ አምጽኦ ላቲ ነገረ ምክንያት ወይቤ ኢረከብኩ ድንግልናሃ ለወለትከ።

Deut. 22:14 ወናሁ ዝገቱ ውእቱ ልብሰ ድንግልናሃ ለወለትየ ወይስፍሕዎ ለውእቱ ልብስ ቅድመ ሊቃናት ዘይእቲ ሀገር።

Deut. 22:15 ወይእኅዝዎ ለውእቱ ብእሲ ሊቃናተ ይእቲ ሀገር ወይጌሥጽዎ ወይነሥእዎ ምእተ ሰቅለ ወይሁብዎ ለአቡሃ ለይእቲ ወለት።

Deut. 22:16 እስመ አውፅኦ ስመ እኩየ ላዕለ ድንግለ እስራኤል ወትከውኖ ሎቱ ብእሲተ ወኢይከውኖ ኅዲጎታ መጠነ ሕያው ውእቱ።

Deut. 22:17 ወለእመስ እሙኅ ኮነ ዝገቱ ነገር ወኢተረክበ ድንግልናሃ ለይእቲ ወለት ያውጽእዎ ኅበ ጥኅተ ቤተ አቡሃ ወይወግርዎ በአእባን ሰብአ ይእቲ ሀገር ወይቅትልዎ።

Deut. 22:18 እስመ ገብረት እበደ በውስተ ደቂቀ እስራኤል ወአዘመወት ቤተ አቡሃ ወአጽኦለት ወታሴስሉ እኩየ እምውስቲትክሙ።

Deut. 22:19 ወለእመ ቦ ዘተረክበ ብእሲ እንዘ ይሰክብ ምስለ ብእሲተ ብእሲ ይቅትልዎሙ ለክልኤሆሙ ለውእቱኒ ብእሲ ዘሰከበ ምስሌሃ ወለይእቲኒ ብእሲት ወታሴስሉ እኩየ እምእስራኤል።

Deut. 22:20 ወለእመ ቦ ወለት ድንግል እንተ ፍኅርት ይእቲ ለብእሲ ወረከባ ካልእ ብእሲ በውስተ ሀገር ወሰከበ ምስሌሃ ለክልኤሆሙ አውፅእዎሙ ኅበ አንቀጽ ለይእቲ ሀገር ወይወግርዎሙ በአእባን።

Deut. 22:21 ወይቅትልዎሙ ለወለትኒ እስመ ኢ ጸርሐት በውስተ ሀገር ወለውእቱኒ ብእሲ እስመ አኅሰራ ለብእሲተ ካልኡ ወአሰሰሉ እኩየ እምውስቲትክሙ።

- Deut. 22:22 ወለእመሰ በገዳም ረከባ ብእሲ ለወለት እንተ ፍኅርት ይእቲ ወተኅየላ ወሰከበ ምስሌሃ ቅትልዎ ለዝክቱ ዘሰከበ ምስሌሃ ለባሕቲቱ።
- Deut. 22:23 ወለወለትሰ አልቦ ዘትሬስይዋ እስመ አልባቲ ጌጋይ በዘትመውት ይእቲ ወለት ከመ ሶበ ይትነሣእ ብእሲ ላዕለ ካልኡ ወይቀትሎ ከማሁ ውእቱ ዝንቱ ነገር።
- Deut. 22:24 እስመ በገዳም ረከባ ወጸርሐት ይእቲ ወለት እንተ ፍኅርት ይእቲ ወአልቦ ዘይረድኡ።
- Deut. 22:25 ወለእመ ቦ ዘረከበ ወለተ ድንግለ እንተ ኢኮነት ፍኅርተ ወተኅየላ ወሰከበ ምስሌሃ ወረከብዎ ይሁቦ ለአቡሃ ውእቱ ብእሲ ዘሰከበ ምስሌሃ ለይእቲ ወለት ኅምሳ ዲድርክመ ብሩር ወትከውኖ ሎቱ ብእሲቶ ወኢይከውኖ ይኅድጋ መጠነ ሕያው ውእቱ እስመ አኅሰራ።
- Deut. 22:26 ወኢይንሣእ ብእሲ ብእሲተ አቡሁ ወኢይክሥት ኅፍረተ አቡሁ።
- Deut. 23:1 ወኢይባእ ዘቦቱ ነውር ወዘምቱር ውስተ ቤተ እግዚአብሔር ከመ ኢያዘሙ ቤተ እግዚአብሔር።
- Deut. 23:2 ወኢይባእ አሞናዊ ወሞአባዊ ውስተ ቤተ እግዚአብሔር እስከ ሣልስ ወራብዕ ትውልድ ወእስከ ዐሥር ኢይባእ ቤተ እግዚአብሔር ወእስከ ለዓለም።
- Deut. 23:3 እስመ ኢተቀበሉክሙ በእክል ወበማይ ውስተ ፍኖት አመ ወፃእክሙ እምግብጽ ወእስመ ተዐሰብዎ ለበለዓም ወልደ ቤዖር ከመ ይርግምክሙ።
- Deut. 23:4 ወኢፈቀደ እግዚአብሔር ከመ ይስምዖ ለበለዓም ወሚጣ እግዚአብሔር ለመርገሙ ውስተ በረከት እስመ አፍቀረክ እግዚአብሔር አምላክክ።
- Deut. 23:5 ወኢትትናገርሙ ሰላመ በዘይደልዎሙ በኩሉ መዋዕሊክ ለዓለም።
- Deut. 23:6 ወኢታስቆርሮ ለኤዶማዊ እስመ እኑከ ውእቱ ወኢታስቆርሮ ለግብጻዊ እስመ ፈላሴ ኮንከ በውስተ ምድርሙ።
- Deut. 23:7 ወደቂቅ ለእመ ተወልዱ ሎሙ በሣልስ ትውልድ ይባኡ ቤተ እግዚአብሔር።
- Deut. 23:8 ወለእመ ወፃእክ ትፃባእ ምስለ ፀርክ ተዐቀብ እምኩሉ ቃል እኩይ።
- Deut. 23:9 ወለእመ ቦ እምውስቴትክሙ ብእሲ ዘኢኮነ ንጹሐ እምነ ስዕበቱ ዘሌሊት ይፃእ አፍኦ እምትዕይንት ወኢይባእ ውስተ ትዕይንት።
- Deut. 23:10 ወፍና ሠርክ ተኅፂቦ ሥጋሁ በማይ ዐሪቦ ፀሓይ ይባእ ውስተ ትዕይንት።
- Deut. 23:11 ወአሐደ መካነ ረሲ ለከ አፍኦ እምትዕይንት ኅበ ትወፅእ ህየ።
- Deut. 23:12 ወዕፀ ንሣእ ለከ ውስተ ቅናትከ ወሶበ ነበርክ ቀሠፋየ ትከሪ ወትነሥእ ወትደፍን ኅፍረተክ።
- Deut. 23:13 እስመ እግዚአብሔር አምላክክ ያንሶሱ ውስተ ትዕይንትከ ከመ ያድኅንከ ወያግብኦሙ ለፀርክ ውስተ እዴክ በቅድመ ገጽከ ወትኩን ቅድስተ ተዓይኒክ ከመ ኢያስተርኢ ውስቴትከ ዘኮነ ኅፍረት ወይትመየጥ እምኒክ ወየኅድገክ።
- Deut. 23:14 ወኢታግብኦ ለገብር ኅበ እግዚኡ እምድኅሪ ተሠይጦ ኅቤክ ይንበር ምስሌክ ኅበ አደም ወኢትሣቅዮ።
- Deut. 23:15 ወኢትኩን ዘማ እምአዋልደ እስራኤል ወኢይኩን ዘማዊ እምደቂቀ እስራኤል።
- Deut. 23:16 ወአልቦ ዘያገብእ ጸባሕተ እምእስራኤል ኢታግብእ ደነሰ ዘማ ወኢ ቤሃ ክልብ ውስተ ቤተ እግዚአብሔር አምላክክ በበይነ ኩሉ ብፅዑት።
- Deut. 23:17 እስመ ርኩሳን እሙንቱ በኅበ እግዚአብሔር አምላክክ ክልኤሆሙ።
- Deut. 23:18 ወኢትትረደይ እምቢጽክ ኢ ርዴ ወርቅ ወኢ ርዴ እክል ወኢ ርዴ ኩሉ ዘኮነ ትካዙ ለቢጽክ ለእመ ተለቅሐክ ቢጽክ።
- Deut. 23:19 ወእምነኪር ትትረደይ ወእምቢጽክሰ ኢትትረደይ ከመ ይባርክ እግዚአብሔር አምላክክ በኩሉ ግብርክ ላዕለ ምድር እንተ ትበውእ ውስቴታ ከመ ትትዋረሳ።
- Deut. 23:20 ወለእመ በፃዕክ ብፅዑተ ለእግዚአብሔር ኢትጐንዲ ገቢሮቶ እስመ ተኅሥዖ ይትኃሠህክ እግዚአብሔር አምላክክ ወይከውን ኅጢአት ላዕሌክ።
- Deut. 23:21 ወለእመሰ ኢፈቀድክ ትብፃዕ አልብከ ኅጢአተ ዳእሙ እምከመ ወፅእ እምከናፍሪክ ተዐቀብ ወግበር በከመ በፃዕክ ተህብ ለእግዚአብሔር ዘከመ ነበብክ በአፋክ ከማሁ ግበር።
- Deut. 23:22 ወለእመ ቦእከ ውስተ ገራህተ ካልእከ መሐው ሰዊተ በእዴክ ወማዕጸደ ኢታብእ ውስተ ገራህተ ካልእከ።
- Deut. 23:23 ወለእመ ቦእከ ውስተ ዐጸደ ወይኑ ለካልእከ ብላዕ አስካለ እስከ ትጸግብ ነፍስከ ወውስተ ሙዳይ ባሕቱ ኢትደይ።

Deut. 24:1 ወለእመ ቦ ዘነሥኡ ብእሲተ ወነበረ ምስሌሃ ወእምዝ ለእመ ኢረከበት ሞገሰ በኅቤሁ እስመ ረከበ ዘኮነ ኅፍረተ ላዕሌሃ ይጽሐፍ ላቲ መጽሐፈ ኅድጋቲሃ ወይመይጥዋ ውስተ እዴሃ ወያወፅኦ እምነ ቤቱ።

Deut. 24:2 ወሓረት ወአውሰበት ካልኦ ብእሴ ወእምዝ ጸልኦ ውእቱኒ ብእሲ ደጋራዊ ወጸሐፈ ላቲ መጽሐፈ ኅዳጋቲሃ ወመጠዋ ውስተ እዴሃ ወያወፅኦ እምቤቱ ወለእመኒ ሞተ ውእቱ ብእሲ ደጋራዊ ዘነሥኦ ሎቱ ትኩኖ ብእሲተ።

Deut. 24:3 ኢይከውኖ ለዝክቱ ብእሲ ቀዳማዊ ዘአውፅኦ ከመ ይግባእ ላዕሌሃ ወይንሥኦ ሎቱ ትኩኖ ብእሲተ እምድኅረ ረከሰት እስመ ርኩስ ውእቱ ዝንቱ ነገር በኅበ እግዚአብሔር አምላክክ።

Deut. 24:4 ወኢታርኩሱ ምድረ ዘይሁበክሙ እግዚአብሔር አምላክክሙ ርስተ።

Deut. 24:5 ወለእመ ቦ ዘነሥኡ ብእሲተ ግብተ ኢይፃእ ጸብኦ ወአልቦ ምንተኒ ዘያቀትውዎ ድኑን ውእቱ ቤቱ አሐተ ዓመተ ከመ ይትፈሣሕ ምስለ ብእሲቱ እንተ አውሰበ።

Deut. 24:6 ወኢተአኅዝ ማኅረፀ ወኢ መድሔ ማኅረፀ እስመ መብዕለ ነፍስ ውእቱ ወኢየአኅዝዎ።

Deut. 24:7 ወለእመ ቦ ዘተረከበ ብእሲ ዘሰረቀ ነፍስ እምአኅዊሁ እምደቂቀ እስራኤል ወተዐገሎ ወሢጦ ለይቅትልዎ ለውእቱ ሰራቂ ወታሴስሉ እኩየ እምውስቱትክሙ።

Deut. 24:8 ወዑቅ ርእሰከ በእንተ ትእምርተ ለምጽ ተዐቀብ ጥቀ ከመ ትግበር ኩሎ ሕገ ዘይቤሉከ ካህናት ወሌዋውያን በከመ አዘዝኩከ ተዐቀቡ ዘትገብር።

Deut. 24:9 ወተዘከር ኩሎ ዘገብረ እግዚአብሔር አምላክከ ላዕለ ማርያ በፍኖት ወፃእክሙ እምግብጽ።

Deut. 24:10 ወለእመ ቦ ዘይፈድየከ ካልእከ ዕደ ዘኮነ ኢትባእ ውስተ ቤቱ ከመ ተአኅዝ አኅዘከ ዳእሙ አፍኦ ትቀውም።

Deut. 24:11 ውበእሴ ዕዳከ ዝክቱ ዘይፈድየከ ለሊሁ ያወፅእ አኅዘከ አፍኦ ኅቤክ።

Deut. 24:12 ወለእመ ብእሲ ነዳይ ውእቱ ኢታቢት አኅዞ ኅቤክ።

Deut. 24:13 ታገብእ ሎቱ አኅዞ ዘእንበለ ይዕርብ ፀሓይ ወይበይት በልብሱ ወትትባረከ ወይከውነከ ምጽዋተ በቅድመ እግዚአብሔር አምላክክ።

Deut. 24:14 ወኢተዐምዎ ዐስቦ ለዐሳብ ለነዳይ ዘኅጡእ ውእቱ እምአኅዊከ አው እምግድራን ዘውስተ ሀገርክ።

Deut. 24:15 እንተ ጸብሐት ትሁቦ ዐስቦ ወኢታዐርብ ፀሓየ ላዕሌሁ እስመ ነዳይ ውእቱ ወውእቱ ተስፋሁ ወአይግባር ላዕሌከ ኅበ እግዚአብሔር ወኢይኩንከ ኅጢአተ።

Deut. 24:16 ወኢይመውቱ ወላድያን በበይነ ውሉዶሙ ወኢይመውቱ ውሉዱ በበይነ ወላድያኒሆሙ አላ አሐዱ አሐዱ በጌጋዩ ይመውት።

Deut. 24:17 ወኢትሚጥ ፍትሐ ግዩር ወዘዕጓለ ማውታ ወዘእቤር።

Deut. 24:18 ወተዘከር ከመ ገብር አንተ በምድረ ግብጽ ወቤዘወከ እግዚአብሔር አምላክከ እምህየ ወበበይነ ዝንቱ እኤዝዘከ አነ ትግበር ዘንተ ነገረ።

Deut. 24:19 ወለእመ ዐጸድከ እክለ ገራህትከ ወረሳዕከ አሐተ ክልስስተ ውስተ ገራህትከ ኢትግባእ ከመ ትንሣእ ለግዩር ወለዕጓለ ማውታ ወለእቤር ይኩን ከመ ይባርከ እግዚአብሔር አምላክከ በኩሉ ተግባረ እደዊክ።

Deut. 24:20 ወለእመኒ ቀሠምከ ዐጸደ ወይንከ ኢትድግም ተመይጦ ድኅሬከ ከመ ታስተናጽሕ ቀሢመ ለግዩር ወለዕጓለ ማውታ ወለእቤር ይኩን።

Deut. 24:21 ወለእመኒ ቀሠምከ ዘይተከ ኢትድግም ተመይጦ ድኅሬከ ከመ ታስተናጽሕ ቀሢመ ለግዩር ወለዕጓለ ማውታ ወለእቤር ይኩን።

Deut. 24:22 ወተዘከር ከመ ግዩር አንተ በምድረ ግብጽ ወቤዘወከ እግዚአብሔር አምላክከ እምህየ።

Deut. 24:23 ወበይነ ዝንቱ እኤዝዘከ አነ ትግበር ዘንተ ነገረ።

Deut. 25:1 ወለእመ ኮነ ተስናን በማእከለ ሰብእ ወመጽኡ ውስተ ዐውድ ወተሳነኑ ወአርትዑ ለዘይረትዕ ወአዕልፈ ለዘይጸወግ።

Deut. 25:2 ወለእመ ኮነ ለተቀሥፎ ያንብርዎ ቅድመ ዐውድ ለዝኩ ዘይጸወግ ወይቅሥፍዎ በቅድሚሆሙ በአምጣነ አበሳሁ።

Deut. 25:3 አርብዓ ይቅሥፍዎ በኑልቀኡ ወኢያብዝኑ እምኔሁ ወለእመ አብዝኑ ቀሢፎቶ እምዝንቱ አስተኅፈርከ አኅዊከ በቅድሚክ።

Deut. 25:4 ወኢትፍጽሞ አፋሁ ለላሕም ሶበ ታከይድ እክለ።

Deut. 25:5 ወለእመ ቦ አኅው እለ ይነብሩ ኅቡረ ብእሲ ምስለ እኑሁ ወሞተ አሐዱ እምኒሆሙ ወአልቦ ውሉድ ኢታውስብ ብእሲቱ ነኪረ ብእሴ እኑሁ ለምታ ለያውስባ ወውእቱ ለይባእ ኅቤሃ ወሎቱ ትኩኖ ብእሲቶ ወይንበር ምስሌሃ።

Deut. 25:6 ወሕፃን ዘተወልደ ይኩን ለዘሞተ ወይስመይ በስሙ ወኢይደምስስ ስሙ እምእስራኤል።

Deut. 25:7 ወለእመ ኢፈቀደ ውእቱ ብእሲ ያውስባ ለብእሲተ እኑሁ ወተዐርግ ይእቲ ብእሲት ኅብ ሊቃናት ወኅብ አንቀጽ ወትብል ኢይፈቅድ እኑሁ ለምትየ ያቅም ስመ እኑሁ ውስተ እስራኤል።

Deut. 25:8 ወይጸውዕዎ ሊቃናተ ሀገር ወይብልዎ ኢትፈቅድኑ ታቅም ዘርዐ ለእኑከ ውስተ እስራኤል ወይበል ቀዊሞ ኢይፈቅድ አውስባ።

Deut. 25:9 ወትቅርብ ይእቲ ብእሲት ቅድመ ሊቃናተ ይእቲ ሀገር ወትፈትሕ ሣእኖ ዘአሐቲ እግሩ ወትትፋእ ውስተ ገጹ ወትበል ከመ ዝ ይግበርዎ ለብእሲ ዘኢይፈቀድ ይሕንጽ ቤተ እኑሁ።

Deut. 25:10 ወይስመይ ስሙ በውስተ እስራኤል ቤተ ፍቱሐ አሣእን።

Deut. 25:11 ወለእመ ተባአሱ ክልኤቱ ዕደው ኅቡረ ብእሲ ምስለ ካልኡ ወመጽአት ብእሲቱ ለአሐዱ እምኒሆሙ ከመ ታኅድኅ ለምታ እምእደ ዘባጢሁ ወአልዐለት እደሃ ወአኅዘቶ በክልኤሆን አስክቲሁ ለይምትሩ እደሃ ወኢትምህካ ዐይንክ።

Deut. 25:12 ወኢታንብር ለከ መዳልወ ንኡስ ወዐቢየ ወኢትግበር ለከ ውስተ ቤትከ መስፈርተ ንዑስ ወመስፈርተ ዐቢይ።

Deut. 25:13 ወመዳልውከኒ ርቱዕ ወጽዱቀ ይኩንከ ከመ ታብዝኅ መዋዕለ በምድር ዘይሁበከ እግዚአብሔር አምላክከ ርስተ።

Deut. 25:14 እስመ ርኩስ ውእቱ በኅብ እግዚአብሔር አምላክከ ኩሉ ዘይገብሮ ለዝንቱ ወኩሉ ዘይገብር ዐመፃ።

Deut. 25:15 ወተዘከር ኩሉ ዘገብረ ላዕሌከ አማሌቅ በፍኖት አመ ወፃእከ እምድረ ግብጽ።

Deut. 25:16 ዘከመ ተቃወመከ በፍኖት ወአምተረከ ጋዕዘከ እለ ይጻምዉ በድኅሬከ።

Deut. 25:17 ወአንተሰ ርኅብከ ወደከምከ ወኢፈራህቦ ለእግዚአብሔር አምላክከ።

Deut. 25:18 ወአመ ያዐርፈከ እግዚአብሔር አምላክከ እምኩሉ ፀርከ ዘወውድከ ውስተ ምድር ዘይሁበከ እግዚአብሔር አምላክከ ትትዋረሳ ርስተ ትደመስሶ ለአማሌቅ እምታሕተ ሰማይ ወኢትረስዎ።

Deut. 26:1 ወለእመ ቦእከ ውስተ ምድር ዘይሁበከ እግዚአብሔር አምላክከ ትትዋረሳ ርስተ ወነበርከ ውስቲታ ወትነሥእ እምፍሬ ምድር ዘወሀበከ እግዚአብሔር አምላክከ።

Deut. 26:2 ወትወዲ ውስተ ቀርጠሎን ወተሐውር ውስተ መካን ዘኅረየ እግዚአብሔር አምላክከ ከመ ይስመይ ስሙ በህየ።

Deut. 26:3 ወትበውእ ኅብ ካህን ዘሀለወ በውእቱ መዋዕል ወትብሎ አየድዕ ዮም ለእግዚአብሔር አምላኪየ እስመ በጸሕኩ ውስተ ምድር ዘመሐለ እግዚአብሔር ለአበዊነ ከመ የሀበነ።

Deut. 26:4 ወይነሥእ ካህን ለውእቱ ሙዳየ ቀርጠሎን እምውስተ እደዊከ ወያነብሮ ቅድመ ምሥዋዑ ለእግዚአብሔር አምላክከ።

Deut. 26:5 ወትብል ቅድመ እግዚአብሔር አምላክከ አበውየ ወፅኡ እምድረ ሶርያ ወወረዱ ውስተ ግብጽ ወነበሩ ህየ እንዘ ውኑዳን እሙንቱ በኑላቋሆሙ ወኮነ በህየ ሕዝበ ዐቢየ ወመልኡ ወዐብዩ ብዙኅ።

Deut. 26:6 ወሣቀዩነ ግብጽ ወአሕመሙነ ወአገበሩነ ዕፁብ ግብረ።

Deut. 26:7 ወጸራሕነ ኅብ እግዚአብሔር አምላከ አበዊነ ወስምዐ እግዚአብሔር ቃለነ ወርእየ ሕማመነ ወሥራሐነ ወሥቃየነ።

Deut. 26:8 ወአውፅአነ እምድረ ግብጽ በእድ ጽንዕት ወበመዝራዕት ልዑል በዐቢይ ግርማ ወበዐቢይ ተአምር ወመድምም።

Deut. 26:9 ወአብአነ ውስተ ዝንቱ መካን ወወሀብናሃ ለዛቲ ምድር እንተ ትውሕዝ ሐሊበ ወመፃረ።

Deut. 26:10 ወይእዚኒ ናሁ አምጻእኩ ቀዳሜ እክለ ምድርየ ዘወሀበኒ እግዚአብሔር ምድረ እንተ ትውሕዝ ሐሊበ ወመፃረ ወትሰግድ ቅድመ እግዚአብሔር አምላክከ።

Deut. 26:11 ወትትፌሣሕ በኩሉ በረከት ዘወሀበከ እግዚአብሔር አምላክከ አንተ ወቤትከ ወሌዋዊኒ ወግዩርኒ ዘኅቤከ።

Deut. 26:12 ወእምከመ ፈጸምከ ዐሥሮተ ኩሉ ዐሥራት ዘእክለ ኩሉ ምድርከ በሣልስ ዓም ወእምዝ ዘአመ ዳግም ትዔሥር ክልኤተ ዐሥራተ ወትሁቦ ለሌዋዊ ወለግድርኒ ወለዕጓለ ማውታ ወለእቤር ወይብልዕዎ በሀገርከ ወይጽገቡ።

Deut. 26:13 ወትብል በቅድመ እግዚአብሔር አምላክከ አንጻሕኩ ዘእዌድስ ለከ እምነ ቤትየ ወወሀብክዎ ለሌዋዊ ወለግድር ወለዕጓለ ማውታ ወለእቤር በከመ ኩሉ ትእዛዝከ ዘአዘዝከኒ ኢተዐደውኩ ትእዛዝከ ወኢረሳዕኩ።

Deut. 26:14 ወበሕማምየ ኢበላዕኩ እምኔሁ ወኢሦዕኩ መሥዋዕተ እምኔሁ ለርኩስየ ወኢወደይኩ ውስተ በድን እምኔሁ ወስማዕኩ ቃለ እግዚአብሔር አምላኪየ ሰማዕኩ ኩሎ ዘአዘዝከኒ።

Deut. 26:15 ወነጽር እምቤተ መቅደስከ እምሰማይ ወባርክ ሕዝበከ እስራኤል ወምድረኒ እንተ ወሀበከነ ዘከመ መሐልከ ለአበዊነ ከመ ተሀበነ ምድረ እንተ ትውሕዝ ሐሊበ ወመዓረ።

Deut. 26:16 ወበዛቲ ዕለት እግዚአብሔር አምላክከ አዘዘከ ከመ ትግበር ኩሎ ዘንተ ኩነኔሁ ወትዕቀብ ፍትሖ ወትግበሮ በኩሉ ልብከ ወበኩሉ ነፍስከ ወትሑር በፍናዊሁ ወትዕቀብ ፍትሖ ወኩነኔሁ ወትስማዕ ቃሎ።

Deut. 26:17 እስመ እግዚአብሔር ኀረየከ የም ከመ ትኩኖ ሕዝበ ለርእሱ በከመ ይቤለከ ከመ ትዕቀብ ኩሎ ትእዛዝ ወትኩን መልዕልተ ኩሉ አሕዛብ።

Deut. 26:18 ወገብረ ለከ ስመ ዐቢየ ወምክሐ ወክብረ ከመ ትኩን ሕዝበ ቅዱስ ለእግዚአብሔር አምላክከ በከመ ይቤለከ።

Deut. 27:1 ወአዘዘሙ ሙሴ ለአእሩገ እስራኤል ወይቤሎሙ ዑቁ ከመ ትግበሩ ኩሎ ዘንተ ትእዛዝ ዘአነ እኤዝዘከሙ የም።

Deut. 27:2 ወአመ ተዐድውዎ ለዮርዳኖስ ውስተ ምድር ዘይሁበክሙ እግዚአብሔር አምላክከሙ ታቀውም ለክሙ አእባነ ዐበይተ ወትመርግዎን መሬተ ጸዕዳ።

Deut. 27:3 ወትጽሕፉ ውስተ ውእቶን አእባን ኩሎ ነገሮ ለዝንቱ ሕግ ዐዲወክሙ የርዳኖስ ሶበ በእክሙ ውስተ ይእቲ ምድር ዘይሁበክሙ እግዚአብሔር አምላክሙ ለአበዊክሙ በከመ መሐለ ሎሙ ከመ የሀብክሙ ምድረ እንተ ትውሕዝ ሐሊበ ወመዓረ በከመ ይቤለከሙ እግዚአብሔር አምላክከሙ ለአበዊክሙ።

Deut. 27:4 ወሶበ ዐደውክሙ የርዳኖስ ታቀውምዎን ውስተ ደብረ ጌባል ለውእቶን አእባን እለ አነ እኤዝዘከሙ የም በእንቲአሆን ወትመርግዎን መሬተ ጸዕዳ።

Deut. 27:5 ወትነድቅ በህየ ምሥዋዕ ለእግዚአብሔር አምላክከ በእበን ወኢገሰሶን ሐፂን እለ ኢኮና ውቁራተ ወቦቶን ትነድቅ ምሥዋዕ ለእግዚአብሔር አምላክከ።

Deut. 27:6 ወትሠውዕ ላዕሌሆን መሥዋዕተ መድኅኒት ውብላዕ ወጽገብ በህየ ወተፈሣሕ በቅድመ እግዚአብሔር አምላክከ።

Deut. 27:7 ወጸሐፍ ውስተ ውእቶን አእባን ዘንተ ኩሎ ሕገ ጥቂቀ ጥቀ።

Deut. 27:8 ወይቤሎሙ ሙሴ ለካህናት ለሌዋውያን ወለኩሉ ሕዝበ እስራኤል አርምም ወስማዕ እስራኤል በዛቲ ዕለት ኮንከ ሕዝበ ለእግዚአብሔር አምላክከ ወስማዕ ቃሎ ወግበር ኩሎ ትእዛዝ ወኩነኔሁ ዘአነ እኤዝዘከከ የም።

Deut. 27:9 ወአዘዘሙ ሙሴ ለሕዝብ በይእቲ ዕለት ወይቤሎሙ እሉ እሙንቱ እለ ይቀውሙ ወይባርክዎ ለሕዝብ በደብረ ገሪዛን ዐዲወክሙ የርዳኖስ ስምዎን ወሌዊ ወይሁዳ ወይሳኮር ወዮሴፍ ወብንያም።

Deut. 27:10 ወእሉ እሙንቱ እለ ይቀውሙ ለረጊም በደብረ ጌባል ሮቤል ወጋድ ወአሴር ወዛብሎን ወዳን ወንፍታሌም።

Deut. 27:11 ወያወሥኡ ለሊሆሙ ሌዋውያን ወይብልዎሙ ለኩሉ እስራኤል በዐቢይ ቃል።

Deut. 27:12 ርጉመ ለይኩን ብእሲ ዘይገብር ግልፎ ወስብኮ ዘርኩስ በኀበ እግዚአብሔር ግብረ ኬንያ ወዘይሠይም ወዮኅብእ ወያወሥኡ ኩሉ ሕዝብ ወይብሉ አሜን ወአሜን።

Deut. 27:13 ርጉመ ለይኩን ዘያስተአኪ አባሁ ወእሞ ወይብሉ ኩሉ ሕዝብ አሜን ወአሜን።

Deut. 27:14 ርጉመ ለይኩን ዘይሰርቅ ደወለ ቢጹ ወይብሉ ኩሉ ሕዝብ አሜን ወአሜን።

Deut. 27:15 ርጉመ ለይኩን ዘያስሕቶ ፍኖተ ለዕፊር ወይብሉ ሕዝብ አሜን ወአሜን።

Deut. 27:16 ርጉመ ለይኩን ዘይጌምጽ ፍትሐ ግድር ወዘዕጓለ ማውታ ወዘእቤር ወይብሉ ኩሉ ሕዝብ አሜን ወአሜን።

Deut. 27:17 ርጉመ ለይኩን ዘይሰክብ ምስለ ብእሲተ አቡሁ እስመ ከሠተ ኀፍረተ አቡሁ ወይብሉ ኩሉ ሕዝብ አሜን ወአሜን።

- Deut. 27:18 ርጉሙ ለይኩን ዘይሰክብ ምስለ ኩሉ እንስሳ ወይብሉ ኩሉ ሕዝብ አሜን ወአሜን።
- Deut. 27:19 ርጉሙ ለይኩን ዘይሰክብ ምስለ እኅቱ እመኒ እንተ እምአቡሁ ወእመኒ እንተ እምእሙ ወይብሉ ኩሉ ሕዝብ አሜን ወአሜን።
- Deut. 27:20 ርጉሙ ለይኩን ዘይሰክብ ምስለ እመ ብእሲቱ ወይብሉ ኩሉ ሕዝብ አሜን ወአሜን።
- Deut. 27:21 ርጉሙ ለይኩን ዘይዘብጥ ካልኦ በነገረ ጉሕሉት ወይብሉ ኩሉ ሕዝብ አሜን ወአሜን።
- Deut. 27:22 ርጉሙ ለይኩን ዘይነሥእ ሕልያነ ከመ ይቅትል ነፍሰ ወደመ ንጹሐ ወይብሉ ኩሉ ሕዝብ አሜን ወአሜን።
- Deut. 27:23 ርጉሙ ለይኩን ኩሉ ብእሲ ዘኢይቀውም ይግበር ቃለ ዘውስተ ዝንቱ ሕግ ወይብሉ ኩሉ ሕዝብ አሜን ወአሜን።
- Deut. 28:1 ወለእመ ሰሚዐ ሰማዕክ ቃለ እግዚአብሔር አምላክክ ወዐቀብክ ከመ ትግበር ኩሉ ትእዛዞ ዘኣነ እኤዝዘክ ዮም ወይሬስየክ እግዚአብሔር አምላክክ መልዕልተ ኩሉ ኣሕዛብ ምድር።
- Deut. 28:2 ወይበጽሐክ ዝንቱ ኩሉ በረከት ወይረክበክ ለእመ ሰማዕክ ቃለ እግዚአብሔር አምላክክ።
- Deut. 28:3 ቡሩክ ትኩሙን በሐቅል ወቡሩክ ትኩሙን በሀገር።
- Deut. 28:4 ቡሩክ ይከውን ፍሬ ከርሥክ ወቡሩክ ይከውን እክለ ምድርክ ወቡሩክ ይከውን መራዕየ አባግዒክ ወአልሕምቲክ።
- Deut. 28:5 ቡሩክ ይከውን መዛግብቲክ ወትራፋቲክ።
- Deut. 28:6 ቡሩክ ትኩሙን በበኣትክ ወቡሩክ ትኩሙን በፀኣትክ።
- Deut. 28:7 ወያብሎም እግዚአብሔር አምላክክ ውስተ እዴክ ለፀርክ ከመ ይትቀጥቀጡ በታሕተ እገሪክ በኣሐቲ ፍኖት ይወፅኡ ይትቀበሉክ ወበሰቡዑ ፍናው ይነትዑ እምቅድመ ገጽክ።
- Deut. 28:8 ወይፌኑ እግዚአብሔር በረከቶ ውስተ ኣብያቲክ ውስተ ኩሉ ዘወደይክ እዴክ በውስተ ምድር ዘወሀበክ እግዚአብሔር አምላክክ።
- Deut. 28:9 ወያቀውመክ እግዚአብሔር ሎቱ ሕዝብ ቅዱሰ በከመ መሐለ እግዚአብሔር ለኣበዊክ ለእመ ሰማዕክ ቃለ እግዚአብሔር አምላክክ ወሐርክ በፍናዊሁ።
- Deut. 28:10 ወይሬእዩ ኩሉ ኣሕዛብ ምድር ከመ ተሰምየ ስሙ ለእግዚአብሔር አምላክክ ወይፈርሁክ።
- Deut. 28:11 ወያስተባዝኅክ እግዚአብሔር አምላክክ ውስተ ሠናይት በውሉደ ከርሥክ ወበእክለ ምድርክ።
- Deut. 28:12 ወያስተዋልዶን ለእንስሳክ በውስተ ምድር ዘመሐለ እግዚአብሔር አምላክክ ለኣበዊክ ከመ የሀብክ በከመ መዋዕለ ሰማይ ዲበ ምድር።
- Deut. 28:13 ወይፈትሕ ለክ እግዚአብሔር መዝገበ ቡሩክ ሰማይ ከመ የሀብክ ዝናመ በመዋዕሊሁ ለምድርክ ከመ ይባርክ ለክ ኩሉ ተግባረ እደዊክ ወትሌቃሕ ኣንተ ለብዙኃን ኣሕዛብ ወኣንተሰ ኢትትሌቃሕ ወትኳንኖሙ ኣንተ ለብዙኃን ኣሕዛብ ወለከሰ ኢይኳንኩክ።
- Deut. 28:14 ወይሠይመክ እግዚአብሔር ውስተ ርእሰ ወኣኮ ውስተ ዘንብ ወትኩሙን መልዕልተ ወኢትኩሙን መትሕተ ለእመ ሰማዕክም ቃለ እግዚአብሔር አምላክክ ወትእዛዞ ኩሉ ዘኣነ እኤዝዘክ ዮም ከመ ትዕቀብ ወትግበር።
- Deut. 28:15 ወኢትትገሐሥ እምኩሉ ቃል ዘኣነ እኤዝዘክ ዮም ኢ ለየማን ወኢ ለፀጋም ከመ ትሑር ድኅረ አማልክተ ባዕድ ታምልኮሙ።
- Deut. 28:16 ወለእመሰ ኢሰማዕክ ቃለ እግዚአብሔር አምላክክ ከመ ትዕቀብ ኩሉ ትእዛዞ ዘኣነ እኤዝዘክ ዮም ወይመጽእ ላዕሌክ ኩሉ ዝንቱ መርገም ወይረክበክ።
- Deut. 28:17 ወትኩሙን ርጉሙ ኣንተ በሐቅል ወበሀገር።
- Deut. 28:18 ወይከውን ርጉሙ መዛግብቲክ ወትራፋቲክ።
- Deut. 28:19 ወርጉሙ ይከውን ፍሬ ከርሥክ ወእክለ ምድርክ ወመራዕየ ኣልሕምቲክ ወአባግዒክ።
- Deut. 28:20 ወርጉም ኣንተ በበኣትክ ወበፀኣትክ።
- Deut. 28:21 ወይፌኑ እግዚአብሔር ላዕሌክ ንዴተ ወረኃብ ወብድብደ ወይጠፍእ ኩሉ ዘወደይክ እዴክ ውስቱቱ ወይሄርወክ እስክ ይደመስሰክ ፍጡነ በበይነ እኮየ ምግባሪክ እስመ ኅደገኒ።
- Deut. 28:22 ወያተሉ እግዚአብሔር ሞተ ላዕሌክ እስክ ያጠፍኣክ ፍጡነ እምድር እንተ ውስቱታ ትበውእ ህየ ከመ ትትዋረሳ።
- Deut. 28:23 ወይቀሥፈክ እግዚአብሔር በደዌ ሲሕ ወበፈጸንት ወበኣስፈር ወበፍርሀት ወበድንጋጂ ወበወባር ወበኅጢእ ወይሰድዱክ እስክ ያጠፍኡክ።

- Deut. 28:24 ወትከውነከ ሰማይ በመልዕልተ ርእሰከ ብርተ ወምድርኒ በታሕቲክ ሐሂነ።
- Deut. 28:25 ወይሬስዮ እግዚአብሔር ለዝናመ ምድርክ ቆባረ ወመሬት ይወርድ እምሰማይ ላዕሌክ እስከ ይቀጠቅጠክ ወእስከ ያጠፍአክ።
- Deut. 28:26 ወይገብረክ እግዚአብሔር ከመ ትትቀተል በቅድመ ፀርክ በአሐቲ ፍኖት ትወፅእ ኀቤሆሙ ወበሰቡዑ ፍናው ትነትዕ እምቅድመ ገጸሙ ወትከውን ዝርወ ውስተ ኩሉ መንግሥታተ ምድር።
- Deut. 28:27 ወይከውኑ አብድንቲክ መብልዐ ለአዕዋፈ ሰማይ ወኢትረክብ ዘይቀብረክ።
- Deut. 28:28 ወይቀሥፈክ እግዚአብሔር በመቅሠፍተ ግብጽ በዐበቅ እኩይ ውስተ ነፍስትክ ወበህክክ ዘአልቦ ፈውሰ።
- Deut. 28:29 ወይቀሥፈክ እግዚአብሔር በድቀት ወበዐዊር ወበድንጋዒ ልብ።
- Deut. 28:30 ወትገብእ ታመረስስ መዓልተ ከመ ያመረስስ ዕጢር በውስተ ጽልመት ወኢትረክብ ፍኖተ ወትትገፋዕ ወትትበረበር በኩሉ መዋዕሊክ ወኢትረክብ ዘይረድአክ።
- Deut. 28:31 ወታወስብ ብእሲተ ወየሀይደከሃ ካልእ ብእሲ ወትነድቅ ቤተ ወኢትነብር ውስቴቱ ወትተክል ወይነ ወኢትቀሥሞ።
- Deut. 28:32 ወይጠብሑ ላሕመክ ወኢትበልዕ እምኔሁ ወየሀይዱ አድገክ ወኢያገብኡ ለከ ወይገብኡ አባግፒክ ለአግብርት ወለፀርክ ወኢትረክብ ዘይረድአክ።
- Deut. 28:33 ወይገብኡ ደቂቅክ ወአዋልዲክ ለካልእ ሕዝብ ወትሬኢ በአዕይንቲክ እንዘ ይኩርዕዎሙ ወአልቦ ዘትክል ገቢረ።
- Deut. 28:34 ወይበልዕ ሕዝብ ዘኢተአምር እክለ ምድርክ ወጻማክ ወትከውን ጽዑረ ወሥቁየ በኩሉ መዋዕል።
- Deut. 28:35 ወትከውን ምሑጽ በምርኣየ አዕይንቲክ ወኢትሬኢ።
- Deut. 28:36 ወይቀሥፈክ እግዚአብሔር በደዌ እኩይ ውስተ ብረኪክ ወውስተ አቀሥጺክ ወውስተ አዕማደ እገሪክ በዘኢትክል ሐይወ እምሰኩና እግርክ እስከ ርእሰክ።
- Deut. 28:37 ወይወስደክ እግዚአብሔር ኪያከኒ ወመላእክቲከኒ ዘሜምክ ለከ ውስተ ሕዝብ ዐቢይ ዘኢተአምር አንተ ወኢ አበዊክ ወታመልክ በህየ ባዕዳነ አማልክተ ወዕፀወ ወአእግነ።
- Deut. 28:38 ወትከውን በህየ ድንጉፀ ወትከውን አምሳለ ወነገረ ለኩሉ አሕዛብ ዘኀቤሆን ይወስደክ እግዚአብሔር።
- Deut. 28:39 ወታወፅእ ብዙኀ ዘርዐ ውስተ ገራህትክ ወታብውእ ውኑደ እስመ አንበጣ በልዎ።
- Deut. 28:40 ወትተክል ዐጸደ ወይን ወትትጌበሮ ወኢትሰቲ እምወይኑ ወኢትትፌሣሕ ቡቱ እስመ ዕዒ በልዎ።
- Deut. 28:41 ወታጠሪ ዕፀወ ዘይት ውስተ ኩሉ ደወልክ ወኢትትቀባዕ ቅብዐ እምኔሁ እስመ ተነግፈ ፍሬሁ።
- Deut. 28:42 ወትወልድ ደቂቀ ወአዋልደ ወኢያተርፍዎሙ ለከ እስመ ይነሥእዎሙ ወይዒውዎሙ።
- Deut. 28:43 ወለኩሉ እክለ ምድርክ ወለኩሉ ተክለ ዕፀዋቲክ አናኩዕ ያጠፍኦ።
- Deut. 28:44 ወፈላሲ ዘሀለወ ኀቤክ የዐርግ መልዕልቲክ ወአንተሰ ትከውን መትሕቶ።
- Deut. 28:45 ወውእቱ ይሌቅሐክ ወአንተ ኢትሌቅሐ ውእቱ ይከውነክ ርእሰ ወአንተ ትከውኖ ዘነበ።
- Deut. 28:46 ወይመጽእ ላዕሌክ ዝንቱ ኩሉ መርገም ወይዴግነክ ወይረክበክ እስከ ያጠፍአክ ወይደመስሰክ እስመ ኢሰማዕክ ቃለ እግዚአብሔር አምላክክ ከመ ትዕቀብ ትእዛዞ ወኩነኔሁ ኩሉ ዘአዘዘክ።
- Deut. 28:47 ወይከውን ተአምር ላዕሌክ ወመድምም ወላዕለ ዘርዕክ እስከ ለዓለም እስመ ኢያምልካሁ ለእግዚአብሔር አምላክክ በትፍሥሕት ወበሠናይ ልብ።
- Deut. 28:48 ወበዝ ኩሉ ትትቀነይ ለጸላእትክ ዘይፌኑ እግዚአብሔር ላዕሌክ በረኃብ ወበጽምእ ወበዕርቃን ወበኀጢኦ ኩሉ ወይወዲ ለከ ጋጋ ዘኀሂን ውስተ ክሳድክ እስከ ያጠፍአክ።
- Deut. 28:49 ወያመጽእ እግዚአብሔር ላዕሌክ ሕዝበ እምርሑቅ እምአጽናፈ ምድር ከመ ርደተ ንስር ሕዝብ ዘኢትሰምዕ ነገሮሙ።
- Deut. 28:50 ሕዝብ ግሩመ ገጽ ዘኢያከብር ገጸ ልሂቅ ወኢይምህር ንዑሰ።
- Deut. 28:51 ወያጠፍእ ዕጉለ መራዕይክ ወእክለ ምድርክ እስከ ኢያተርፍ ለከ እክለ ወኢ ወይነ ወኢ ቅብዐ ወኢ መራዕየ አልሕምቲክ ወአባግፒክ እስከ ያጠፍአክ።
- Deut. 28:52 ወይደመስሰክ እምውስተ ኩሉ አህጉሪክ እስከ ያወድቅ አረፋቲክ ዐበይተ ወአጽዋኒክ ዘቡቶን ትትአመን ዘውስተ ኩሉ በሓውርቲክ ወይሣቅየክ በውስተ ኩሉ አህጉሪክ ዘወሀበክ እግዚአብሔር አምላክክ።
- Deut. 28:53 ወትገብእ ትባላዕ ውሉደ ከርሥክ ሥጋ ደቂቅክ ወአዋልዲክ ዘወሀበክ እግዚአብሔር አምላክክ በምንዳቤክ ወበሥቃይክ ዘሣቀየክ ጸላኢክ በውስተ አህጉሪክ።

- Deut. 28:54 ዘርሕጸሂ ወለምለመሂ ወትደነጹ ዐይኑ ለእኑሁ ወለብእሲቱ እንተ ውስተ ሕፅኑ ወለዘተርፉ ውሉድ ዘአትረፉ ሎሙ።
- Deut. 28:55 ወይሁብዎሙ ለለ አሐዱ እምኔሆሙ ሥጋ ውሉድሙ ይሴሰዩ እስመ ኢያትረፉ ሎሙ ወኢ ምንተኒ በሥቃይ ወበምንዳቤ ዘይሣቅዩክ ጸላእተክ በኩሉ አህጉሪከ።
- Deut. 28:56 ወእንተ ርሕጸትሂ ይእቲ እምኔክ ወእንተሂ ድክምት ይእቲ ትሚህር ለእገሪሃ ሐዊረ ውስተ ምድር ወእስመ ርሕጸት ይእቲ ወድክምት ትደነጽዎ ዐይና ለምታ ዘዲበ ሕፅና ወለወልዳ ወለወለታ።
- Deut. 28:57 ወለሥጋሃ ዘእምውስተ አባላ ውእቱ ወሕፃና ዘወለደት ትበልዕ ጽሚተ ሶበ ኅጥአት ኩሎ በምንዳቤ ወበሥቃይ ዘይሣቅዩክ ጸላኢክ በውስተ አህጉሪከ።
- Deut. 28:58 ወእመ ኢሰማዕክ ከመ ትግበር ኩሎ ዘንተ ነገሮ ለዝንቱ ሕግ ዘጽሑፍ ውስተ ዝንቱ መጽሐፍ ከመ ትፍራህ ስመ ክቡር ወስቡሐ ዝንቱ ዘእግዚአብሔር አምላክክ።
- Deut. 28:59 ወይገብር እግዚአብሔር ነኪረ መቅሠፍተክ ወመቅሠፍተ ዘርዕክ ወመቅሠፍተ ዐቢየ ወመድምመ ወደዌ እኩየ ወሕማመ።
- Deut. 28:60 ወይገብእ ላዕሌክ ኩሎ ደዌሆሙ ለግብጽ እኩይ ዝክቱ ዘኢፈራህክ እምኔሁ ወኢፈራህክ እምቅድመ ገጹ ወያተሉ ዲቤከ።
- Deut. 28:61 ወኩሎ ደዌ ወኩሎ መቅሠፍተ ዘኢኮነ ጽሑፈ ውስተ ዝንቱ መጽሐፈ ሕግ ያመጽእ እግዚአብሔር ላዕሌክ እስከ ያጠፍአክ ወእስከ ትደመሰሱ።
- Deut. 28:62 ወትተርፉ ኅዳጣነ በኑልቀ እምድኅረ ኮነ ከመ ከዋክብተ ሰማይ ብዝነክ እስመ ኢሰማዕክ ቃለ እግዚአብሔር አምላክክ።
- Deut. 28:63 ወበከመ ተፈሥሐ እግዚአብሔር ላዕሌክ ከመ ይግበር ሠናያተ ለክ ወአብዝነክ ከማሁ ይትፌሣሕ እግዚአብሔር ዲቤክ ከመ ይሥሩክ ወትጠፍእ እምድር እንተ ውስቲታ ትበውእ ህየ ከመ ትትዋረሳ።
- Deut. 28:64 ወይዘርወክ እግዚአብሔር አምላክክ ውስተ አሕዛብ እምአጽናፈ ምድር እስከ አጽናፈ ምድር ወትትቀነይ በህየ ለባዕዳን አማልክት ለዕፀው ወለአእባን ዘኢታአምር አንተ ወኢ አበዊከ።
- Deut. 28:65 ወበህየኒ በውስተ ውእቱ አሕዛብ ኢያዐርፈክ ወኢያበውሐክ ትቁም በእግርክ ወይሁበክ በህየ እግዚአብሔር ልበ ሕዙነ ወአዕይንተ ጥፋአተ ወነፍሰ ሙስንተ።
- Deut. 28:66 ወትከውን ሕይወትክ ስቅልተ ቅድመ አዕይንቲክ ወትደነግዕ ለሊክ መዓልተ ወሌሊተ ወኢትትአመና ለሕይወትክ።
- Deut. 28:67 ለእመ ጸብሐ ትብል እፎ እንጋ ይመሲ ወለእመ መስየ ትብል እፎ እንጋ ይጸብሕ እምፍርሀተ ልብ ዘትደነግዕ ወእምዘያስተርእየክ ውስተ አዕይንቲክ ወዘትሬኢ።
- Deut. 28:68 ወያገብእክ እግዚአብሔር ውስተ ግብጽ በአሕማር ወእንተ ምድርኒ በእግር ዝንቱ ዘእቤለክ ኢትደግሙ እንክ ርእዮታ ዓዲ።
- Deut. 28:69 ወትከውኑ በህየ አግብርተ ወአእማተ ለፀርከሙ ወአልበ ዘይምሕረክሙ።
- Deut. 29:1 ወዝንቱ ውእቱ ነገረ ኪዳን ዘአዘዞ እግዚአብሔር ለሙሴ ከመ ይትካየድሙ ለደቂቀ እስራኤል በምድረ ሞሐብ ዘእንበለ ዝክቱ ኪዳን ዘተካየድሙ በኮሬብ።
- Deut. 29:2 ወጸውዎሙ ሙሴ ለኩሎ ደቂቀ እስራኤል ወይቤሎሙ ለሊክሙ ርኢክሙ ኩሎ ዘገብረ ለክሙ እግዚአብሔር በምድረ ግብጽ ላዕለ ፈርዖን ወላዕለ መገብቱ ወላዕለ ኩሎ ዐበይቱ ወላዕለ ኩሎ ምድሩ።
- Deut. 29:3 መቅሠፍተ ዐቢየ ዘርእያ አዕይንቲክሙ ወዝክተ ተአምር ወመድምመ ዐቢየ ወእደ ጽንዕተ ወመዝራዕተ ልዑሉ።
- Deut. 29:4 ወወሀበክሙ እግዚአብሔር አምላክክሙ ልበ ከመ ታእምሩ ወዐይነ ከመ ትርአዩ ወእዝነ ከመ ትስምዑ እስከ ዛቲ ዕለት።
- Deut. 29:5 ወወሰደክሙ አርብዓ ዓመተ ውስተ ገዳም አልባሲክሙ ኢበልየ ወአሣእኒክሙኒ ኢበልየ እምእገሪክሙ።
- Deut. 29:6 እንዘ እክለ ኢትበልዑ ወወይነ ወሜሰ ኢትሰትዩ እስከ በጻሕክሙ ውስተ ዝንቱ መካን ከመ ታእምሩ ከመ ውእቱ እግዚአብሔር አምላክክሙ።
- Deut. 29:7 ወወፅእ ሴዎን ንጉሠ አሞሬዎን ወአግ ንጉሠ ባሳን ወተቀበሉክሙ ይትቃተሉክሙ ወቀተልናሆሙ ወነሣእነ ምድሮሙ።
- Deut. 29:8 ወወሀበክሙ ይእተ ምድረ ለሮቤል ወለጋድ ወመንፈቀ ነገደ ምናሴ።
- Deut. 29:9 ወዕቀቡ ከመ ትግበሩ ኩሎ ነገረ ዝንቱ ኪዳን ከመ ታእምሩ ኩሎ ዘትገብሩ።

Deut. 29:10 ወናሁ ቆምክሙ አንትሙ ኩልክሙ ቅድመ እግዚአብሔር አምላክክሙ ወዐበይተ ነገድክሙ ወሊቃውንቲክሙ ወመኳንንቲክሙ ወጸሐፍቲክሙ ወኩሉ ተባዕተ እስራኤል።

Deut. 29:11 ወአንስትያክሙ ወውሉድክሙ ወግዩር ዘሀለወ ማእከለ ትዕይንቲክሙ እምሐጣቤ ዕፅክሙ እስከ ሐዋሬ ማይክሙ።

Deut. 29:12 ከመ ትስምዑ ኪዳኖ ለእግዚአብሔር አምላክክሙ ወመርገሞኒ ለእግዚአብሔር አምላክክሙ ዘተካየደ ምስሌክሙ ዮም።

Deut. 29:13 ከመ ይረሲክ ሕዝበ ሎቱ ወውእቱኒ ከመ ይኩንክ አምላክክ በከመ መሐለ ለአበዊክ ለአብርሃም ወለይስሐቅ ወለያዕቆብ።

Deut. 29:14 ወአኮ ለክሙ ለባሕቲትክሙ ዘአቀውም አነ ዘንተ ኪዳነ ወዘንተ መርገሙ።

Deut. 29:15 አላ ለእለሂ ሀለዉ ዝየ ዮም ምስሌክሙ ቅድመ እግዚአብሔር አምላክክሙ ወለእለሂ ኢሀለዉ ዝየ ምስሌክሙ ዮም።

Deut. 29:16 እስመ ለሊክሙ ተአምሩ ዘከመ ነበርነ ውስተ ግብጽ ወዘከመ ኅለፍነ እንተ ማእከሎሙ ለእልክቱ አሕዛብ ወተዐደውናሆሙ።

Deut. 29:17 ወርኢክሙ ርኩሶሙ ወአማልክቲሆሙ ዕፅ ወእብነ ወብሩረ ወወርቀ ዘገብሩ ለሊሆሙ።

Deut. 29:18 ኢይኩን እምኔክሙ ኢ ብእሲ ወኢ ብእሲት ወኢ ሕዝብ ወኢ ነገድ ወኢ መኑሂ ዘያጎድግ ልቦ እምእግዚአብሔር አምላክክሙ ወየሐውር ያምልኮሙ ለእልክቱ አማልክተ አሕዛብ ወኢይኩን እምኔክሙ ሥርወ እኪት እንተ ታበቀሉ ወታፈሪ ሕምዘ ወምረተ።

Deut. 29:19 ወስሚዐክሙ ቃለ ዝንቱ መርገም ዘይቤ በልቡ ይሰሪ ሊተ እስመ በእባየ ልብየ ገበርኩ ወሐርኩ ከመ ኢያዐሪ መዊተ መኣብስ ምስለ ዘኢአበስ።

Deut. 29:20 ኢይፈቅድ እግዚአብሔር ከመ ይሣህሎ አላ በጊዜሃ መዐቱ ለእግዚአብሔር ወቀንኡ ያውዕዮ ለውእቱ ብእሲ ወለይተልዎ ዝንቱ ኩሉ መርገም ዘዝንቱ ኪዳን ዘጽሑፍ ውስተ ዝንቱ መጽሐፈ ሕግ ወለይስዐር እግዚአብሔር ስሞ እምታሕተ ሰማይ።

Deut. 29:21 ወለያግብኦ እግዚአብሔር ውስተ እኪት ወይፍልጦ እምኩሉ ደቂቀ እስራኤል በኩሉ ዝንቱ መርገም ዘዝንቱ ኪዳን ዘጽሑፍ ውስተ ዝንቱ መጽሐፈ ሕግ።

Deut. 29:22 ወይብሉ ድጎረ ትውልደ ደቂቅክሙ እለ ይትነሥኡ እምድጎሬክሙ ወነኪርኒ ዘይመጽእ እምርሑቅ ብሔር ወይሬእዩ መቅሠፍታ ለይእቲ ምድር ወደዌሃ ዘፈነወ እግዚአብሔር ላዕሌሃ።

Deut. 29:23 ተይ ወዚው ይነድድ ውስተ ኩለንታሃ ወኢትዝራዕ ወኢታበቀሉ ወኢይወፅእ ውስቲታ ኩሉ ሐመልማል በከመ ተገፍትዐ ሶዶም ወጎሞራ ወአዳማ ወሴባዮን እለ ገፍትዖን እግዚአብሔር በመዐቱ።

Deut. 29:24 ወይብሉ ኩሉ አሕዛብ ለምንት ከመ ዝ ገብራ እግዚአብሔር ለዛቲ ምድር ወምንት ውእቱ መንሱቱ ለዝንቱ መዓት ዐቢይ።

Deut. 29:25 ወይብሉ እስመ ኅደጉ ኪዳኖ ለእግዚአብሔር አምላክ አበዊሆሙ ዘተካየደ ምስለ አበዊሆሙ አመ አውፅኦሙ እምድረ ግብጽ።

Deut. 29:26 ወሐሩ ወአምለኩ ባዕዳነ አማልክተ ወሰገዱ ሎሙ ለዘኢየአምሩ ወለዘኢይበቀሶዎሙ።

Deut. 29:27 ወተምዕዐ መዓተ እግዚአብሔር ላዕለ ዛቲ ምድር ወአምጽኦ ላዕሌሃ ኩሉ መርገም ዘጽሑፍ ውስተ ዝንቱ መጽሐፈ ሕግ።

Deut. 29:28 ወአስዐርሙ እግዚአብሔር እምገጸ ምድሮሙ በመዓት ወበመንሱት ወበመቅሠፍት ዐቢይ ከመ ይእዜ ዘኅቡእ ለእግዚአብሔር አምላክነ።

Deut. 29:29 ወዘያስተርኢስ ለነ ወለውሉድነ ለዓለም ከመ ንግበር ኩሉ ዘይብል ዝንቱ ሕግ።

Deut. 30:1 ወአመ መጽኦ ላዕሌክ ኩሉ ዝንቱ ነገር በረከቱሂ ወመርገሙሂ ዘአቀምኩ ቅድሜክ ተዘከሮ በልብክ በውስተ ኩሉ አሕዛብ ኅበ ዘረወክ እግዚአብሔር ህየ።

Deut. 30:2 ወተመየጥ ኅበ እግዚአብሔር አምላክክ ወስማዕ ቃሎ ኩሉ ዘአነ እኤዝዘክ ዮም በኩሉ ልብክ ወበኩሉ ነፍስክ።

Deut. 30:3 ወየጎድግ ለክ እግዚአብሔር ኩሉ ኅጣውኢክ ወይሣህለክ ወካዕበ ያስተጋብኦክ እግዚአብሔር እምኩሉ አሕዛብ እለ ውስቲቶሙ ዘረወክ ህየ።

Deut. 30:4 ወለእመኒ ውስተ አጽናፈ ሰማይ ዘረወክ ያስተጋብኦክ እምህየ እግዚአብሔር አምላክክ።

Deut. 30:5 ወይወስደክ ውስተ ይእቲ ምድር እንተ ተወረሱ አበዊክ ወትወርሳ ወይገብር ሠናይተ ላዕሌክ ወያበዝካክ ወይሬስየክ ፈድፋደ እምአበዊክ።

Deut. 30:6 ወያሴስሎ እግዚአብሔር ለዝክቱ ልብከ ወልቦሙ ለዘርዕከ ከመ ታፍቅሮ በኩሉ ልብከ ወበኩሉ ነፍስከ ከመ ትሕየው አንተ ወዘርዕከ።

Deut. 30:7 ወያገብኦ እግዚአብሔር አምላክከ ለዝንቱ መርገም ላዕለ ፀርከ ወላዕለ እለ ይፀልኡከ ወላዕለ እለ ይሰደዱከ።

Deut. 30:8 ወአንተሰ ተመየጥ ወስማዕ ቃለ እግዚአብሔር አምላክከ ወግበር ኩሎ ትእዛዞ ዘአነ እኤዝዘከ ዮም።

Deut. 30:9 ወብዙኅ ያጸንዐከ እግዚአብሔር አምላክከ በኩሉ ተግባረ እደዊከ ወበውሉደ ከርሥከ ወበዘርዕ ምድርከ ወበአስተዋልዶ እንስሳከ እስመ ይትመየጥ እግዚአብሔር አምላክከ ከመ ይትፈሣሕ ላዕሌከ በሠናይ በከመ ተፈሥሐ ላዕሌከ በእኩይ ወበከመ ተፈሥሐ ላዕለ በአበዊከ።

Deut. 30:10 ለእመ ሰማዕከ ቃለ እግዚአብሔር አምላክከ ከመ ትዕቀብ ወከመ ትግበር ኩሎ ትእዛዞ ወኩሎ ኩነኔሁ ወፍትሐ ዘጽሑፍ ውስተ ዝንቱ መጽሐፈ ሕግ ወለእመ ገባእከ ኅበ እግዚአብሔር አምላክከ በኩሉ ልብከ ወበኩሉ ነፍስከ።

Deut. 30:11 እስመ ዛቲ ትእዛዝ ዘአነ እኤዝዘከ ዮም ኢኮነት ክብደ ወኢኮነት ርሕቅተ እምኔከ።

Deut. 30:12 ወኢኮነት ውስተ ሰማይ ከመ ኢትብል መኑ የዐርግ ውስተ ሰማይ ወያመጽኦ ለነ ወንስምዓ ወንግበራ።

Deut. 30:13 ወኢኮነት ማዕዶተ ባሕር ወእመ ትብል መኑ እምዐደወ ለነ ማዕዶተ ባሕር ወያመጽኦ ለነ ወያስምዐነ ወንግበራ።

Deut. 30:14 እስመ ናሁ ቅርብት ይእቲ ለከ ጥቀ ቃል ውስተ አፉከኒ ወውስተ ልብከኒ ወውስተ እደዊከኒ ከመ ትግበራ።

Deut. 30:15 ወናሁ ሢምኩ ቅድመ ገጽከ ዮም ሕይወተ ወሞተ ሠናይተ ወእኪተ።

Deut. 30:16 ወሕይወትሰ ለእመ ሰማዕከ ቃለ እግዚአብሔር አምላክከ ወዕቀብ ትእዛዞ ኩሎ ዘአነ እኤዝዘከ ዮም ከመ ታፍቅሮ ለእግዚአብሔር አምላክከ ወትሑር በኩሉ ፍናዊሁ ወትዕቀብ ኩነኔሁ ወፍትሐ ወትትባዝኅ ወተሐዩ ወይባርከከ እግዚአብሔር አምላክከ በኩሉ ምድር እንተ ውስቲታ ትበውእ ህየ ከመ ትወርሳ።

Deut. 30:17 ወለእመሰ ተመይጦ ልብከ ወአበይከ ሰሚዐ ወስሕትከ ወሰገድከ ለባዕዳን አማልክት ወተቀነይኮሙ ናሁ አይዳዕኩከ ከመ ጠፊኦ ትጠፍእ።

Deut. 30:18 ወኢይነውኅ መዋዕሊከ ውስተ ምድር እንተ ውስቲታ ዐዲወ ተዐዱ ዮርዳኖስ ህየ ከመ ትትዋረሳ።

Deut. 30:19 ናሁ አሰምዕ ለከ ዮም ሰማየ ወምድረ ከመ ሢምኩ ቅድሚከ ሕይወተ ወሞተ በረከተ ወመርገመ ወኅርያ ለከ ለሕይወት ከመ ትሕየው አንተ ወዘርዕከ።

Deut. 30:20 ወአፍቅሮ ለእግዚአብሔር አምላክከ ወስማዕ ቃሎ ወአጽንዖ ኪያሁ እስመ ውእቱ ሕይወትከ በዘቦቱ ይነውኅ መዋዕሊከ ከመ ትንበር ውስተ ምድር ዘመሐለ እግዚአብሔር ለአበዊከ ለአብርሃም ወለይስሐቅ ወለያዕቆብ ከመ የሀቦሙ።

Deut. 31:1 ወፈጸመ ሙሴ ተናግሮቶሙ ለኩሉ ደቂቀ እስራኤል ዘንተ ኩሎ ነገረ።

Deut. 31:2 ወይቤሎሙ ምእት ወዕሥራ ዓመት ሊተ ዮም ወኢይክል እንከ በዊኦ ወወኒኦ ወባሕቱ ይቤለኒ እግዚአብሔር ኢተዐድዎ ለዝንቱ ዮርዳኖስ።

Deut. 31:3 ወውእቱ እግዚአብሔር ዘየሐውር ቅድሚከ ያጠፍኦሙ እምቅድመ ገጽከ ለኩሉ አሕዛብ ወኢያሱኒ የሐውር ቅድመ ገጽከ በከመ ይቤ እግዚአብሔር።

Deut. 31:4 ከማሁ ይገብሮሙ በከመ ገብሮሙ ለሴዎን ወለአግ ክልኤቱ ነገሥተ አሞሬዎን እለ ይነብሩ ውስተ ማዕዶተ ዮርዳኖስ ወለምድሮሙ በከመ ሠረዎሙ።

Deut. 31:5 ወአግብኦሙ እግዚአብሔር ለክሙ ወግበርዎሙ በከመ አዘዝኩክሙ።

Deut. 31:6 ትባዕ ወጽናዕ ወኢትፍራህ ወኢትደንግዕ ወኢትዕብስ በቅድመ ገጽሙ እስመ እግዚአብሔር አምላክከ ውእቱ የሐውር ምስሌከ ወኢየጎድገከ ወኢያሰትተከ።

Deut. 31:7 ወጸውዖ ሙሴ ለኢያሱ ወይቤሎ በቅድመ ኩሉ እስራኤል ትባዕ ወጽናዕ እስመ አንተ ትበውእ ቅድሚሁ ለዝንቱ ሕዝብ ውስተ ምድር ዘመሐለ እግዚአብሔር ለአበዊከሙ ከመ የሀቦሙ ወአንተ ታወርሶሙ።

Deut. 31:8 ወእግዚአብሔር የሐውር ምስሌከ ወኢየጎድገከ ወኢያሰትተከ ወኢትፍራህ ወኢትደንግዕ።

Deut. 31:9 ወጸሐፎ ሙሴ ለዝንቱ ነገረ ሕግ ውስተ መጽሐፍ ወወሀቦሙ ለካህናት እለ ይጸውሩ ታቦተ ሕጉ ለእግዚአብሔር ለደቂቀ ሌዊ ወለሊቃናቲሆሙ ለደቂቀ እስራኤል።

Deut. 31:10 ወአዘዙሙ ሙሴ በይእቲ ዕለት ወይቤ እምድኅረ ስድስቱ ዓመት በዓመተ ኅድገት አመ በዓለ መጸለት።

Deut. 31:11 አመ የሐውር ኩሉ እስራኤል ከመ ያስተርኢ ቅድመ እግዚአብሔር አምላክከ ውስተ መካን ዘኅረየ እግዚአብሔር አንብብዎ ለዝንቱ ሕግ ቅድመ እግዚአብሔር።

Deut. 31:12 አስተጋቢአክሙ ሕዝበ ከመ ይስምዑ ዕደዊሆሙ ወአንስቲያሆሙ ወደቂቆሙ ወግድራን እለ ውስተ ሀገርክሙ ከመ ይስምዑ ወያእምሩ ፈሪሆቶ ለእግዚአብሔር አምላክክሙ ወሰሚሆሙ ከመ ይግበሩ ኩሉ ሕጎ ለዝንቱ ቃል።

Deut. 31:13 ወደቂቆሙኒ እለ ኢያአምሩ ይስምዑ ወይትመሀሩ ፈሪሆቶ ለእግዚአብሔር አምላክሙ በኩሉ መዋዕሊሆሙ ዘየሐይዉ እሙንቱ ዲበ ምድር እንተ ውስቴታ ተዐድዉ ዮርዳኖስ አንትሙ ከመ ትትዋረስዎ በህየ።

Deut. 31:14 ወይቤሎ እግዚአብሔር ለሙሴ ናሁ ቀርቦ መዋዕለ ሞትከ ጸውዖ ለኢያሱ ወቂሙ ኅበ ጥኅተ ደብተራ ዘመርጡል ወአዝዞ ወሐሩ ሙሴ ወኢያሱ ውስተ ደብተራ ዘመርጡል ወቆሙ ኅበ ጥኅተ ደብተራ ዘመርጡል።

Deut. 31:15 ወወረደ እግዚአብሔር በዐምደ ደመና ወቆሙ ኅበ ጥኅተ ደብተራ ዘመርጡል ወቆሙ ዐምደ ደመናኒ ኅበ ጥኅተ ደብተራ ዘመርጡል።

Deut. 31:16 ወይቤሎ እግዚአብሔር ለሙሴ ናሁ ትነውም አንተ ምስለ አበዊከ ወይትነሣእ ዝንቱ ሕዝብ ወይዜምዉ ድኅረ አማልክተ ባዕድ ዘውስተ ምድር እንተ ውስቴታ ይበውኡ ወየኅድጉኒ ወይትዔወሩ ኪዳንዩ ዘተካየድክዎሙ።

Deut. 31:17 ወእትመዐዕ መዓተ ላዕሌሆሙ በይእቲ ዕለት ወአኅድኅሙ ወእመይጥ ገጽየ እምኔሆሙ ወይከውኑ መብልዐ ለፀሮሙ ወትረክቦሙ ብዝኅት እኪት ወሥቃይ ወይብሉ በይእቲ ዕለት እስመ ኅደገነ እግዚአብሔር አምላክከ ወኢሀለወ ምስሌኒ ረከበተነ ዛቲ እኪት።

Deut. 31:18 ወአንሰ መይጥ እመይጥ ገጽየ እምኔሆሙ በይእቲ ዕለት በእንተ ኩሉ ኅጣውኢሆሙ ዘገብሩ ወገብኡ ኅበ አማልክተ ባዕድ።

Deut. 31:19 ወይእዜኒ ጸሐፍ ነገራ ለዛቲ ማሕሌት ወመሀርዎሙ ለደቂቀ እስራኤል ወይደይዎ ውስተ አፉሆሙ ከመ ትኩነኒ ዛቲ ማሕሌት ስምዐ ላዕለ ደቂቀ እስራኤል።

Deut. 31:20 እስመ አበውአሙ ውስተ ምድር ቡርክት ዘመሐልኩ ለአበዊሆሙ ምድር እንተ ትውሕዝ ሐሊቦ ወመዓረ ወበሊሆሙ ወጸጊቦሙ የአብዱ ወይገብኡ ኅበ አማልክተ ባዕድ ወያመልክዎሙ ወያምዕዑኒ ወየኅድጉ ኪዳንዩ።

Deut. 31:21 ወትቀውም ላዕሌሆሙ ዛቲ ማሕሌት ስምዐ ቅድመ ገጸሙ እስመ ኢትትረሳዕ እምውስተ አፉሆሙ ወእምውስተ አፈ ውሉዶሙ እስመ አነ አአምር እከዮሙ ኩሉ ዘይገብሩ በዝየ እንበለ አብአሙ ውስተ ይእቲ ምድር ቡርክት ዘመሐልኩ ለአበዊሆሙ።

Deut. 31:22 ወጸሐፋ ሙሴ ለዛቲ ማሕሌት በይእቲ ዕለት ወመሀርዎሙ ኪያሃ ለደቂቀ እስራኤል።

Deut. 31:23 ወአዘዙ ሙሴ ለኢያሱ ወይቤሎ ጽናዕ ወትባዕ እስመ አንተ ታበውአሙ ለደቂቀ እስራኤል ውስተ ምድር ዘመሐለ እግዚአብሔር ለአበዊሆሙ ወውእቱ ይሄሉ ምስሌክ።

Deut. 31:24 ወሶበ አኅለቆ ሙሴ ጽሒፎቶ ለዛቲ ነገረ ሕግ ውስተ መጽሐፍ እስከ ፈጸማ አዘዙሙ ለሌዋውያን እለ ይጸውሩ ታቦተ ሕጉ ለእግዚአብሔር።

Deut. 31:25 ወይቤሎሙ ንሥኡ ዛተ መጽሐፈ ወአንብርዋ ውስተ ከርሣ ለታቦተ ሕጉ ለእግዚአብሔር አምላክክሙ ወይንበር ህየ ስምዕ ለክ።

Deut. 31:26 እስመ አነ አአምር ወሂትተከ ወክሳደክ ጽኑዕ ወእንዘ ሀሎኩ ዓዲየ ሕያው ዮም አምዕዕክምዎ ለእግዚአብሔር እፎኬ ፈድፋደ እምድኅረ ሞትኩ።

Deut. 31:27 አስተጋብኡ ኅቤየ ዐበይተ ነገድክሙ ወሊቃናቲክሙ ወመኳንንቲክሙ ወጸሐፍቲክሙ ከመ እንግሮሙ ይስምዑ ኩሉ ነገረ ወአሰምዕ ላዕሌሆሙ ሰማየ ወምድረ።

Deut. 31:28 እስመ አነ አአምር ከመ እምድኅረ ሞትኩ አበሶ ትኤብሱ ወተኅድግዋ ለፍኖት እንተ አዘዝኩክሙ ወትመጽእ ላዕሌክሙ እኪት በደኃሪ መዋዕል እስመ ትገብሩ እኪተ ቅድመ እግዚአብሔር አምላክክሙ ከመ ታምዕዕዎ በግብረ እደዊክሙ።

Deut. 31:29 ወነገሮሙ ሙሴ ወአሰምዎሙ ለኩሉ ማኅበረ እስራኤል ነገራ ለዛቲ ማሕሌት ፍጹመ።

Deut. 32:1 ወይቤ አጽምእ ሰማይ ወእንግርከ ወትስማዕ ምድር ቃለ አፉየ።

Deut. 32:2 ወተወከፍዎ ከመ ነጠብጣብ ለነገርየ ወይረድ ከመ ጠል ነቢብየ ወከመ ዝናም ውስተ ገዳም ወከመ ጊሜ ውስተ ሣዕር።

Deut. 32:3 እስመ ስመ እግዚአብሔር ጸዋዕኩ ሀቡ ዕባየ ለአምላክነ።

Deut. 32:4 እግዚአብሔር ጻድቅ በምግባሩ ወርቱዕ ኩሉ ፍናዊሁ እግዚአብሔር ጻድቅ ወአልቦ ዐመፃ ጻድቅ ውኔር እግዚአብሔር።

Deut. 32:5 አበሱ ወአኮ ሎቱ ትውልድ ርኩሳን ትውልድ ዕሉት ወግፍትዕት ከመ ዝኑ ተዐስይዎ ለእግዚአብሔር።

Deut. 32:6 ዝ ሕዝብ አብድ ወአኮ ጠቢብ አኮኑ ውእቱ አቡከ ዘፈጠረከ ፈጠረከሂ ወገብረከ።

Deut. 32:7 ተዘከሩ መዋዕለ ትካት ወለብዉ ዓመተ ትውልደ ትውልድ ተሰአሎ ለአቡከ ወይነግረከ ወለአእሩጊከ ወይዜንገዉከ።

Deut. 32:8 አመ ከፈሎሙ ልዑል ለአሕዛብ ወዘከመ ዘርዖሙ ለደቂቀ አዳም ወዐቀመ አድባሪሆሙ ለአሕዛብ ወበበ ጐልቆሙ ለመላእክተ እግዚአብሔር።

Deut. 32:9 ወኮነ ያዕቆብ መክፈልተ ሕዝቡ ለእግዚአብሔር ወእስራኤልኒ ሐብለ ርስቱ።

Deut. 32:10 ወዐቀቦሙ በውስተ በድው በውስተ ፋልል በሐሩር ወበጽምእ ሐፀሮሙ መገቦሙ ወመርሐሙ ወዐቀቦሙ ከመ ብንተ ዐይን።

Deut. 32:11 ከመ ንስር ዘይከድን ያስተጋብእ እጉሊሁ ታሕተ ክነፊሁ ወከመ የሐቅፍ እጉሊሁ በገበዋቲሁ ወሐዘሎሙ በክነፊሁ ወጽሮሙ በእንግድዓሁ።

Deut. 32:12 እግዚአብሔር ባሕቲቱ መርሐሙ ወአልቦ ምስሌሆሙ አምላክ ነኪር።

Deut. 32:13 ወአዕረጎሙ ዲበ ጎይለ ምድር ወሴሰዮሙ እክለ ገራውህ ወሐፀኖሙ በመዓር እምኩኩሕ ወበቅብዕ እምእብን ጽንዕት።

Deut. 32:14 በቅብዕ ላሕም ወበሐሊበ በግዕ ምስለ መቀዓለ ጠሊ ወላሕም ወዕጉለ አልሕምት ወአባግዕ ምስለ ቁቅሐ ስርናይ ወደመ አስካል ሰትዩ ወይን።

Deut. 32:15 ወበልዐ ያዕቆብ ወጸግበ ወከረዮ ጽጋብ ለምንዙህ ሠብሐ ወገዝፈ ወርኅበ ውጎደጎ ለእግዚአብሔር ፈጣሪሁ ወርሕቀ እምእግዚአብሔር ሕይወቱ።

Deut. 32:16 ወወሀኩኒ በዝ ነኪር ወአምረሩኒ በርኩሶሙ።

Deut. 32:17 ሦዑ ለአጋንንት ወአኮ ለእግዚአብሔር ለአማልክት እለ ኢየአምርዎሙ አማልክተ ግብት እለ ይትገብሩ ኢይበቀዑ ወእለ ኢየአምሩ አበዊሆሙ።

Deut. 32:18 ጎደጎ ለእግዚአብሔር ዘወለደከ ወረሳዕኮ ለእግዚአብሔር ዘሐፀነከ።

Deut. 32:19 ወርእየ እግዚአብሔር ወቀንአ ወተምዕዐ መዓተ ላዕለ ደቂቆሙ ወአዋልዲሆሙ።

Deut. 32:20 ወይቤ እመይጥ ገጽየ እምኔሆሙ ወእሬእዮሙ ዘይከውኑ በደጋሪቶሙ እስመ ውሉድ ዐላውያን እሙንቱ ውሉድ እለ አልቦሙ ሃይማኖት።

Deut. 32:21 እሙንቱሰ አቅንኡኒ በዘኢኮነ አምላክ ወአምዕዕኒ በአማልክቲሆሙ ወአነ አቀንአሙ በዘኢኮነ ሕዝብ ወአምዕሆሙ በሕዝብ ዘኢይሌብው።

Deut. 32:22 እስመ እሳት ትነድድ እመዓትየ ወታውዒ እስከ ሲኦል ታሕተ ወትበልዓ ለምድር ወለኩሉ ፍሬሃ ወታነድድ መሠረታተ አድባር።

Deut. 32:23 ወአስተጋብአሙ ለእኪት ወአኅልቅ አሕጻየ በላዕሌሆሙ ወየኅልቁ በረጎብ ወይከውኑ መብልዐ ለአዕዋፈ ሰማይ።

Deut. 32:24 ወይደክም ጽንዖሙ ወእፌኑ ላዕሌሆሙ ስነ አራዊተ ምድር ምስለ ሕምዝ ከመ ይጉየዩ እምድር።

Deut. 32:25 ወበአፍአ ያጸምቶሙ መጥባሕት ለውሉዶሙ ወበውስተ አብያቲሆሙ ድንጋፂ ለወራዙቶሙ ምስለ ደናግሊሆሙ ወለሕፃናቲሆሙ ምስለ አእሩጊሆሙ።

Deut. 32:26 ወእቤ ከመ እዝርዎሙ ወእስዐር እምድር ዝክሮሙ ወእምዕጓለ እመሕያው።

Deut. 32:27 በመዓት ፀር ኮኑኒ ከመ ኢይትዐበዩ ፀር ወኢይበሉ እዴነ ጸንዐት ወአኮኑ እግዚአብሔር ዘገብሮ ለዝ ኩሉ።

Deut. 32:28 እስመ ሕዝብ ሕጉላነ ምክር እሙንቱ አልቦሙ ምልሕ ወኢ ሃይማኖት።

Deut. 32:29 ወኢኅለይዎ ከመ ያእምርዎ ለዝንቱ ወኢየአምርዎ በመዋዕል ዘይመጽእ።

- Deut. 32:30 እፎ ያነትያሙ አሐዱ ለዐሠርቱ ምእት ወክልኤቱ ይሰድድዎሙ ለእልፍ እስመ እግዚአብሔር ፈደዮሙ ወአምላክነሂ አግብአሙ።
- Deut. 32:31 እስመ ኢኮነ አምላክነ ከመ አማልክቲሆሙ ወፀርነሰ አብዳን።
- Deut. 32:32 እስመ ከመ ዐጸደ ወይነ ሰዶም ዐጸደ ወይኖሙ ወሐረጎሙኒ እምነ ገሞራ ወአስካሎሙኒ አስካለ ሐሞት ወቀምሐሙኒ መሪር።
- Deut. 32:33 ወሕምዘ አርቄ ምድር ወይኖሙ ሕምዘ አፍያት ዘይቀትል።
- Deut. 32:34 አኮነ ዝንቱ ትእዛዝ ዘእምነቤየ ውእቱ ወተኅትሙ ውስተ መዛግብትየ።
- Deut. 32:35 በዕለተ ኩነኔየ እትቤቀሎሙ ወበጊዜ ይድኅፅ እግሮሙ እስመ ቀርቦ ዕለተ ሕርትምናሆሙ እስመ በጽሐት ወድልውት ይእቲ ለክሙ።
- Deut. 32:36 እስመ ይፈትሕ እግዚአብሔር ለሕዝቡ ወይትናበብ በእንተ አግብርቲሁ እስመ ርእዮሙ ከመ ተመስዉ ወኅልቁ ወተዘንጉጉ በኅበ ሀለዉ።
- Deut. 32:37 ወሶበ ሠርሑ ይቤ እግዚአብሔር አይቱ እሙንቱ አማልክቲክሙ እለ ትትዌክሉ ቦሙ።
- Deut. 32:38 ወእለ ትበልዑ መሣብሕተ መሥዋዕቶሙ ወትሰትዩ ወይነ ሞጻሕቶሙ ለይትነሥኡኬ ወይርድኡክሙ ወይኩኑክሙ መድኅኔክሙ።
- Deut. 32:39 አእምሩ አእምሩ ከመ አነ ውእቱ እግዚአብሔርነ ወአልቦ ባዕደ አምላክ ዘእንበሌየ አነ እቀትል ወአሐዩ እቀሥፍሂ ወእሣህል ወአልቦ ዘያመስጥ እምእዴየ።
- Deut. 32:40 እስመ አሌዕል ውስተ ሰማይ እዴየ እምሕል በየማንየ ወእብል ሕያው አነ ለዓለም።
- Deut. 32:41 ወአበልሓ ከመ መብረቅ ለመጥባሕትየ ወትቀውም እዴየ በኩነኔየ ወእትፈደዮሙ በቀለ ለፀርየ ወእትቤቀሎሙ ለጸላእትየ።
- Deut. 32:42 ወአሰክሮን በደሞሙ ለአሕጻየ ወትበልዕ ሥጋሆሙ መጥባሕትየ እምደመ ቅቱላን ወሂውዋን አርእስተ መላእክተ ፀር።
- Deut. 32:43 ይትፌሣሕ ኩሎን ሰማያት ኅቡረ ወይሰግዱ ሎቱ ኩሎሙ መላእክተ እግዚአብሔር ወይትፌሥሑ ሕዝብ ምስለ ሕዘቢሆሙ ወይብሉ ኩሎሙ ውሉደ እግዚአብሔር ጽኑዕ ውእቱ።
- Deut. 32:44 እስመ ይትቤቀል ደመ ደቂቁ ይትቤቀል ወይትፈደዮሙ በቀለ ለፀሩ ወይትቤቀሎሙ ለጸላእቱ ወያነጽሕ እግዚአብሔር ምድረ ለሕዝቡ።
- Deut. 32:45 ወጸሐፋ ሙሴ ለዛቲ ማሕሌት በይእቲ ዕለት ወመሀሮሙ ለደቂቀ እስራኤል ወቦኦ ሙሴ ወነገሮሙ ለሕዝብ ወአስምያሙ ውእቱ ወኢያሱ ወልደ ነዌ።
- Deut. 32:46 ወሶበ አኅለቀ ሙሴ ነጊሮቶሙ ለኩሎ እስራኤል ወይቤሎሙ ዕቀብዎ በልብክሙ ለዝንቱ ኩሎ ነገር ዘአስማዕኩ አነ ላዕሌክሙ ዮም ዘትኤዝዙ ለደቂቅክሙ ዮም ከመ ይዕቀቡ ወይግበሩ ኩሎ ነገሮ ለዝንቱ ሕግ።
- Deut. 32:47 እስመ ኢኮነ ከንቶ ዝንቱ ነገር ለክሙ እስመ ውእቱ ሕይወትክሙ ወበበይነ ዝ ነገር ይነውኅ መዋዕሊክሙ ውስተ ምድር እንተ ላቲ ተዐድዉ ዮርዳኖስ ከመ ትትዋረስዋ በህየ።
- Deut. 32:48 ወነበበ እግዚአብሔር ለሙሴ በይእቲ ዕለት ወይቤሎ ዕረግ ውስተ ደብረ አባሪም ዘውስተ ደብረ ናቦር ዘምድረ ሞአብ ዘመንገለ ገጸ ኢያሪኮ ወረኢያ ለምድረ ከነዓን ዘእሁቦሙ ለደቂቀ እስራኤል ይምልክዋ።
- Deut. 32:49 ወሙት በውስተ ደብረ ዘውስቴቱ ተዐርግ ህየ ወተወሰክ ኅበ ሕዝብከ ከመ ሞተ አሮን እኅከ በውስተ ደብረ ሆር ወአተወ ኅበ ሕዝቡ።
- Deut. 32:50 እስመ ክሕድክሙ ቃልየ በቅድመ ደቂቀ እስራኤል በኅበ ማየ ቅስት ዘቃዴስ በገዳም ዘዒን እስመ ኢቀደስክሙኒ በቅድመ ደቂቀ እስራኤል።
- Deut. 32:51 ወረኢያ ለይእቲ ምድር ቅድሜከ ወህየሰ ኢትበውእ።
- Deut. 33:1 ወከመ ዝ ይእቲ በረከት ዘባረኩሙ ለደቂቀ እስራኤል ሙሴ ብእሴ እግዚአብሔር ዘእንበለ ይሙት።
- Deut. 33:2 ወይቤ እግዚአብሔር እምነ ሲና ወፅኦ ወመጽኦ ወእስተርአየኒ በሴይር ወአዕረፈ በደብረ ፋራን ምስለ አእላፈ ቃዴስ እለ እምየማኑ መላእክቲሁ ወእለ ምስሌሁ።
- Deut. 33:3 ወምሕኮሙ ለሕዝቡ ወለኩሎሙ እለ ተቀደሱ በእዴሁ ወእሉሂ እሊኦከ እሙንቱ።
- Deut. 33:4 ወረከቡ ሕገ በቃለ ዚኣሁ ዘእዘዘን ወርስተ ለሕዝብ ያዕቆብ።
- Deut. 33:5 ወይከውን መልኦክ እምፍቁር ተጋቢኦሙ መላእክተ አሕዛብ ምስለ ነገደ እስራኤል።
- Deut. 33:6 አኅሥሥ ለሮቤል ወኢይሙተኒ ወይኩን ብዙኅ ኅላቋሁ።

- Deut. 33:7 ወለዝንቱኒ ይሁዳ ስምዖን እግዚአብሔር ቃሎ ለይሁዳ ወይግባእ ውስተ ሕዝቡ ወእደዊሁ ይኩንናሁ ወኩኖ ረዳኤ እምፀሩ።
- Deut. 33:8 ወለሌዊኒ ይቤሎ አግብእ ለሌዊ ቃሎ ወጽድቆ ለብእሲ ጻድቅ ዘአመከርዎ በመከራ ወጸአልዎ በጎበ ማየ ቅስት።
- Deut. 33:9 ዘይቤሎሙ ለአቡሁ ወለእሙ ኢርኢኩክሙ ወበአጎዊሁኒ ኢያእመረ ወበደቂቁኒ ኢለበወ ወዐቀበ ቃለከ ወተማሕፀነ ኪዳነከ።
- Deut. 33:10 ከመ ይንግሩ ኩነኔከ ለያዕቆብ ወሕዝከ ለእስራኤል ወከመ ይደዩ ዕጣነ በማዕጠንትከ ወበኩሉ ጊዜ ውስተ ምሥዋዒከ።
- Deut. 33:11 ወባርክ እግዚአብሔር ጎይሎ ወተወከፍ ግብረ እደዊሁ ወአውርድ ክበደ ላዕለ እለ ይትቃወምፀ ፀሩ ወኢታንሥአሙ ለእለ ይፃረርዎ።
- Deut. 33:12 ወለብንያምኒ ይቤሎ ፍቁረ እግዚአብሔር የጎድር ተአሚኖ ወእግዚአብሔር ይጼልሎ በኩሉ መዋዕሊሁ ወየዐርፍ ማእከለ መታክፊሁ።
- Deut. 33:13 ወለዮሴፍኒ ይቤሎ እምበረከተ እግዚአብሔር ምድሩ ወእምዝናመ ሰማይ ወጠል ወእምነቅዐ ቀላይ ዘእምታሕቱ።
- Deut. 33:14 ወለለ ሰዐቱ እክሉ ወእምሥርቀተ ፀሓይ ወእምነ ጉላቋሆሙ ለአውራጎ።
- Deut. 33:15 ወይቀድም እምአርእስተ አድባር ወእምውስተ አርእስተ አውግር ዘአኤናዎን።
- Deut. 33:16 ምድር እንተ ዘልፈ ጽግብት ወሠናይት ለዘአስተርአየ በውስተ ዕፅ ጳጦስ ለይምጸእ ዲበ ርእሱ ለዮሴፍ ወበርእሱ ይክበር በውስተ አጎዊሁ ከመ በኩረ ላሕም ስኑ።
- Deut. 33:17 ወእምአቅርንት ዘአሐዱ ቀርኑ አቅርንቲሁ ወይወግአሙ ለአሕዛብ ቦሙ ጎበረ እስከ አጽናፈ ምድር ዝንቱ አእላፍ ዘኤፍሬም ወዝንቱ አእላፍ ዘምናሴ።
- Deut. 33:18 ወለዛብሎንሂ ይቤሎ ተፈሣሕ ዛብሎን በፀአትከ ወይስኮር በማጎደርከ እለ ያጠፍእዎሙ ለአሕዛብ።
- Deut. 33:19 ወጸውዑ በህየ ወሦዑ መሥዋዕተ ጽድቅ እስመ ብዕለ ባሕር የሐፅነከ ወንዋዮሙ ለእለ ይነብሩ ውስተ ጳራልያ።
- Deut. 33:20 ወለጋድሂ ይቤሎ ርኒብ በረከቱ ለጋድ ከመ አንበሳ የጎድር ቀጥቂጦ መዝራዕተ መላእክት።
- Deut. 33:21 ወርእየ ቅድሚሁ ከመ በህየ ተካፈልዎ ለምድር መላእክት እንዘ ጉቡአን መሳፍንት ጎበረ ምስለ መልአከ አሕዛብ ወምስለ ሕዝበ እስራኤል እግዚአብሔር ገብረ ጽድቆ ወኩነኔሁ ምስለ እስራኤል።
- Deut. 33:22 ወለዳንሂ ይቤሎ ዳን ዕጓለ አንበሳ ወይሰርር እምነ ባሳን።
- Deut. 33:23 ወለንፍታሌምኒ ይቤሎ ንፍታሌም ጽጉብ እምሠናያት ወይጸግብ እምበረከተ እግዚአብሔር ወይትዋረስ ባሕረ ወሊባ።
- Deut. 33:24 ወለአሴርሂ ይቤሎ ቡሩክ ውእቱ እምውሉድ አሴር ወይከውን ጎሩየ ለአጎዊሁ ወየጎፅብ በቅብዕ እገራሁ።
- Deut. 33:25 ዘጎሂን ወዘብርት አሣእኒሁ ወይከውን በከመ መዋዕሊከ ጎይልከ።
- Deut. 33:26 አልቦ ከመ አምላኩ ለፍቁር ዘይነብር ውስተ ሰማይ ውእቱ ረዳኢከ ወዕበየ ሥኑ ለሰማይ።
- Deut. 33:27 ወይከድንከ እግዚአብሔር ፍጽመ በጎይለ መዝራዕት አኤናዎን ወይወፅእ እምቅድመ ገጽከ ፀርከ በከመ ይቤ ከመ ያጥፍአሙ።
- Deut. 33:28 ወያነብር ለእስራኤል ተአሚኖ ባሕቲቶ ውስተ ምድረ ያዕቆብ ውስተ ምድረ ስርናይ ወወይን ወሰማይኒ ለከ ምስለ ደመና ወጠል።
- Deut. 33:29 ወበፀዕ አንተ እስራኤል መኑ ከማከ ሕዝብ ዘእግዚአብሔር ያድጎኖ ወያጸንዐከ ወይረድአከ ወበመጥባሕትከ ዕልገትከ ሕስው ፀርከ ወአንተ ትጼዐን ላዕለ ክሳዳቲሆሙ።
- Deut. 34:1 ወዐርገ ሙሴ እምአባሪም ዘሞአብ ውስተ ደብረ ናቦር ውስተ ርእስ ፋጋስ ዘሀለወ ቅድመ ኢያሪኮ ወአርአዮን እግዚአብሔር ኩሎ ምድረ ገላአድ ወኩሎ ምድረ ንፍታሌም ወኩሎ ምድረ ምናሴ ወኩሎ ምድረ ይሁዳ እስከ ደጋሪት ባሕር።
- Deut. 34:1 ወዐርገ ሙሴ እምአባሪም ዘሞአብ ውስተ ደብረ ናቦር ውስተ ርእስ ፋጋስ ዘሀለወ ቅድመ ኢያሪኮ ወአርአዮን እግዚአብሔር ኩሎ ምድረ ገላአድ ወኩሎ ምድረ ንፍታሌም ወኩሎ ምድረ ምናሴ ወኩሎ ምድረ ይሁዳ እስከ ደጋሪት ባሕር።
- Deut. 34:2 ወገዳሙ ወአድያሚሃ ለኢያሪኮ ሀገረ ፊንቆን እስከ ሴይር።

Deut. 34:3 ወይቤሎ እግዚአብሔር ለሙሴ ዛቲ ይእቲ ምድር ዘመሐልኩ ለአብርሃም ወለይስሐቅ ወለያዕቆብ ወእቤሎሙ ለዘርዕክሙ እሁባ ወናሁ አርአይኩከሃ ለከ በአዕይንቲከ ወባሕቱ ህየ ኢትበውእ።

Deut. 34:4 ወሞተ ሙሴ ቊልዔሁ ለእግዚአብሔር በምድረ ሞአብ በቃለ እግዚአብሔር።

Deut. 34:5 ወቀበርዎ ውስተ ምድረ ናባው ቅሩበ ቤተ ፌጎር ወአልቦ ዘየአምር መኑሂ መቃብሮ እስከ ዛቲ ዕለት።

Deut. 34:6 ወምእት ወዕሥራ ዓመቲሁ ሎቱ ለሙሴ አመ ሞተ ወኢተሐምጋ አዕይንቲሁ ወኢማሰና።

Deut. 34:7 ወበከይዎ ደቂቀ እስራኤል ለሙሴ በአራቦት ዘሞአብ በኅበ ዮርዳኖስ ዘመንገለ ኢያሪኮ ሠላሳ መዋዕለ ወተፈጸመ መዋዕለ ላሑ ለሙሴ ዘበከይዎ።

Deut. 34:8 ወኢያሱ ወልደ ነዌ ተመልአ መንፈስ ጥበብ እስመ ወደየ እደሁ ሙሴ ላዕሌሁ ወተአዘዙ ሎቱ ኩሉ ደቂቀ እስራኤል ወገብሩ ኩሎ ዘከመ አዘዞ እግዚአብሔር ለሙሴ።

Deut. 34:9 ወኢተንሥአ እንከ ነቢይ ውስተ እስራኤል ዘከመ ሙሴ ዘተናገሮ እግዚአብሔር ገጸ በገጽ።

Deut. 34:10 ወበኩሉ ተአምር ወመድምም ዘፈነዎ እግዚአብሔር ከመ ይግበሮ በምድረ ግብጽ ላዕለ ፈርዖን ወላዕለ መገብቱ ወላዕለ ምድሩ።

Deut. 34:11 ዐበይተ መድምመ ወእድ ጽንዕተ ወመዝራዕተ ልዑለ ኩሎ ዘገብረ ሙሴ በቅድመ ኩሉ እስራኤል።